

Zeitschrift: Annalas da la Societad Retorumantscha
Herausgeber: Societad Retorumantscha
Band: 116 (2003)

Rubrik: Istorgia
Autor: [s.n.]

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 15.04.2026

ETH-Bibliothek Zürich, E-Periodica, <https://www.e-periodica.ch>

Istorgia

LIR

Lexicon istoric retic

Liechtenstein – Mut

5. part

1. part **Adda–Buseno:** ASRR 112/1999 (163–195)
2. part **Cabbiolo–Cuira:** ASRR 113/2000 (293–336)
3. part **Cuira–Friaul:** ASRR 114/2001 (121–166)
4. part **Friberg–Leggia:** ASRR 115/2002 (135–177)

Introducziun

La buna accoglientscha dals fascichels 1–4 (ASRR 1999–2002) dal LIR intimescha da publitgar vinavant las istorgias da vischnancas e vischinadis. Las generalitads (concept e connex LIR/HLS, lingua e plan da publicaziun) èn gia rendidas enconuschentas e na manglan vegnir repetidas. Per facilitar la lectura ed il diever er da quest fascichel vegnan percunter la nomenclatura, las abreviaziuns e la bibliografia agiuntadas ed amplifitgadas en accord cun ils artitgels preschentads.

L'equipa LIR da quest fascichel

Dr. Adolf Collenberg (redactur); dr. Manfred Gross (redactur); Ursulina Monn, lic. fil. Dumenic Andry e lic. fil. Guadench Dazzi (translaturAs).

Nota bene

Tgi che chatta sbagls evidents en ils artitgels duai far il bain da communitgar quels en scrit al redactur LIR, dr. Adolf Collenberg, Giacomettistr. 132, 7000 Cuir, fax 081/353 59 49, e-mail: colado@bluewin.ch.

Dr. Adolf Collenberg

Nomenclatura LIR-GEO rumantsch – tudestg

<i>Adisch</i>	Etsch, Adige	<i>Chartatscha</i>	Kartatsch
<i>Alla</i>	Hall		(Val Matsch/I)
<i>Almen</i>	Almens	<i>Chaschauna</i>	Casanna
<i>Alpsu</i>	Oberalppass	<i>Chischlatsch</i>	Wildenberg/ Falera
<i>Alsazia</i>	Elsass		Klosters
<i>Alvagni</i>	Alvaneu	<i>Claustra</i>	Chiavenna
<i>Alvaschagn</i>	Alvaschein	<i>Clavenna</i>	Clugin
<i>Alvra</i>	Albula	<i>Clugén</i>	Klus
<i>Anugl</i>	Nolla	<i>Clus</i>	Como
<i>Aschera</i>	Schiers	<i>Com</i>	Konstanz
<i>Austria</i>	Österreich	<i>Constanza</i>	Krakau
<i>Avras</i>	Avers	<i>Cracovia</i>	Weissenstein
<i>Balamburtg</i>	Bärenburg	<i>Crap Alv</i>	Bergünenstein
<i>Balcun Aut</i>	Hohenbalken	<i>Crap da Bravuogn</i>	Flimserstein
<i>Barbusch</i>	Burgeis	<i>Crap da Flem</i>	Hohentrins
<i>Basilea</i>	Basel	<i>Crap S. Bargazi</i>	Oberalppass
<i>Beiva [Stalla]</i>	Bivio	<i>Crispalt</i>	Grüsch
<i>Bergiaglia</i>	Bergell	<i>Crusch e. P.</i>	Chur
<i>Berna</i>	Bern	<i>Cuira</i>	Conters i. Pr.
<i>Blinzuna</i>	Bellinzona	<i>Cunter e. P.</i>	Conters i. O.
<i>Bogn d'Alvagni</i>	Alvaneu Bad	<i>Cunter e. Sm.</i>	Reschenpass
<i>Bogn Tenigia</i>	Tenigerbad	<i>Cuolm dal Raisch</i>	Reschen- scheidegg
<i>Bravuogn</i>	Bergün		Lukmanier
<i>Breil</i>	Brigels	<i>Cuolm da S. Maria</i>	Oberalppass
<i>Briganza</i>	Bregenz	<i>Cuolm d'Ursera</i>	Valserberg
<i>Brinzauls</i>	Brienz	<i>Cuolm Val</i>	Hof (Chur)
<i>Brüsch</i>	Brusio	<i>Cuort (Cuira)</i>	Meierhof
<i>Bulsaun</i>	Bozen	<i>Cuort (Sursaissa)</i>	(Obersaxen)
<i>Buond</i>	Bondo		Churrätien
<i>Buorm</i>	Bormio	<i>Currezia</i>	Churwalden
<i>Burgogna</i>	Burgund	<i>Curvalda</i>	Galtür
<i>Calantgil</i>	Innerferrera	<i>Cuttüra</i>	(Paznaun/A)
<i>Campocologn</i>	Campocologno		Küblis
<i>Carinzia</i>	Kärnten	<i>Cuvlignas</i>	Dalin
<i>Carniec</i>	Grüneck	<i>Dagliegn</i>	Mals
<i>Casti</i>	Tiefencastel	<i>Damal</i>	Nauders
<i>Cazas</i>	Cazis	<i>Danuder</i>	
<i>Chalavaina</i>	Calven		

<i>Degen</i>	Igels	<i>Kiev</i>	Kiew
<i>Dolomitas</i>	Dolomiten	<i>Laad</i>	La(a)tsch
<i>Domat</i>	Ems	<i>La Punt</i>	Reichenau
<i>Duin</i>	Duvin	<i>Lags</i>	Laax
<i>Dür</i>	Eirs	<i>Lai da Poschiavo</i>	Lago di Poschiavo
<i>Eigias</i>	Igis		
<i>En</i>	Inn	<i>Lai dals Quatter Chantuns</i>	Vierwaldstätter- see
<i>Engiadina</i>	Engadin	<i>Lai da Segl</i>	Silsersee
<i>Fadera</i>	Fadära	<i>Lai da Silvaplauna</i>	Silvaplannersee
<i>Fadrein</i>	Fideris	<i>Lai Rivaun</i>	Walensee
<i>Fagieu</i>	Buchen	<i>Lai/Valbella</i>	Lenzerheide/ Valbella
<i>Farbertg</i>	Friberg/Fryberg		
<i>Farden</i>	Fardün	<i>Landquart Sura</i>	Oberlandquart
<i>Farera</i>	Ausserferrera	<i>Lantsch</i>	Lenz
<i>Farschno</i>	Fürstenau	<i>Lantsch Sut</i>	Haldenstein
<i>Faveras</i>	Pfäfers	<i>Ligiaun</i>	Lugano
<i>Favugn</i>	Felsberg	<i>Livign</i>	Livigno
<i>Ferrera (Belfort)</i>	Schmitten	<i>Lon</i>	Lohn
<i>Flearda</i>	Flerden	<i>Londra</i>	London
<i>Flem</i>	Flims	<i>Lorena</i>	Lothringen
<i>Flex</i>	Flix	<i>Lucarn</i>	Locarno
<i>Foppa</i>	Gruob	<i>Lucmagn</i>	Lukmanier, cf. Cuolm da S. Maria
<i>Frantscha</i>	Frankreich		
<i>Friburg</i>	Freiburg	<i>Lumnezia</i>	Lugnez
<i>Fuond</i>	Pfunds (Inntal/A)	<i>Luorscha</i>	Olivone
<i>Fuorcla Zodrel</i>	Vereinapass	<i>Luver</i>	Lovero
<i>Furca</i>	Furka	<i>Magonza</i>	Mainz
<i>Genevra</i>	Genf	<i>Maiavilla</i>	Maienfeld
<i>Germania</i>	Deutschland	<i>Malögia</i>	Maloja
<i>Gianatsch</i>	Jenaz	<i>Mantogna</i>	Heinzenberg
<i>Gianin</i>	Jenins	<i>Mariamunt</i>	Marienberg
<i>Giubiastg</i>	Giubiasco	<i>Marsiglia</i>	Marseille
<i>Giuvaulta</i>	Rothenbrunnen	<i>Martina</i>	Martinsbruck
<i>Glaruna</i>	Glarus	<i>Maton</i>	Mathon
<i>Glion</i>	Ilanz	<i>Medel/Lucmagn</i>	Medels i. Obld.
<i>Glogn</i>	Glenner	<i>Medel e. V.</i>	Medels i Rheinwald
<i>Gluorn</i>	Glurns		
<i>Grischun</i>	Graubünden	<i>Meir</i>	Schyn
<i>Gronda Britannia</i>	Grossbritannien	<i>Meraun</i>	Meran
<i>Italia</i>	Italien		

<i>Mesauc</i>	Mesocco	<i>Pass da S. Maria</i>	cf. Pass dal
<i>Milaun</i>	Mailand		Lucmagn
<i>Montafun</i>	Montafon	<i>Pass dal Segnas</i>	Segnespass
<i>Morbegn</i>	Morbegno	<i>Pass dal Set</i>	Septimer Pass
<i>Moscau</i>	Moskau	<i>Pass dal Spleia</i>	Splügenpass
<i>Mulegns</i>	Mühlen	<i>Pass dal Stielva</i>	Stilfserjoch
<i>Munt Novella</i>	Novellaberg/A	<i>Pass dal Striera</i>	Strelapass
<i>Munt S. Gieri</i>	Jörgenberg	<i>Pass dal Veraina</i>	Vereinapass
<i>Munt S. Gion</i>	Hohenrätien	<i>Pazen</i>	Patzen
<i>Muntogna</i>	Schamserberg	<i>Petersburg</i>	Sankt Peters-
<i>da Schons</i>			burg
<i>Murissen</i>	Morissen	<i>Pez Bargias</i>	Ringelspitz
<i>Murmarera</i>	Marmorera	<i>Pez Russein</i>	Tödi
<i>Müsch</i>	Musso	<i>Pez Valragn</i>	Rheinwaldhorn
<i>Mustér</i>	Disentis	<i>Piemunt</i>	Piemont
<i>Mut</i>	Mutten	<i>Pigniu</i>	Panix
<i>Napel</i>	Napoli	<i>Plaun</i>	Imboden
<i>Nossadunnaun</i>	Einsiedeln	<i>Plür</i>	Plurs
<i>Novagnas</i>	Nufenen	<i>Poschiavo</i>	Poschiavo
<i>Ollanda</i>	Niederlande		[Gem.]
<i>Panaduz</i>	Bonaduz	<i>Prada</i>	Praden
<i>Partenz</i>	Prättigau	<i>Pralung</i>	Langwies
<i>Pasqual</i>	Paspels	<i>Preaz</i>	Präz
<i>Pass Crusch</i>	Malsersheide	<i>Punt da Duana</i>	Zollbrücke
<i>Pass da</i>	Casannapass	<i>Puntcrap</i>	Rofla
<i>Chaschauna</i>		<i>Puntina</i>	Innsbruck
<i>Pass da l'Alvra</i>	Albulapass	<i>Puntraschigna</i>	Pontresina
<i>Pass dal Cunclas</i>	Kunkelspass	<i>Purtagn</i>	Portein
<i>Pass dal Fenga</i>	Fimberpass	<i>Puschlav</i>	Poschiavo
<i>Pass dal Flüela</i>	Flüelapass		[Talschaft]
<i>Pass dal Fuorn</i>	Ofenpass	<i>Quatter Chantuns</i>	Vierwaldstätten
<i>Pass dal Güglia</i>	Julierpass	<i>Ragisch</i>	Würzenstein
<i>Pass dal Lembra</i>	Kistenpass	<i>Rain</i>	Rhein
<i>Pass dal Lucmagn</i>	Lukmanierpass	<i>Raisch</i>	Reschen
<i>Pass dal Malögia</i>	Malojapass	<i>Rapertg</i>	Rietberg
<i>Pass dal Müret</i>	Murettopass	<i>Ravetg</i>	Ravetsch
<i>Pass dal</i>	San Bernardino-	<i>Razén</i>	Rhäzüns
<i>S. Bernardin</i>	pass	<i>Rezia</i>	Rätien
<i>Pass da S. Giachen</i>	Passo di San	<i>Reziòlta</i>	Hohenrätien
	Giacomo	<i>Riòlta</i>	Realta, Hoch-
<i>Pass da S. Gliezi</i>	St. Luzisteig		rialt

<i>Riva</i>	Walenstadt	<i>Spleia</i>	Splügen
<i>Rodan</i>	Rhone	<i>Sta. Domenica</i>	Santa Domenica
<i>Roma</i>	Rom	<i>Sta. Maria,</i>	Santa Maria,
<i>Roten</i>	Rodels	<i>Calanca</i>	Calanca
<i>Runtgaglia</i>	Rongellen	<i>Sta. Maria, V. M.</i>	Santa Maria,
<i>Russia</i>	Russland		i. M.
<i>S. Antönia</i>	Sankt Antönien	<i>Stierva</i>	Stürfis
<i>S. Bernardin</i>	San Bernardino	<i>Stugl</i>	Stuls
<i>S. Gagl</i>	Sankt Gallen	<i>Stussavgia</i>	Safien
<i>S. Gliezi</i>	St. Luzi	<i>Suagnign</i>	Savognin
<i>S. Hilari</i>	Sankt Hilarien	<i>Subvia</i>	Unterwegen
<i>S. Murezzan</i>	Sankt Moritz	<i>Sumvitg</i>	Somvix
<i>S. Peider</i>	Sankt Peter	<i>Sunder</i>	Sondrio
<i>(Scanvetg)</i>	(Schanfigg)	<i>Suogl</i>	Soglio
<i>S. Pieder</i>	Feldkirch	<i>Sour</i>	Sur i. O.
<i>S. Remigi</i>	San Romerio	<i>Sur e. V.</i>	Sufers
<i>S. Vintschegn</i>	St. Vincenz in	<i>Surmeir</i>	Albula- und
<i>da Pleif/Vella</i>	Pleif/Vella		Juliergebiet
<i>Samignun</i>	Samnaun	<i>Sur Punt Ota</i>	Ob Pontalt
<i>Sansch Sura</i>	Kapfenstein/ Obersansch	<i>Sursaissa</i>	Obersaxen
		<i>Surses</i>	Oberhalbstein
<i>Sassmunt</i>	Steinsberg	<i>Susch</i>	Süs
<i>Scalina</i>	Schöllenen	<i>Sviz</i>	Schwyz
<i>Scanvetg</i>	Schanfigg	<i>Tain</i>	Wiesen
<i>Scharons</i>	Scharans	<i>Tardsch</i>	Tarsch
<i>Sched</i>	Scheid	<i>Tavau</i>	Davos
<i>Schlarigna</i>	Celerina	<i>Tavellas</i>	Glaspass
<i>Schlingia</i>	Schlinig	<i>Term Bel</i>	Dreibündenstein
<i>Schludern</i>	Schluderns	<i>Termin</i>	Trimmis
<i>Schlü</i>	Schleis	<i>Tinizong</i>	Tinzen
<i>Schons</i>	Schams	<i>Tiraun</i>	Tirano
<i>Scuders</i>	Schuders	<i>Trafui</i>	Trafoi
<i>Scuol</i>	Schuls	<i>Trais Plaiivs</i>	Drei Pleven
<i>Segl</i>	Sils i. E.	<i>Tràn</i>	Trans
<i>Seglias</i>	Sils i. D.	<i>Travaulta</i>	Hohenbalken
<i>Sevgein</i>	Seewis i. Obld.	<i>Trent</i>	Trient
<i>Siat</i>	Seth	<i>Tschintg Vitgs</i>	Fünf Dörfer
<i>Sievgia</i>	Seewis i. Pr.	<i>Tschupegna</i>	Tschappina
<i>Silvaplana</i>	Silvaplana	<i>Tuer</i>	Taufers
<i>Solas</i>	Solis	<i>Tujetsch</i>	Tavetsch
<i>Spagna</i>	Spanien	<i>Tumegl</i>	Tomils

<i>Tumein</i>	Tamins	<i>Valplana</i>	Jenisberg
<i>Tumleastga</i>	Domleschg	<i>Valragn</i>	Rheinwald
<i>Turitg</i>	Zürich	<i>Vaniescha</i>	Venedig
<i>Tusaun</i>	Thusis	<i>Vargistagn</i>	Wergenstein
<i>Ursera</i>	Andermatt	<i>Varsovia</i>	Warschau
<i>Urtijei</i>	Ortisei,	<i>Vaz</i>	Vaz/Obervaz
	Sankt Ulrich/I	<i>Vaz Sut</i>	Untervaz
<i>Val Badia</i>	Gadertal	<i>Vazarouls</i>	Vazerol
<i>Val d'Ursera</i>	Urserental	<i>Veptga</i>	Panixerpass
<i>Val dal Blegn</i>	Val Blenio,	<i>Versomi</i>	Versam
	Bleniotal	<i>Vetten</i>	Vättis
<i>Val de Fascia</i>	Fassatal	<i>Veulden</i>	Feldis
<i>Val Druschuna</i>	Walgau	<i>Vienna</i>	Wien
<i>Val Gherdeina</i>	Grödnertal	<i>Visavraun</i>	Vicosoprano
<i>Val Mesauc</i>	Misox	<i>Vnuost</i>	Vinschgau
<i>Val Müstair</i>	Münstertal	<i>Vuclina</i>	Veltlin
<i>Val dal Rodan</i>	Rhonetal	<i>Vuorz</i>	Waltensburg
<i>Val S. Giachen</i>	Val S. Giacomo	<i>Zebras</i>	Zizers
<i>Val S. Pieder</i>	Vals	<i>Zignau</i>	Ringgenberg
<i>Val Tamina</i>	Taminatal	<i>Ziràn</i>	Zillis
<i>Valendau</i>	Valendas		

Abreviaziuns e simbols

Abreviaziuns generalas A-Z

<i>A</i>		<i>collav.</i>	collavuratur(a), collavuraziun
<i>A.</i>	Archiv	<i>collec.</i>	collecziun
<i>abit.</i>	abitant(s)	<i>comm.</i>	commemmer(-bra)
<i>abr.</i>	abreviaziun	<i>commerz.</i>	commerzial(a)
<i>a. C.</i>	avant Cristus	<i>conc.</i>	concernent
<i>admin.</i>	administrativ(a)/ -amain	<i>c-/Confed.</i>	c-/Confederaziun
<i>AGS</i>	Associaziun gri- schuna da scolastAs	<i>confess.</i>	confessiunal(a)/ -main, confessiun
<i>ann.</i>	annotaziun(s)	<i>cons.</i>	consecrà(-ada)
<i>ant.</i>	anteriur(a)	<i>Const. chant.</i>	constituziun chantunala
<i>antr.</i>	antruras	<i>Const. fed.</i>	constituziun federala
<i>Apriv.</i>	Archiv privat	<i>constr.</i>	construir, construì(-ida), construcziun
<i>arist.</i>	aristocratic(a), aristocrazia	<i>cult.</i>	cultural(a)/-main
<i>art.</i>	artitgel(s)	<i>cum.</i>	cumissiun
<i>assoc.</i>	associaziun	<i>cump.</i>	cumponist(a)/ cumposiziun
<i>astron.</i>	astronomic(a), astronomia	<i>cuntraref.</i>	cuntrarefurma
<i>austr.</i>	austriac(a)	<i>cuss.</i>	cusseglier(a), cussegl
<i>avr.</i>	avrigl	<i>cuss. guv.</i>	cusseglier(a) gubernativ(a)
<i>B</i>		<i>cuss. naz.</i>	cusseglier(a) naziunal(a)
<i>bibl.</i>	biblioteca		
<i>bibliogr.</i>	bibliografic(a), bibliografia		
<i>biogr.</i>	biografic(a), biografia		
<i>C</i>		<i>D</i>	
<i>ca.</i>	circa	<i>dec.</i>	december
<i>carol.</i>	carolingic(a)	<i>definit.</i>	definitiv(a)/-amain
<i>CAS</i>	Club alpin svizzer	<i>dep.</i>	departament
<i>cat.</i>	catolic(a)	<i>dicz.</i>	dicziunari
<i>cf.</i>	confer	<i>diff.</i>	different(a)/-amain
<i>cfr.</i>	confrunta	<i>dipl.</i>	diplomatic(a), diplomà(-ada)
<i>chal.</i>	chalender	<i>dir.</i>	directur(a), direcziun
<i>chant.</i>	chantunal(a)	<i>disc.</i>	discurri(-ida), discussiun
<i>chap.</i>	chapel(s)		
<i>cirq.</i>	circuital(a), circuit		

<i>diss.</i>	dissertaziun	<i>geogr.</i>	geografic(a)/-amain,
<i>distr.</i>	district		geografia
<i>doc.</i>	documentà(-ada), document(s)	<i>gimn.</i>	gimnasial(a), gimnasi
<i>dr.</i>	docter (doctoressa)	<i>giudiz.</i>	giudizial(a)
<i>dr. h. c.</i>	docter honoris causa	<i>giur.</i>	giuridic(a)
<i>dr. sc. mat.</i>	docter ciencias matematicas	<i>H</i>	
<i>E</i>		<i>habsburg.</i>	habsburgais(a)
<i>e. a.</i>	ed auter(s)	<i>HAGG</i>	Historisch-antiquari- sche Gesellschaft von Graubünden
<i>EB</i>	Engiadina Bassa		
<i>eccles.</i>	ecclesiastic(a)/-amain	<i>I</i>	
<i>econ.</i>	economic(a)/-amain, economia	<i>ill.</i>	illustraziun(s)
<i>edit.</i>	editur(a), ediziun	<i>imp.</i>	imperial(a), imperatur
<i>emp. mes.</i>	emprima mesadad	<i>incorp.</i>	incorporà(-ada), incorporaziun
<i>engl.</i>	anglais	<i>indep.</i>	independent(a)
<i>entsch.</i>	entschatta	<i>insch.</i>	inschigner(a)
<i>EO</i>	Engiadin'Ota	<i>internaz.</i>	internaziunal(a)/ -main
<i>episc.</i>	episcopal(a)		
<i>essenz.</i>	essenzial(a)/-main	<i>introd.</i>	introducir, introducziun
<i>e. u. v.</i>	ed uschia vinavant		
<i>evang.</i>	evangelic(a)	<i>ist.</i>	istic(a) -amain, istorgia
<i>evtl.</i>	eventual(a)/-main		
<i>F</i>		<i>L</i>	
<i>F</i>	funtauna(s)	<i>lat.</i>	latin(a)
<i>fac.</i>	facultad	<i>LCD</i>	Lia da la Chadé
<i>facs.</i>	facsimile	<i>LDD</i>	Lia da las Diesch Dretgiras
<i>fam.</i>	famiglia(s)		
<i>fan.</i>	fanadur	<i>LG</i>	Lia Grischa
<i>fasc.</i>	fascichel(s)	<i>ling.</i>	linguistic(a)/-amain
<i>fed.</i>	federal(a), federaziun	<i>litt.</i>	litterar(a)/-main, litteratura
<i>fil.</i>	filosofic(a), filosofia		
<i>finanz.</i>	finanzial(a)/-main	<i>l.p.</i>	lingua principala
<i>fl.</i>	florin(s)	<i>LQ</i>	La Quotidiana
<i>fr.</i>	franc(s)	<i>LR</i>	Lia rumantscha
<i>fracz.</i>	fracziun(s)		
<i>franz.</i>	franzos(a)	<i>M</i>	
<i>G</i>		<i>m</i>	meter, meters sur mar
<i>geneal.</i>	genealogic(a), genealogia	<i>m.</i>	musica
		<i>mag.</i>	magister(-tra)
		<i>mat.</i>	matematica

<i>med.</i>	medischina	<i>preist.</i>	preistoric(a),
<i>menz.</i>	menziunà(-ada)		preistorgia
<i>merid.</i>	meridiunal(a)	<i>pres.</i>	president(a)
<i>mes.</i>	mesadad	<i>prim.</i>	primar(a)
<i>milit.</i>	militar(a)	<i>princ.</i>	principal(a)/-main
<i>ms.</i>	manuscrit(s)	<i>prob.</i>	probabel(-bla)/ -blamain
<i>N</i>		<i>prof.</i>	professer (professu- ressa), profession(a)/ -main
<i>n.</i>	naschì(-ida)		protestant(a)
<i>naz.</i>	naziunal(a)	<i>prot.</i>	provinza
<i>necr.</i>	necrolog(s)	<i>prov.</i>	pseudonim
<i>nov.</i>	november	<i>pseud.</i>	publitgà(-ada),
<i>nr(s).</i>	numer(s)	<i>publ.</i>	publicaziun
<i>O</i>			
<i>O</i>	ovras		
<i>O.</i>	Oberhalbstein	<i>Q</i>	
<i>Oblid.</i>	Oberland	<i>q. v. d.</i>	quai vul dir
<i>occ.</i>	occidental(a), occident	<i>R</i>	
<i>oct.</i>	october	<i>reconstr.</i>	reconstruì(-ida), reconstrucziun
<i>OE</i>	ovras electricas	<i>rectang.</i>	rectangular(a)
<i>op.</i>	opera, opus	<i>red.</i>	rediger, redactur(a), redacziun
<i>org.</i>	organisar, organisaziun	<i>ref.</i>	refurmà(-ada), refurmaziun
<i>orig.</i>	original(a)	<i>rel.</i>	religijs(a), religiun
<i>oriund.</i>	oriund(a)/-amain	<i>reempl.</i>	reemplazzà(-ada)
<i>ostrog.</i>	ostrogotic(a)	<i>resp.</i>	rspectiv(a)/-amain
<i>o. t.</i>	oravant tut	<i>rest.</i>	restaurà(-ada), restauraziun
<i>P</i>		<i>ret.</i>	retic(a)
<i>p.</i>	pagina	<i>R-/retorum.</i>	R-/retorumantsch(a)
<i>P.</i>	Partenz	<i>rev.</i>	revista
<i>pf.</i>	publicaziun festiva	<i>rg</i>	rumantsch grischun
<i>p. ex.</i>	per exempel	<i>R-/rum.</i>	R-/rumantsch(a)
<i>p. g. p.</i>	per gronda part		
<i>p. p.</i>	per part		
<i>paroch.</i>	parochial(a)	<i>S</i>	
<i>parz.</i>	parzial(a)/-main	<i>s./ss.</i>	suandant(-as)
<i>PEB</i>	Pro Engiadina Bassa	<i>S.</i>	Son/Sontg(Sontga)
<i>PGI</i>	Pro Grigioni Italiano	<i>s. C.</i>	suentar Cristus
<i>pol.</i>	politic(a), politica	<i>schan.</i>	schaner
<i>pop.</i>	popular(a), populaziun	<i>scient.</i>	scientific(a)

<i>scol.</i>	scolast(a)		priv
<i>s. d.</i>	senza data	<i>tcristtemp.</i>	temp cristian tempriv
<i>sec.</i>	secundar(a)	<i>teol.</i>	teologic(a), teologia
<i>seg.</i>	segund(a)	<i>territ.</i>	territorial(a)/-main
<i>seg. mes.</i>	segunda mesadad	<i>tfier</i>	temp da fier
<i>sep.</i>	sepulì(-ida), sepultura	<i>tfiermes.</i>	temp da fier mesaun
<i>STE/HTW</i>	Scol'aula da tecnica ed economia/Hochschule für Technik und Wirtschaft	<i>tfiertard.</i>	temp da fier tardiv
		<i>tfiertemp.</i>	temp da fier tempriv
		<i>tgotictard.</i>	temp gotic tardiv
		<i>tirol.</i>	tirolais(a)
<i>sett.</i>	settember	<i>tLatènetard.</i>	temp da Latène tardiv
<i>settentr.</i>	settentriunal(a)	<i>tLatènetemp.</i>	temp da Latène
<i>Sm.</i>	Surmeir		tempriv
<i>soc.</i>	societad	<i>tm.</i>	temp medieval
<i>spez.</i>	spezial(a)/-main	<i>tmaut</i>	temp autmedieval
<i>SPF</i>	Scola politecnica federala	<i>tmerov.</i>	temp merovingic
		<i>tmerovtard.</i>	temp merovingic tardiv
<i>SPN</i>	Societad svizra per la perscrutaziun da la natira	<i>tmerovtemp.</i>	temp merovingic tempriv
<i>SS.</i>	Sons/Sontg(a)s	<i>tmesol.</i>	temp mesolitic
<i>stamp.</i>	stamparia	<i>tmod.</i>	temp modern
<i>stud.</i>	studi(s), student(a)	<i>tmtemp.</i>	temp medieval
<i>suppl.</i>	supplementar(a), supplement		tempriv
		<i>tneol.</i>	temp neolitic
<i>surmenz.</i>	surmenziunà(-ada)	<i>tostrog.</i>	temp ostrogotic
<i>Surs.</i>	Surselva	<i>tpaleol.</i>	temp paleotic
<i>T</i>		<i>tprecrist.</i>	temp precristian
<i>t</i>	tonna(s)	<i>tpreist.</i>	temp preistoric
<i>t.</i>	text, tom	<i>tprerom.</i>	temp preroman
<i>tab.</i>	tabella	<i>tprotoist.</i>	temp protoistoric
<i>tal.</i>	talian(a)	<i>tr. a.</i>	tranter auter
<i>tbronz</i>	temp da bronz	<i>trad.</i>	tradiziunal(a)/-main
<i>tbronzmes.</i>	temp da bronz mesaun	<i>transl.</i>	translatà(-ada), translatur(a), translaziun
<i>tbronztard.</i>	temp da bronz tardiv	<i>tretic</i>	temp retic
<i>tbronztemp.</i>	temp da bronz tempriv	<i>troman</i>	temp roman
		<i>tromtard.</i>	temp roman tardiv
<i>tcarol.</i>	temp carolingic	<i>tromtemp</i>	temp roman tempriv
<i>tcraptemp.</i>	temp da crap tempriv	<i>ts.</i>	toms

<i>tsch.</i>	tschientaner	<i>V</i>	
<i>tud.</i>	tudestg(a)	<i>venez.</i>	venezian(a)
<i>U</i>		<i>VFF</i>	Viafiers federalas
<i>uff</i>	uffizier	<i>vischin.</i>	svizras
<i>uffiz.</i>	uffizial(a)/-main	<i>vischn.</i>	vischinadi
<i>univ.</i>	universitar(a), universitad	<i>vischn. pol.</i>	vischnanca
<i>uschen.</i>	uschenumnà(-ada)	<i>V. M.</i>	vischnanca politica
<i>USR</i>	Uniun da scripturas e scripturs rumantschs	<i>voc.</i>	Val Müstair
<i>USS</i>	Uniun da scripturas e scripturs svizzers	<i>VR</i>	vocabulari
<i>uv.</i>	uvestg/-ieu	<i>Z</i>	Viafier retica
		<i>zercl.</i>	zercladur

Abreviaziuns da naziuns

Abreviaziuns internaziunalas, p. ex. *CH*/Svizra, *D*/Germania, *USA*/Stadis unids da l'America, e. u. v.

Abreviaziuns dals chantuns

Abreviaziuns tenor ils numeros d'autos, p. ex. *GR*/Grischun, *ZH*/Turitg, *TI*/Tessin, e. u. v.

Archivs e litteratura

<i>ACirq.</i>	Archiv cirquital
<i>ACom.</i>	Archiv communal
<i>ADB</i>	<i>Allgemeine Deutsche Biographie</i> , 56 ts., 1875–1912.
<i>AGI</i>	<i>Almanaco del Grigioni Italiano</i> , 1919–.
<i>AGS GR</i>	<i>Allgemeine Gesetzessammlung von Graubünden</i>
<i>Aep</i>	<i>Archiv episcopal</i>
<i>ArS</i>	<i>Archäologie der Schweiz</i> , bulletin da la Societad svizra da preistorgia e d'archeologia, 1978–2000.
Äskulap	<i>Äskulap in Graubünden</i> , 1970.
<i>ASRR</i>	<i>Annalas da la Societad retorumantscha</i> , 1886–.
BEZZOLA, <i>Litteratura</i>	BEZZOLA, R. R., <i>Litteratura dals Rumauntschs e Ladins</i> , 1979.
<i>BJb</i>	<i>Bündner Jahrbuch</i> , Verlag Bündner Jahrbuch, Cuir 1945ss.
<i>BM</i>	<i>Bündner Monatsblatt</i> , 1850–1904; Rhätia, Bünd. Familienblatt, 1904–05; Bünd. Monatsblatt, Zeitschrift für bündn. Gesch., Landes- und Volkskunde, 1914–.
<i>BMVR</i>	<i>Bibliografia da la musica vocala retorumantscha</i> , elav. da N. Berther ed I. Gartmann, 1986.
<i>BR</i>	<i>Bibliografia Retorumantscha</i> , elav. da N. Berther ed I. Gartmann, 1986.
<i>BUB</i>	<i>Bündner Urkundenbuch</i> , 1946–.
BUNDI, <i>Besiedlung</i>	BUNDI, M., <i>Zur Besiedlungs- und Wirtschaftsgeschichte Graubündens im Mittelalter</i> , 1982, 1989 ² .
<i>Cal. Gi.</i>	<i>Calender per mintga gi</i> . Calender popular per las valladas renanas, 1922–.
CAMARTIN, <i>Gegenwartsliteratur</i>	CAMARTIN, I., <i>Rätoromanische Gegenwartsliteratur in Graubünden</i> , 1976.
CDG	<i>Cudesch da dretg grischun</i> (=AGS/Allgemeine Gesetzessammlung von Graubünden)

- Chal. ladin* *Il Chalender ladin*. Chalender popular per l'Engiadina, Val Müstair e Bravuogn, 1910ss.
- Churer Stadtgeschichte* JECKLIN, U. (ed.) et al., *Churer Stadtgeschichte*, 2 ts., 1993.
- CLAVADETSCHER/MEYER, *Burgenbuch GR* CLAVADETSCHER, O. P./MEYER, W., *Das Burgenbuch von Graubünden*, 1984.
- DEPLAZES, *Identität* DEPLAZES, G., *Die Rätoromanen. Ihre Identität in der Literatur*, Desertina, Mustér 1991.
- FL *Fögl Ladin*, Samedan 1940ss.
- FR *Der Freie Räter*, Cuira 1868–74.
- Gas. Rom.* (Nova) *Gasetta Romontscha*, Mustér 1857–1996.
- Gem. GR* *Die Gemeinden von Graubünden*, Bündner Zeitung 1982–85.
- GILLARDON, *Zehngerichtenbund* GILLARDON, P., *Geschichte des Zehngerichtebundes*, 1936.
- GIRARD, *Officiers Suisses* GIRARD, F., *Histoire abrégée des officiers suisses qui se sont distingués aux services étrangers dans des grades supérieurs*, 3 ts, Friburg 1981–83.
- GLS *Geographisches Lexikon der Schweiz*
- HBG *Handbuch der Bündner Geschichte*, 4 ts., Cuira 2000.
- HBLs *Historisch-biographisches Lexikon der Schweiz*, 8 ts., 1921–34.
- HbRR *Handbuch des Rätoromanischen*, 3 ts., Offizin Verlag, Turitg 1994.
- HS *Helvetia Sacra*, 1972–.
- INSA *Inventar der neueren Schweizer Architektur, 1850–1920: Städte*, 1982–.
- Jb *Jahrbuch, Jahresbericht*
- JbADG GR *Jahresbericht des Archäologischen Dienstes Graubünden und der Denkmalpflege Graubündens*
- JbSGF *Jahrbuch der schweizerischen Gesellschaft für Familienforschung*, 1974–.
- JbSGUF *Jahresbericht der schweizerischen Gesellschaft für Frühgeschichte, 1909–37; Jahrbuch der schweizerischen Gesellschaft für Ur- und Frühgeschichte, 1938–.*

- JbWVGR* *Jahrbuch der Walservereinigung Graubündens, ...*
- JHGFL* *Jahrbuch der Historisch-antiquarischen Gesellschaft des Fürstentum Liechtenstein, ...*
- JHGG* *Jahresbericht der Historisch-antiquarischen Gesellschaft von GR, 1871–1984; Jahrbuch ..., 1985–93; Jahrbuch der Historischen Gesellschaft von GR, 1994–.*
- KAISER, Zuckerbäcker* *KAISER, D., Fast ein Volk von Zuckerbäckern?..., 1985.*
- Kdm GR* *POESCHEL, E., Die Kunstdenkmäler des Kantons Graubünden, 7 ts., 1938–47.*
- Kdm SG* *Die Kunstdenkmäler des Kantons SG, ...*
- LIR* *Lexicon istoric retic, edizium parziala dal Historisches Lexikon der Schweiz cun resguard spezial da l'intschess cultural retic-rumantsch, 1989–(publ. fin qua: art. geografics A–L en: ASRR 1999–2002).*
- MAISSEN, Landrichter* *MAISSEN, A., Die Landrichter des Grauen Bundes 1424–1799, 1990.*
- MAS* *Monuments d'art e d'istoriga da la Svizra, 1927– (suandà da la sigla dal chantun, da l'onn da cumparizium ed evtl. dal numer d'edizium, da las paginas).*
- METZ I–III* *METZ, P., Geschichte des Kantos GR, 3 ts., 1989–93.*
- NbISG* *Neujahrsblatt des Historischen Vereins des Kantons SG, 1861–.*
- NBZ* *Neue Bündner Zeitung*
- NZZ* *Neue Zürcher Zeitung, 1780–.*
- PIETH, Bündnergeschichte* *PIETH, F., Bündnergeschichte, 1945.*
- PLANTA, Verkehrswege* *PLANTA, A., Verkehrswege im alten Rätien, 4 ts., 1986–90.*
- POESCHEL, Burgenbuch* *POESCHEL, E., Das Burgenbuch von GR, 1930.*
- QGI* *Quaderni Grigionitaliani. Rivista trimestrale pubblicata della Pro Grigioni Italiano, 1931–.*
- Radioscola* *Radioscola. Organ da la Cumissium radioscola romontscha, 1(1956)–31(1984), 5 ts., 1985–86.*

- RAMPOLD, *Vintschgau* RAMPOLD, J., *Vintschgau. Landschaft, Geschichte und Gegenwart am Oberlauf des Etsch*, 1974, ²1980.
- RE *Paulys Realencyclopädie der classischen Altertumswissenschaft*, 84 ts., ²1988–1990 (¹1838–1980).
- RH *Romanica Helvetica*, Turitg 1935ss.
- RN PLANTA, R. v./SCHORTA, A., *Rätisches Namenbuch*, t.1: materialias (1939), t.2: etimologias (1964).
- SCHWARZ, *Gerichtsorganisation* SCHWARZ, R., *Die Gerichtsorganisation des Kt. Graubündens von 1803 bis zur Gegenwart*, 1947.
- SOS *Die Südostschweiz*, 1997–.
- SPRECHER/JENNY, *Kulturgeschichte der Drei Bünde im 18. Jahrhundert*, ³1976.
- SSRQ GR *Sammlung Schweizerischer Rechtsquellen, Kanton GR*, 1898–.
- StAGR Staatsarchiv GR
- TG *Terra grischuna*, Zeitschrift für Natur, Kultur und Freizeit in GR, 1957–.
- WAGNER/SALIS, *Rechtsquellen des Kantons Graubünden*, Basilea 1887.
- ZAK *Zeitschrift für schweizerische Archäologie und Kunstgeschichte*, 1939–.

Liechtenstein, Principadi dal –, dividi pol. dapi il 1719 en ina part sura cun 6 ed ina part sut cun 5 vischn. 160 km². Abit.: 1812 5'797; 1852 8'162; 1921 8'034; 1941 11'094; 1960 16'628; 1991 29'386; 2000 32'863. La quota da burgais esters muntava il 1991 a 11'021 (37,5%); da quels eran 4'587 Svizzers. Il Principadi da L. vegn definì dapi il 1921 sco «monarchia ereditara constituiziunala sin basa democratica e parlamentara». Il Landtag vegn elegì dapi il 1939 tenor proporz e dumbra dapi il 1988 25 deputadas e deputads. Il dretg da vuschar da las dunnas exista dapi il 1984. La regenza collegiala sa cumpona dapi il 1965 da 5 comm. Il prinzi è il schef da stadi e represchenta quel vers anora; per cuntanscher vigur legala ston las leschas vegnir sancziunadas dal prinzi; ad el cumpetan ils dretgs d'urgenza, grazia ed aboliziun. Eccles. appartegneva il L. fin il 1997 a l'uv. da Cuira, alura è el daventà in archuvestgieu separà da Cuira. Il L. è vegnì conquistà e romanisà ens. cun la Rezia ed è adina stà collià cun il GR tras il Pass da S. Gliezi, dapi il tm. tras la Via imperiala si dal Lai da Constanza. Cun l'introducziun da la constituiun dal contadi francon l'onn 806 è il Principadi da L. odiern vegnì incorporà en la Rezia inferiura e dal 917–1806 appartegneva il L. a l'Imperi german. Bains e dretgs episc. en il L. avevan tr. a. las claustras da Faveras, S. Gliezi/Cuira, il convent da Schänis ed il chapitel catedral da Cuira. La claustra da S. Gion a Curvalda possedeve fin il 1305 ultra da bains er il dretg da collatura da Balzers ch'ella ha alura barattà cun quel da Favugn. Suenter l'onn 806 e surtut suenter l'onn 843, cura che l'uvestgieu da Cuira è vegnì separà da l'archuv. da Milaun ed attribuì a l'archuv. da Magonza, èn s'augmentadas la preschientscha e l'influenza da regents ed administraturs aristocrats da lingua tud. e d'immigrants nordalemans. En il 13. tsch. èn ultra da quai sa domiciliads Gualsers al Triesenberg, a Malbun ed a Planken. La pop. rum. restanta è uschia vegnida tschinclada da tuttas varts ed il rum. è

stà condemnà a la mort. La midada da lingua è succedida tr. il 9. e 14. tsch. Già il 1309/14 eran ils Habsburgais vegnids en possess da Gutenberg a Balzers (fin il 1824). Grazia a la simpatia dals prinzis per Habsburg èn Vaduz e Schellenberg resp. il L. restads sut l'influenza da l'Austria fin viaden en il 20. tsch. Il 1416 han ils baruns da Brandis cumprà da lur parent l'uv. Hartmann da Cuira tr. a. Vaduz, il sid ed il 1430–37 er il nord dal Schellenberg. L'unitad territ. odierna è cun quai stada creada. Ils Confederads e Grischuns han determinà en il 15. tsch. l'istorgia regiunala. El la Guerra svabaisa (1499) han la regiun ed ils abitants subì gronds donns. La Confederaziun è s'expandida fin al Rain ch'è daventà a partir dal 1500 il cunfin stabel. Il 1510 ha Johann von Brandis vendì Vaduz e Schellenberg a ses nev Rudolf von Sulz. Ils Sulz han defendì il L. cunter influenzas refurmatricas nà dal Signuradi. Il 17. tsch. è stà caracterisà da malguverns, guerras, spogliaziuns, donns d'incendis (Guerra da trent'onns, Scumbigls grischuns), pestilenza ed persecuziun da strias. Il 1693 ha l'indebità Jakob Hannibal von Hohenems offert a las Trais Lias en cumpra las vischn. al sid da Vaduz. Interessads a l'acquist eran tr. a. er l'avat da S. Gagl e l'uv. da Cuira che tschertgava in *asylum* en consequenza da las dispitas cun ils protestants grischuns. La pop. ha però impedì la fatschenta. Suenter la cumpra dal Signuradi da Schellenberg il 1699 e dal Contadi da Vaduz il 1712 han ils prinzis da L. obtegnì il 1719 il titel da prinzis imperials. Litt: P. KAISER, *Geschichte des Fürstenthums L. 1847*, reed. 1988 en 2 ts.; *Kdm FL*, 4–24; V. PRESS/D. WILLOWEIT (ed.), *Liechtenstein – Fürstliches Haus und staatliche Ordnung*, 1988², 87–418; H. STRICKER/T. BANZER/H. HILBE, *Liechtensteiner Namenbuch*, 6 t., 1999; *Statistisches Jahrbuch*, ed. da l'Uff. d'econ. publ., Vaduz, 1977–.

Artur Brunhart/Rupert Quaderer/
Adolf Collenberg

Ligiaun (tal. Lugano), citad al Lai da L., TI. 1513–1798 podestataria da la Conf. Impurtant o. t. per la LG era la fiera da

muvel a L. ch'existiva gia en il tm. Ina impurtanza internaz. ha dentant survegnì pir l'uschen. 'fiera grossa' ch'è vegnida introducida il 1513 e ch'aveva lieu mintgamai durant ca. 15 dis en october sin la Piazza dal Castello. La muaglia, p.g.p. bovs (manadiras), vegniva surpigliada dals martgadants indigens e chatschada en trieps sur il Lucmagn (intschess Surselva, Glaruna) ed il S. Bernardin (Plaun, vals dal Rain Posterior) e vendida sin las fieras dal sid. Dal 1608-43 è il commerzi da muvel sa spustà sin la nova fiera da S. Baltramieu a Giubiastg/Blinzuna. Ils effectivs restants vegnivan vendids a L. Enturn il 1900 ha la fiera da L. pers sia impurtanza per il GR.

Litt: E. POMETTA/V. CHIESA, *Storia di Lugano*, 1942, 341-44; G. MICHAEL, «Co nos tats mavan vi Ligiaun a fiera», en: *Dun de Nadal*, 1922, 10-14. Adolf Collenberg

Lindau, ant. citad imperiala a la riva nord dal Lai da Constanza, oz Germania. Lieu da commerzi impurtant per las Trais Lias e per il traffic da transit da la regiun al Lai da Constanza tras las Trais Lias en Italia. Fluriziun en il tm-tard. L. giudeva da quel temp exemziun da dazi per martganzia en transit e privilegis per il transport da quella. Da l'emprima mes. dal 16. tsch. fin il 1826 organisava l'uschen. postin da L. resp. da Milaun mintg'emna in transport da martganzia e da passagiers sur il Spleia a Milaun. El era munì cun brevs da protecciun spezialas da las Trais Lias. Il 1803 è il regal da posta passà als chantuns. Ils spediturs da L. han dentant mantegnì lur incumbensa ed han pajà dapi il 1813 al chantun GR ina fittanza annuala per il regal da posta tr. il Pass da S. Gliezi ed il cunfin meridiunal dal GR. Il 1826 ha la nova posta da viadi privata dal GR surpiglià ils servetschs dal postin da L. Ils 30-9-1622 è vegnì suttascriet a L. l'uschen. Contract da L. Litt: PIETH, *Bündnergeschichte*; W. DOBRAS, «Der Mailänder oder Lindauer Bote...», en: *BM* 1989, 339-56. Adolf Collenberg

Livign (tal. Livigno), vischn. tal. en la vallada alpina al nordvest da Buorm,

provinza da Sunder, situada al cunfin svizzer. La Trepalle (2'079 m) è la pli auta culegna da l'Italia abitada sur onn. Colliaziuns sur il Pass da Fus-chagn (tal. Passo di Foscagno) a Buorm, sur la Fuorcla da L. (tal. Forcola di L.) a Poschiavo, sur il Pass dal Chaschauna a S-chanf e tras la Val dal Spöl a Zernez. En il tm. gronda culegna sparpagliada cun singuls bains (en il 16. tsch. 100 bains purils) ed il retroterra alpester impurtant da Buorm. Sur il Pass d'Alpisella colliaziun a las minieras medievalas da la Val Fraéle (tal. Valle di Fraéle). L. era in lieu da concentraziun e d'operaziun milit. en div. guerras da muntogna: il 1487 a chaschun da la campagna dals Engiadinais sur il Pass dal Chaschauna a Buorm, il 1499 suenter la Guerra da Chalavaina a chaschun da l'invasiun da truppas imp. en l'Engiadina, il 1635 a chaschun da la victoria dal duca da Rohan sur ils Austriacs. Entant ch'ils da L. emigravan antr. stagionalmain o.t. sco praders, fantschellas e lavurers da constr. en Engiadina, ha L. fatg en il 20. tsch. in enorm svilup en il sectur terziar sco exclava da duana (1919) ed o.t. sco regiun da turissem (pendicularas, runals) dapi ils onns 1950. L. patescha però er da las consequenzas dal grond traffic da cumpra.

Litt: PIETH, *Bündnergeschichte*; D. BENETTI/M. GUIDETTI, *Storia di Valtellina e Valchiavenna*, 1990, o.t. 219. Martin Bundi

Lon (tud. Lohn), vischn. pol. GR, cirq. Schons, distr. Rain Posterior. Vitg accumulà (1'582 m), situà sin la Muntogna sura da Schons. Mes. 12. tsch. *Laune, Lune*; 1219 *de Laone*. 1780 126 abit.; 1850 97; 1900 75; 1950 62; 1990 48; 2000 50. In sviament antic da la Viama sur la chavorgia para oz pauc prob. Gia a l'entsch. dal 13. tsch. territ. da colonisaziun sviluppà cun agricultura e cultivaziun da granezza. Dapi il 1204 è doc. sin la Muntogna da Schons ina cuminanza da purs libers dapi tuts temps cun in'atgna dretgira civila. Ils dretgs signurils exequevan successivmain l'uv. da Cuir (??), ils da Vaz, ils

da Werdenberg ed a partir dal 1456 puspè l'investgieu. Il 1458 è la val sa cumprada liber. Fastizs d'ina chapella dal 12. tsch. La deliberaziun eccles. da S. Martin a Ziràn ha cumenzà il 1460 cun la fundaziun da la chaplania da S. Maria, la separaziun totala è succedida il 1538 cun la costituziun da la plaiv sin la Muntogna sura. Mes. dal 16. tsch. conversiun a la Refurmaziun. Fin il 1851 vischinadi dal cumin da Schons; pitschna dretgira (civila) cun Maton e Vargistagn. 1904-06 constr. dal stradun. Il 1990 lavuravan tut las personas cun activitad da gudogn a L. en il 1. sector. Pop. rum.: 1980 100%; 1990 62,5%/75% (l. p./l. p. u disc.).
Litt: *Kdm GR* 5, 208-11; *Gem. GR* 76 (1985).
Jürg Simonett

Londra, metropola britannica, lieu d'operusità da bliers emigrants ed emissaris grischuns impurtants. En il 17. tsch ha il plevon evang. Johann Baptista Stuppa da Clavenna pastorà la baselgia savoiarda ed è vegnì incumbensà da Cromwell cun missiuns diplomaticas. En connex cun la Guerra da successiun spagn. è succedida enturn il 1700 in'avischinaziun stretga tr. l'Engalterra e la Svizra ref., o. t. er il GR. En consequenza da quest'amicizia èn plirs Grischuns stads a L. Il 1708-10 ha l'envoyé Peter von Salis propagà en Engalterra la renovaziun dal Chapitulat da Milaun e l'admissiun dals refurmads en las terras subditas. Il 1704 ed il 1711 è stà il preditgant Johann Leonhardi a L., nua ch'el ha publitgà duas scrittiras davart il GR. Andreas Planta è stà qua prof. da matematica, preditgant a la baselgia ref. tudestga, bibliotecar al British Museum e.a.p. Ses figl Joseph (*1744) è daventà il 1792 l'emprim directur das British Museum ed ha publitgà a L. il 1776 in tractat davart la lingua rum. ed il 1809 in ulteriur davart l'istorgia da la Confederaziun helvetica. Ses figl Joseph (*1787) è stà secretari en il ministeri exteriur britanic e comm. dal parlament. A L. è stada activa il 1766 er Angelika Kaufmann sco confundatura da la Royal Academy.

En il 18. tsch. èn emigrads industrials engiadinais a L: il 1737 è doc. in Bartrumieu Barat da Samedan (firma Baratty) e dapi il 1776 il commerziant Simon Baratty. Tr. il 1693 ed il 1815 scuntrain nus a L. las fam. engiadinaisas Tognun/Tugnum, Philippi, Rascher, Tratschin, Petzi sco er Johann Barandun da Veulden. Oz regordan o. t. ils gronds effectivs da cudeschs rum. en la 'Library' dal British Museum - ina da las pli grondas collecziuns rum. dal mund - il grond interess manifestada da l'Engalterra per il Grischun rum. en il 18. tsch. e la premura da collecziunar demussada dals directurs (er grischuns) da quest museum.
Litt: H. HARTMANN/JOSEPH PLANTA, *Geschichte der romanischen Sprache*, 1776/1983; KAISER, *Zuckerbäcker*. Martin Bundi

Lostallo, vischn. pol. GR, circ. Mesauc, distr. Moesa, situada sin la spunda dretga dal flum Moesa, cun las fracziuns da Cabbiolo al nord e da Sorte al sid. 1219 *Lostallo*. Abit.: 1802 212; 1850 363; 1900 372; 1950 424; 1990 525; 2000 656. En il Comun grande di Mesolcina fascheva L. part da la Squadra di mezzo e dal vicariat da Mesocco. En ils tschientaners passads aveva lieu ils 25 d'avrigl a L. la Centena, assemblea publica da tut ils vischins dal Comun grande di Mesolcina; anc oz sa splega en la vischn. ina reuniun analoga per l'elecziun dal tribunal distr. Il 1219 è menz. la baselgia parochiala da S. Gieri, reconstr. per part en il 17. tsch. e restaurada en ils onns 1939-41. La chaplutta deditgada a Carl Borromeo datescha dal 1663; a Sorte sa chatta in'ulteriura chaplutta dal 1611, deditgada a Nossadonna d'avust. A L. vegnan anc pratitgads l'agricultura e l'allevament da muvel; igl existan en pli insquantas interpresas (o. t. fatschentas da construcziun e scrinarijas) ed ina centrala idroelectricca che sfrutta ils affluents da sanestra da la Moesa, cun in lajet d'accumulaziun en la Val d'Arbola. A L. datti grottas famusas ed apprezzadas.
Litt: C. SANTI, «La Centéna di Val Mesolcina», en: *Voce delle Valli*, 3-6-1982; C. SANTI, «La Confraternità di Lostallo», en:

Löwenberg, signuradi schlià il 1803, appartegneva sco dretgira da Schluein a la dretgira auta da la Foppa. Il Signuradi da L. era sortì dal feud episc. Schluein senza il bain Fallerins ed aveva sia sedia en il chastè dal medem num, situà sin in sparun grippus. Menz. il 1160 per l'empr. giada sco sedia dals Libers da noblezza da *Lewenberc*. Ils L. appartegnevan a la medema schlatta sco ils Montalt doc. il 1257 sco possessurs dal chastè u eran perfin identics cun quels. Il 1378 va il chastè als Rüssegg, il 1383-1428 als Werdenberg-Sargans ch'èn entrads il 1395 a Glion ens. cun il Signuradi da L. en la Lia dals signurs. Il 1429 vegn il chastè vendì als Lumerins, il 1481 als Mont (Vella). 1551-94 midada frequenta da possessur, tr. a. en possess dals Capol e Planta. Fin il 1803 appartegna il chastè als Mont-L. Incendi 1685 e reconstr. parz., sedia d'ina scola da giuivens 1832-33 e dals missiunaris dal sang custaivel 1838-50, chasa d'orfens da la diocesa 1851-1972, ulteriur incendi 1889 e dapi lura ruina. L'edifizi odiern, en possess da l'uv. da Cuir, sa chatta 150 m al sidvest da l'anteriuur chastè.

Litt: CLAVADETSCHER/MEYER, *Burgenbuch GR*, 92ss.; J. SIMONNET, «Eine Knabenschule in L. 1832», en: *BM*, 1934, 305-17; D. KOBLE, «L. - vom Schloss zum Durchgangshaus», en: *TG* 5 (1997), 39-42.

Adolf Collenberg

Lü, vischn. pol. GR, cirq. VMü., distr. En. La vischn. pol. la pli autsituada da l'Europa (1'920 m) da chatta sin ina terrassa sulegliava a sanestra dal Rom e cumpiglia l'aclaun Lüsai senza il fund da la val. 1466 *Lug*. 1835 74 abit.; 1900 59; 1950 56; 1980 56; 1990 55; 2000 62. Colonisà a partir dal 12. tsch. en il decurs da la culturaziun promovida da la claustra da Müstair. A la via da L. sur il Pass da Costainas per S-charl e Scuol sa chattava prob. ina staziun da sauma. A la fin dal 15. tsch. appartegna L. a la plaiv da Sta. Maria. Refurmaziun enturn il 1530. Dapi lura è L. collià cun la

plaiv da Fuldera. En ils onns 1820 aveva L. in agen plevon. Dapi il 1854 è la vischn. pol. autonoma. Cun il schlargiament da la via dal Fuorn il 1870-72 è L. vegnì isolà anc pli fitg. L. cultivava durant tscherts temps granezza, ma l'allevament da muvel predominescha. Member da la corporaziun regionala VMü. (fundada il 1992).

Litt: R. LUZZI, *Lü-Lüsai. Cronica dad ün cumünet idillic...*, 1992; *Gem. GR* 78 (1983).

Paul Eugen Grimm

Lucarn (tal. Locarno), citad al Lai da Lucarn, TI. L'onn 1154 ha l'imp. Friedrich I legà a la claustra da Mustér la vischn. da L. e terren fritgaivel tr. ils lais da Lucarn e Ligiaun al pe da la ruta dal Lucmagn, promovida fermamain dad el. Da grond'impurtanza econ. per il GR e la Svizra orientala era dapi il tmtard. la fiera da muvel (mes. d'oct.). Fin a l'entsch. dal 18. tsch. cumpravon ils martgadants tal. il muvel directamain dals purs, pli tard stuevan quels ir sezs sin las fieras tessinaias a vender lur biestga. Il muvel ch'els na vendevan betg a Giubiasg vegniva puspè offert a la fiera da L. L'effectiv restant vegniva lura surpiglià da martgadants che vendevan quel en l'Italia dal nord. Suenter la fluriziun en ils onns 1840 ha la fiera da L. pers sia impurtanza per il GR vers la fin dal tsch.

Litt: SPRECHER/JENNY, *Kulturgeschichte*, 42, 557-58; I. MÜLLER, *Geschichte der Abtei Disentis*, 1971, 31, 43; G. GADOLA, «Ina fiera de Ligiaun (novella)», en: *Tschespet* 41 (1962), 46-149.

Adolf Collenberg

Lüen, vischn. pol. GR, cirq. Scanvetg, distr. Plessur. Vischn. a mantun, situada sin la spunda nord dal Scanvetg d'amez. 1084 *Leune*, rum. *Leun*. 1850 83 abit.; 1900 68; 1950 77; 1990 82; 2000 74. Chats da munaidas rom. Tenor il doc. da fundaziun dal 1084 han ils libers vischins rum. da L. equipà la baselgia da S. Zeno gist constr. cun da lur bains e l'han regalada a l'uv. da Cuir. Il doc. lascha supponer ina colonisaziun intensiva cun ers (chonv), pumicultura e tratga da nursas. Als da Vaz sco possessurs da feuds episc. èn suan-

dads il 1338 ils da Werdenberg, il 1363 ils da Toggenburg. Sco vischin. dal cumin da S. Peider è L. s'allià il 1436 a la LDD. Ils novs suverans eran a partir dal 1437 ils da Montfort, suenter il 1471 ils da Matsch, a partir dal 1479 l'Austria. Refurmaziun ca. 1530. Il 1570 era L. anc ina vischn. rum. Il 1652 è vegnids cumprads or ils dretgs da domini, il 1657 ils dretgs feudals episc. 1875-77 constr. dal stradun 200 m sur L., 1914 avertura da la staziun L.-Castiel da la viafier d'Arosa sco er da la centrala da l'implant electric. Il 1990 eran occupads 86% a L. en l'emprim sector; 61 % da las personas cun activitad da gudogn domiciliadas a L. lavuravan ordaifer la vischn.

Litt: *Kdm GR* 2, 192-198; F. PIETH, «Aus der Gesch. des Tales Schanfigg», en: *JHGG* 81 (1951), 97-125; R. FURTER, *Schanfigg: Bevölkerung und Wirtschaft 17. bis 19. Jh.*, lic. Berna, 2000; *Maiensässinventar GR*, quad. 16, Schanfigg, 1999. Jürg Simonett

Lumbrein, vischn. pol. GR, cirq. Lumnezia, distr. Surselva (fin 2000 Glogn). La vischn. rum. è situada en la part d'adens da la Val Lumnezia e cumpiglia il vitg princ. L. (l'405 m), las fracziuns da S. Andriu e Nussaus a la via princ. vers Vrin e Surin, Pruastg e Silgin (ca. l'245 m) da la vart sanestra dal Glogn. Molina e Curtinatsch è vegnids abandonads enturn il 1750, Farglix enturn il 1900. 831 *villa Lamarine*, 1231 *Lumarins*. 1850 529 abit.; 1900 531; 1930 475; 1950 584; 1990 397; 2000 399.

1. Crestaulta a Surin

Crestaulta è in areal d'abitadi impurtant dal tbronz, situà sin ina cresta var 300 m al vest da Surin. Quest areal è vegnì scuvert il 1935 ed exchavà parz. il 1935-38 da Walo Burkart. Cumprovas èn trais fasas da colonisaziun: da l'emprima fasa dal tbronztempr. (ca. 2000-1700/1600 a. C.) han ins scuvert numerusas foras da pals da simplas pallissadas cun fuainas (grondezza da las chamonas ca. 6,5 sin 4 m). Da la segunda fasa, prob. gia dal tbronzmes. (1700/1600-1500/1400 a. C.), dateschan

div. constr., p.p. massivas, da mirs sitgs, da las qualas ins na po dentant deducir clers plans orizzontals da chasas; dasperas han ins chattà pliras fuainas, in pitschen «tschaler» radund, parts d'in furn da vaschler e div. restanzas da fieus. En la terza fasa, medemamain dal tbronzmes. (1500/1400-1300 a. C.), han ins chattà tr. a. fastizs da fuainas, da suladas e d'in palantschieu da lain. Las exchavaziuns han plinavant purtà a la glisch chats da cheramica attribuids a l'uschen. Cultura interalpina dal tbronz (numnada pli baud Cultura da Crestaulta), en pli iseglia da bronz (farclas, maneras, stilets, guglias d'ornament), artefacts da crap e d'ossa, semenza carbonisada, restanzas dad ossa d'animals e da metal. L'appartegnientscha culturala e la situaziun topografica mussan parallelas cun las culegnas dal tbronz sin il Padnal (vischn. da Suagnign). A Cresta Petschna, che sa chatta 150 m davent da Crestaulta, han ins scuvert il 1947 in pitschen santeri cun almain indesch cremaziuns dal tbronz tempriv fin mesaun, exchavadas medemamain da Walo Burkart dal 1947-48. Tenor l'inventari dals chats (guglias da vestgadir, penderliezs, bratschlets) sa tracti da fossas da dunnas. Il santeri stat cun gronda probabilitad en connex cun la culegna da Crestaulta.

Litt: W. BURKART, *Crestaulta*, 1946; W. BURKART, «Die Grabstätten der Crestaulta Siedler», en: *US* 12 (1948), 5-9; W. BURKART, «Die bronzezeitl. Teilnekropole am Cresta petschna», en: *US* 13 (1949), 35-39.

Jürg Rageth

2. Vischnanca

En il tmtemp. era L. in bain imperial francon. Ils Gualsers e Bleniais immigrads en il tmtard. èn sa domiciliads o. t. da la vart dretga dal Glogn ed èn vegnids romanisads. Tr. lur hofs e L. devi savens dispitas pervi dals dretgs da giudida. Sco feud episc. era L. enturn il 1350 ina chastellania dals signurs da Belmont, suenter il 1371 da quels da Lumbrein, a partir dal 1390 dals Sax-Mesauc. A partir dal 1395 è L. doc. sco member dal cumin da Lumnezia. Il

1538 è vegnids cumprads or ils dretgs episc. La baselgia da S. Martin apparteneva a Pleif (S. Vintschegn); tr. il 1345 ed il 1452 è ella daventada ina plaiv autonoma. La baselgia paroch. odierna datescha dal 1646. L. è ina vischn. trad. purila, il dumber dals manaschis purils è dentant sa reducì fermamain dapi ils onns 1950. Ina megliuraziun generala è succedida suenter il 1975. A partir dal 1970 ha cumenzà a sa sviluppar in turissem moderà a L. Pop. rum.: 1990 95,5% l. p./98,5% l. p. e disc. La vischn. da L. è vegnida recepida en l'Inventari dals maletgs da vitgs svizzers degns da protecciun.

Litt: *Kdm GR* 4, 179–200; W. G. BÜCHI, *Oberlugnez*, 1972; D. BLUMENTHAL et al., *Kulturführer Val Lumnezia und Vals*, 2000, 164–80. *Adolf Collenberg*

Lumnezia (tud. Lugnez), vallada laterala pli gronda dal Rain Anterior, GR, distr. Surselva (fin 2000 Glogn). La L. cumpiglia l'intschess dal Glogn fin a sia sbuccada en la Val dal Rain Anterior. Las vischn. oradim la val, Riein, Pitasch e Luven, n'appartegnan dentant betg al circuit odiern da la L., mabain a quel da Sursaiassa. Era la vischn. tud. da Val S. Pieder na fa istoricamain betg part da la veglia dretgira da la L. Ca. 840 *Leugunutia*, *Leunizze*, *Leunicia*. Dal tbronze tempriv e mesaun datescha la culegna da Crestaulta a Surin/Lumbrein, l'inventari da chats da la quala lascha presumar ina cultura da purs e pasturs stabels. Per il tbronze tard. è cumprovada ina culegna a Vella, chats singuls èn doc. per Uors e Surcasti. Chats da munaidas romanas a Vella, Lumbrein e Degen. La baselgia da S. Vintschegn a Pleif/Vella, constr. prob. en il 6/7. tsch., è in exempel classic per ina baselgia da vallada. La gronda plaiv cumpigliava fin a l'entsch. dal 14. tsch. ultra da la L. er la Val S. Pieder. Val è daventà ina pravenda autonoma ca. 1300, Fraissen (oz Degen) ca. 1345. Il process da separaziun da las otras plaivs ha durà dal 16.–20. tsch. ed ha terminà cun Peiden il 1910. Sco su-

letta vischn. da la L. ha Duin introducì la reformaziun il 1526. Ils bains roials, menz. en l'Urbari dals bains imperiali, èn vegnids repartids gia en il 9. tsch. sin ina gronda part da vasals. Il signur feudal il pli impurtant era l'uestg da Cuir. En il 13/14. tsch. èsi reussì als baruns da Belmont d'unir plirs signuradis pitschens. Cun agid dals Lumnezians en els sa fatgs valair il 1352 en in cumbat cunter ils conts da Werdenberg-Sargans. Tenor ina ditga da la fin dal 18. tsch. duain las Lumnezianas avair decidì la faida a Porclas. Suenter la mort dal davos Belmont (1371) è la chastellania ida als baruns da Sax-Mesauc ch'engaschavan indigens sco subgovernatur. Il 1395 èn ils Lumnezians entrads cun ils medems dretgs sco ils signurs da Sax-Mesauc en la Lia da Glion, la precursura da la LG. Il 1467 han decretà ils Lumnezians ina lescha cunter immigrants esters che na sa drizzava betg sulettamain cunter ils Gualsers, mabain er cunter la gliend da Blegn che s'acquistava adina dapliras alps sin territori lumnezian. Il 1483 ha vendì Johann Peter da Sax-Mesauc ses possess en la L. a l'uestg da Cuir. Il 1538 è la L. sa cumprada liber da tut ils dretgs feudals episc. Ils dus cumins da Val e L. furmavan entaifer la LG la dretgira auta da L. La dretgira civila exercitava il mastral da Val resp. da la L. Il circuit da la L., stgaffì il 1851/54, correspunda territ. a la veglia dretgira auta. Polit. appartegna er Surcuolm, situà da la vart da Sursaiassa, da vegl ennà a la L.

En la seg. mes. dal 17. tsch. ha la L. già ina fluriziun sin il champ da la litteratura rel. ed ina gronda activitad en il sector da constr. (baselgias). La part rum. da la L. apparteneva da vegl ennà a la zona interalpina cun in'economia autarca. Grond'emigraziun en ils Stadis unids da l'America e la Frantscha en la seg. mes. dal 19. tsch. Mesiras da raziunalisaziun suenter la Segunda guerra mundiala han provocà ina reducciun considerabla dals manaschis purils. La grond'emigraziun ha pudì vegnir franada pir cun l'entsch. dal svi-

lup turistic. Dapi ils onns 1870 è la L. vegnida averta successivamain tras la constr. da vias a partir da Glion ch'è sa sviluppa qua tras al lieu da transtgardiada il pli impurtant per la vallada. Dapi la mes. dal 19. tsch. cumenzà a sa sviluppar in turisssem en la L. (o.t. manaschi da cura a Peiden e Val). Dapi ca. 1900 offran ils lieus da cura prosperants dal GR a la pop. da L. pussaivladads da lavurar durant il mais d'enviern. Tras la votaziun dal pievel dal 1988 è Val daventà sper Vella, Lumbrein ed Uors il quart lieu da cumin dal circol.

Litt: *Kdm GR* 4, 2-8, 143; R. PROJER, «Das L.», en: *JHGG* 115 (1986), 177-84; D. CAPPAUL et al., *Lumnezia und Valsertal*, 1988; D. BLUMENTHAL et al., *Kulturführer Val Lumnezia und Vals*, 2000. *Duri Blumenthal*

Luorscha (tal. Olivone), vischn. da la Val dal Blegn, TI. L. s'acuista da la fam. aristocrata indigena de Torre tr. il 1193 ed il 1343 numerusas alps al sid dal Pass dal Lucmagn. Il 1255 han ils purs da L. empruvà da prender possess da las alps claustrales Sassedo, Aranasc e Froda. Il 1371 ha la claustra da Mustér impegnà t.a. er a L. pastgiras d'alp da la vart grischuna dal Cuolm da S. Maria (Lucmagn). Dal tmtard. fin la fin dal 1900 han L. ed Aquila er possedi ed utilisà alps en la regiun da la Greina e da Vrin ed han giugà ina rolla impurtanta en la culturaziun da quest territ. Il 1606 ha l'avat Jakob Bundi ordinà ch'ins dettia a las autoritads da L. per il pelegrinadi dals 15 d'avust a la chaplutta da Nossadunna sin il Cuolm da S. Maria in gentar ed als ulteriurs pelegrins in bun vin; quest'obligaziun è sa mantegnida fin oz. Persuenter astga l'ustier da l'ospizi da S. Maria ir per laina d'arder en ils guauds vischins da L. Da L. deriva l'avat Columban Sozzi (1764-85) ch'ha manà la scola claustrala da Mustér ad ina nova fluriziun. L. è possessura da l'ospizi da Casatscha al pe dal Cuolm da S. Maria.

Litt: G. BOLLA, *La storia di Olivone*, 1931; BUNDI, *Besiedlung*, 311s.; I. MÜLLER, *Geschichte der Abtei Disentis*, 1971.

Adolf Collenberg

Luven, vischn. pol. GR, circ. Glion, distr. Surselva (fin 2000 Glogn), situada sin la spunda ost dal Piz Mundaun. 765 *Lobene* (fin 1943 tud. Luvis). 1850 297 abit.; 1990 127; 2000 183. Chats preist. en la Val Pilac: dus sarcofags dal tLatène (fibla en furma d'in chau d'uman, anè a spirala). L'onn 765 èn doc. vignas sut L. Tenor l'Urbari carolingic dals bains imperials aveva L. enturn il 840 in prer ed era damai ina plaiv. Quella è dentant vegnida annexada pli tard a S. Martin a Glion. La ruina da Castelberg (er Casti da Gatg), en possess da la fam. cun il medem num, sa chatta sut la via en Lumnezia. Tenor l'index da las entradas episc. dal 1290/98 e tenor l'Anniversari da L. existivan en il tm. 12 bains exteriurs (*colonias*), ils pli impurtants tr. quels eran Maséras e Tschuppina (oz mises). Il 1488 han ins inizià la separaziun da la baselgia da S. Steffan e Flurin a Glion; la separaziun e la conversiun a la cardientscha ref. èn succedidas il 1526. Il 1760 ha in incendi destrui bunamain l'entir vitg. A la sava dal 18/19. tsch. èn emigrads blers abitants da L. en pajais europeics ed en l'America. L'onn 2000 pratitgavan anc blers da L. l'agricultura e l'allevament da muvel. Grazia a l'arrundaziun dal fons, decidida il 1979, ed a la megliuraziun da las alps han ils manaschis purils bunas perspectivas. Ina part dals abitants da la vischn. rum. (1990 73% l.p./80% l.p. u disc.) lavura sco pendularis a Glion (industria, mastergnanza).

Litt: *Kdm GR* 4, 85ss.; *Nies L.*, 1980.

Martin Bundi

Luzein, vischn. pol. GR, circ. Luzein, distr. Partenz/Tavau (fin 2000 Landquart Sura). Abitadi sparpaglià da la vart dretga dal Partenz, cun las frac. da Fagieu, L., Pany e Putz (dapi la fusiun dal 1892). 1185 *Luzene*. 1850 954 abit.; 1900 841; 1950 1'127; 1990 1'059; 2000 1'110. Chats da munaidas romanas sper las ruinas dal chastè da Stadion. Ils possess dal chapitelatedral da Cuira, doc. en il 12. tsch., èn passads en il 13. tsch. als baruns da Vaz ed

èn vegnids regalads da quels a la claustra da S. Giachen a Claustra. En il 13. tsch. ha cumenzà ina culturaziun intensiva dal pajais, promovida dals premonstratens da Curvalda e da Claustra. La ruina da Castels a Putz è stada dal 12. tsch. fin il 1649 la sedia da la fam. nobla cun dretgs da domini. Il 1436 è L. entrà en la LDD sco part da la dretgira da Castels. Il 1622 separaziun da la dretgira auta en ils cumins da Castels-L. e Castels-Gianatsch. La baselgia da L., doc. il 1222 sco possess da la claustra da Curvalda (patrocini da S. Flurin), ha appartegnì fin a la reformaziun (enturn il 1535) a la pravenda da Gianatsch (fin oz Fagieu). 1487 constr. da la baselgia nova. Fin il 1950 o. t. allevament da muvel e cultivaziun dals ers per l'agen provediment. Fin oz ferma posiziun da l'agricultura, organisada en corporaziuns. Dal 15. tsch. fin a l'entsch. dal 16. tsch. germanisaziun progressiva tras influenza gualsra. Pliras chasas signurilas a L. dal 17/18. tsch. (fam. Sprecher von Bernegg). 1895–99 constr. da la via a S. Antònia, schlargiament 1971–87. Svilup turistic e gronda activitad en il sectur da constr. cun in svilup da l'industria da constr. e da laina. Il 1990 era la mes. dals abitants cun activitad da gudogn a L. pendularis. Litt. *Kdm GR 2*, 100–08; *Gem. GR 82* (1984); M. THÖNY, *Prättigauer Geschichte*, 1991. *Otto Clavuot*

Madesimo, (1560 m), fracz. da la vischn. d'Isolato en la Val San Giachen/I. Ca. 500 abitants. Il num deriva prob. da lat. *amatissimus*, v. d. in lieu fitg amabel. Emprima impurtanza istorica 1226, cur che la vischn. da Clavenna ha laschà constr. ina via da Campodolcino sur M. en la Val Niemet, al nord dal sparta-auas, nua che Clavenna aveva fittà alps. Questa via da traia bratscha, charrabla cun benagls, para d'avair manà sur Fontana, Piano del Lanzo e Scalcoggia; el serviva temporamain er a sviar la ruta dal Spleia cun cuntinuaziun a San Rocco-Teggiate-Stuetta. Il 1668 ca. 100 fam. cun 571 personas. Dapi il 16. tsch. existiva in modest

bogn termal a M. Dal 1888–1905 ha il poet tal. Giosuè Carducci fatg regularmain vacanzas da stad a M. L'utilisaziun ed occupaziun agricula ed alpestra oriund. extendida è svanida entant quasi dal tuttafatg en favur dal turissem.

Litt: M. GIANASSO, *Guida turistica*, 1979, 379–80. *Martin Bundi*

Madris, val laterala, aclaun e territ. d'alp da la vischn. pol. e dal cirq. d'Avras sco er da la vischn. da Suogl en il cirq. da la Bergiaglia. Vischinadi dal cumin d'Avras. 1368 *de Madrixio*. 2002 11 abit. a Stettli e Højahus. La part dadens da la val è vegnida colonisada en il 14. tsch. nà da Clavenna e Plür (Vuclina) sur il Pass da Läggh. Ils onns 1372 e 1412 è ella vegnida vendida a Suogl ch'ha chargià las alps da M. sur il Pass da Prasgnola fin viaden en il 20. tsch. La part dadora da la val è vegnida colonisada da Rumantschs, a partir dal 13/14. tsch. da Gualsers. Fin a la constr. da la via en la Val Schons e da Cröt a Stettli il 1890–95 s'orientava M. sur ils pass vers il sid. 2002 dus bains purils.

Litt: J.R. STOFFEL, *Das Hochtal Avers*, 1938; H. WEBER, *Das Avers*, 1985. *Jürg Simonett*

Madrisa, d'ina vart object d'ina ditga d'alp, da l'autra vart toponim en il territ. retic. La ditga da M. sa splega sin ina muntogna sur Saas en il Partenz. M. è en quella ina diala buntadaivla che gida sco bella matta selvadia in giuven pur a tgirar la muaglia; las ervas e raggischs ch'ella dat a la biestga rendan quella pli bella ed augmentan il provediment da latg, paintg e chaschiel. Questa abundanza chatta ina fin, suenter ch'il bab dal giuven arriva e vesa la matta. Quela po far ses buns servetschs mo uscheditg che nagin na revelescha sia identitad e sto ussa ir davent e sa retrair en ils deserts da la gripa. En questa ditga, ch'ha ina tscherta parantella cun la ditga da la S. Margriata al Pass dal Cunclas, simbolisescha la matta selvadia ina deessa da la fritgavladad. En il cumià da l'alp en consequenza da la

scuverta dal secret d'ina relaziun da dus sa reflectescha la brama d'in temp pli bel pers. – Il num M. po vegnir deducì da lat. MATER, 'mamma' e declerà sco gnom u deessa da la fritgaivladad. El exista sco toponim *M.*, *Madrishorn*, *Madrisspitze* e *Madrissella* en l'intschess da Saas e dal Montafun, sco *Madrischtal* e *-pass* en la Val d'Avras, sco *Madrismo* a Grosio en Vuclina, medemamain sco *Madrismo* mintgamai per in aclaun en las vischn. da Fagogna e Varmo (en vischin. dad Udine) e sco *Madrissana* a Moreto en il Friaul. La derasaziun dal num dal Montafun sur il GR, la Vuclina ed il Friaul fa allusiun ad in tschertgel cultural retic ed ad in vegl territ. rumantsch oriund. coerent. Litt: D. JECKLIN, *Volkstümliches aus Graubünden*, 1916, 54; RN II, 740. *Martin Bundi*

Madulain, vischn. pol. GR, cirq. Engiadin'Ota, distr. Malögia, la pli pitschna da las indesch vischn. da l'Engiadin'Ota. Vitg aglomerà situà sin l'684 m a la riva da l'En sin in cugn da bova furmà da l'Ova d'Escha. 1137/39 *Madulene*. 1806 93 abit.; 1980 94; 1990 120; 2000 180. Il 1979 han ins scuvert ina deponia da vigliaunas dal tertiari. Sin in grip sur il vitg sa chatta la ruina da la fortezza da Guardaval, constr. il 1251 da l'uv. Volkart da Cuira. Il 1377 era la fortezza in feud da la fam. Planta; ella n'è mai stada abitada ed è vegnida abandonada en il 15. tsch. Il 1543 è M. sa separà pol. da Zuoz ed è daventà in vischin. autonom. Il 1370 empr. menz. d'ina baselgia a M. Al cunfin cun la vischn. da Zuoz sa chatta la chaplutta bandunada da S. Baltramieu. 1510 constr. da la baselgia dal vitg en stil gotic tardiv. 1554 refurmaziun. 1906 constr. d'ina ovra electrica ed a partir dal 1970 da numerusas abitaziuns secundaras. Scolas a Zuoz. A M. vegn discurrì rum., tud. e tal. 28% da la pop. cun activitad da gudogn lavurava il 1990 en il 1., 46% en il 2. e 26% en il 3. sectur. Litt: *Kdm GR* 3, 339–343; A. C. ZÜRCHER, *Urgeschichtl. Fundstellen Graubündens*, 1982, 50. *Constant Wieser*

Maiavilla (signuradi). Il Signuradi da M., numnà er mo Signuradi (tud. Bündner Herrschaft), è in ant. signuradi cuminaivel da las Trais Lias. La regiun commercialisada ozendi turisticamain cumpiglia la cittadina da M. e las vischn. da Fläsch, Malans e Gianin. En il 13. tsch. han ils baruns da Vaz nominà in podestat e prefigurà qua tras la dretgira da M. posteriura. Tras acquisti e transferiments da dretgs giudizials è il signuradi superiur da M. sa sviluppà successivamain en il tmtard. a dus signuradis inferiurs: M.-Fläsch dad ina vart e Neu Aspermont cun Malans e Gianin da l'autra. La giurisdicziun criminala sur domaduas dretgiras avevan ils signurs da M. ch'administravan adina era la dretgira civila da M. e Fläsch. A quests signurs appartegnevan ils Aspermont, 1342–55 ils Meier von Wildegg, 1355–1436 ils Toggenburg, 1437–1509 ils Brandis-Aarburg. Il 1436 è il Signuradi da M. entrà en la LDD. Il 1475 han ils signurs da Brandis fatg per sasezs ed il Signuradi in'allianza cun l'uv. da Cuira e cun la LCD, il 1499 han els cumbattì da la vart dals Austriacs ch'han per la guerra ed han stuì vender il signuradi per mancanza da daners. L'imp. Maximilian I s'interessava per quel, el ha dentant renunzià pervi da las irritaziuns chaschunadas qua tras en il GR. Uschia è il Signuradi ì il 1509 tras cumpra a las Trais Lias. Il 1510 ha Maximilian conferì a quellas il dretg da giuditgar sur vita e mort. Las dretgiras civilas da M.-Fläsch e da Neu Aspermont èn restadas – sco er l'aderenza a la LDD. La glied dal Signuradi è daventada qua tras signurs e subdits da sasezs. In podestat, staziunà sin il chastè da Brandis, represchentava ils interess suverans da las Trais Lias. El vegniva tschernì mintga dus onns d'ina proposta da trais fatga da la Lia autorisada tenor roda, na dastgava però betg esser burgais dal Signuradi avant il 1533. La podestataria è vegnida affittada per tscherts temps. La dretgira auta sa cumponeva da 21 cussegliers e derschaders e da giurads dals cumins e sa radunava sut il presidi dal chastellan

resp. dal podestat da M. Quel exercitava cun dus derschaders er la dretgira d'appellaziun en cas civils. Ils dus cumins possedeavan, inusitadamain, ina dretgira matrimoniala cuminaivla. La dretgira bassa a Malans-Gianin han mantegnì l'emprim ils signurs da Neu Aspermont, q. v. d. ils Schlandersberg, a partir dal 1523 ils Beroldingen ed a partir dal 1526 ils Marmels. Il 1536 è ella vegnida cumprada ora da las Trais Lias e Gianin ha acquistà il chastè da Neu Aspermont. Il 1803 è sa constituì il Signuradi da M. sco dretgira auta suverana dal chantun GR cun quatter vischn. pol. Dal 1851 fin il 2000 ha il Signuradi da M. constituì in circul dal distr. da Landquart Sut, dapi il 2001 dal distr. da Landquart.

Litt: P. GILLARDON, *Zehngerichtenbund*; Schwarz, *Gerichtsorganisation*, 128-32; P. DONATSCH, *Malans*, 1981², 83-110.

Adolf Collenberg

Maiavilla, vischn. pol. GR, cirq. Maiavilla, distr. Landquart dapi il 2001 (avant Landquart Sut). La cittadina da M. sa cumpona da M., Rofels e Bovel. Las duas davosas han appartegnì fin il 1633 a la vischn. gualsra da Berg. 4. tsch. *Magia*, ca. 840 *Lupinis*, 10.-13. tsch. *Lupinum e Magenze*, 1295 *Maienfeld*. 1850 1'232 abit.; 1900 1'240; 1950 1'568; 1990 1'990; 2000 2'368. La chapitala dal cirq. M. sa chatta a las vias istoricas d'armada e transit da la Val dal Rain. Chats preist. han ins fatg sin il Pass da S. Gliezi, ina staziun rom. erigida en ils onns 364-366, evtl. in abitadi rom., sa chattan a la via romana. La cittadina odiera da M. sa chatta al sid dal chastè da Salenegg (menz. il 950) ch'ha prob. suandà ina curt roiala doc. enturn l'onn 840; questa curt è ida da quel temp a l'uv. da Cuira, ens. cun il servs e la navetta dal Rain. Dal 950-1158 regevan ils conts da Briganza sin il chastè da Brandis ch'els avevan prob. laschè construir sezs tr. il 925 ed il 950. Il 1079 è il chastè, l'ensaina da M., vegnì destruì dal retg Heinrich IV en ina dispita d'investitura. Il dretg da citad, doc. il 1434, existiva prob. a partir

dal 14. tsch., ma i n'èn sa furmadas ni in'organisaziun municipale ni corporaziuns. Il 1346 vegn M. numnà per l'empr. giada sco citad. Il dretg da martgà na possedeava dentant betg M., mabain Malans. Sut la giurisdicziun dal Signuradi da M. era M. il 1436 member da la LDD. Il 1438 ha la communitad fatg in contract da citad cun Brandis ed extendì ils dretgs giudizials civils analog a Malans e Gianin. Il cussegl da citad vegn menz. per l'empr. giada il 1437. La chasa-cumin istorica è dapi il 1447 lieu da reuniun da la vischn. Il 1510 vegn menz. per l'empr. giada ina chasa da scola. Il pli vegl sigil da la citad datescha dal 1610. En il 14. e 15. tsch. è sa furmadas sin territ. da M. ils abitadis gualsers «im Berg» cun dretgs particulars ed autonomia admin. Fin viaden en il 17. tsch. èn quels Gualsers restads senza dretg da burgais da la citad. A l'entsch. dal 16. tsch. è M. vegnì germanisà d'Alemans dal nord e da Gualsers. Enturn l'onn 840 vegn menz. ina baselgia roiala priv. sco part da la curt Lupinis, il 1105 il patrocini da S. Amandus. La baselgia oriund. affiliada a S. Gliezi sur il Gaud da Mars (Steig) è daventada suenter il 1450 ina baselgia paroch. da la citad da M. ed è doc. il 1529 sco ref. L'antieriura claustra da Tut ils sontgs - oz en possess privat - era en il 13. tsch. en possess da la claustra da Curvalda ed è ida il 1479 a la claustra da Faveras. Il 1658 è vegnida cumprada ora las dieschmas. Il 1509 han las Trais Lias cumprà il Signuradi da M. che possedeava fin il 1803 in status dubel. Alura è M. daventada ina vischn. suverana da la dretgira auta, a partir dal 1851 dal circuit da M. 1601 separaziun da gaud e pastgira cun Fläsch; 1610 rectificaziun dals cunfins cun Gianin. M. era a partir dal tmtard. in lieu da duana, a partir dal 1504 existiva in duair da transtgargiada per bains commercials per Cuira, damai che M. possedeava il monopol da transport. La punt d'enviern sur il Rain libra da dazi è vegnida abandonada suenter il 1575 ens. cun la navetta da persunas en favur da la punt da Tardis. Suenter il 1851

vegniva il dazi, abolì il 1858, incassà sin il Pass da S. Gliezi. Il medem onn ha M. survegnì ina colliaziun da viafier. Il 1861 è sa domiciliada a M. ina suernaria che n'exista oz betg pli. Dapi il 1885 collia ina punt M. directamain cun Ragaz. La chasa da commerzi e da dazi sin la piazza da la posta è vegnida demolida il 1911. Gist daspera stevan pli baud il tigl da dretgira ed ina susta. L'economia da M. vegn dominada da l'agricultura (viticultura) e da l'hotelaria. Ultra da quai è la vischn. in center istoric d'allevament da chavals e da commerzi da muvel; il 1897 vivevan a M. 145 possessurs da muvel grond, il 1980 anc 25. Megliuraziun da las alps 1961-64. Il Steighof è in'enclava da M. a Fläsch. Il 1981 è vegnida erigida la chasa d'attempads dal Signuradi, il 1991 il restaurant d'autostrada Heidiland. M., che ha promovì ils davos onns la domiciliaziun d'industria, ha in center da scola cirq. ed ina structura da professiuns, d'economia e da populaziun bain equilibrada. Sedia da la Scola interchant. da selviculturs (Center da furmaziun Gaud M.).

Litt: *Kdm GR* 2, 11-14, 32-38; J. FULDA, *Zur Entstehung der Stadtverfassung von M.*, diss. Turitg, 1972; P. MEINHERZ, *M.*, 1980; J. SCHWARZ, *M. einst und jetzt*, 1982.

Adolf Collenberg

Maira (tal. Mera), flum da la Bergiaglia che nascha en la Val Maroz. La M. curra en direziun sidvest fin a Clavenna e sbucca lura al sid en il Lai di Mezzola ed en il Lai da Com. Al sid da Casaccia ed a Villa di Chiavenna vegn stagnà il flum per gudagnar energia electrica. En il Piano di Chiavenna è la M. arginada cumpletamain dapi l'entsch. dal 20. tsch. Il Luvèr che sbucca a Castasegna da la vart dretga en la M. (12. tsch. *aqua de Louuro*), ha adina furmà il cunfin tr. las diocesas da Cuira e da Com e furma oz er il cunfin naziunal tr. la Svizra e l'Italia.

Litt: R. STAMPA, *Storia della Bregaglia*, 1974.

Martin Bundi

Maladers, vischn. pol. GR, cirq. Scanvetg, distr. Plessur. Vitg accumulà a

l'entrada dal Scanvetg cun ils aclauns Sax e Brandacker. 1156 *de Maladru*. 1803 120 abit.; 1850 253; 1900 341; 1950 448; 1990 502; 2000 506. Abitadi pre- e protoistoric sin la collina Tumi. Intscherta è l'attribuziun da la baselgia da S. Sievi, menz. il 841; la baselgia da S. Desideri datescha dal 1150. Ina majaria dal chapitelatedral da Cuira vegn menz. en il 12. tsch.; administraturs eran prob. ils signurs da M. Las claustras da S. Nicolai/Cuira, S. Gliezi/Cuira e Curvalda possedevan qua terren. La dretgira da prefectura da Cuira ha exercità la giurisdicziun auta fin en il tm-tard. A partir dal 1487 èn doc. plevons a M. 1635 refurmaziun. La lingua rum. è svanida il 1570 a M. Intschert è il passagi da la sfera d'influenza da Cuira al cumin da S. Peider. Il 1652 èn vegnids cumprads or ils dretgs feudals austr., il 1657 ils dretgs da feud episc. Tras las naturalisaziuns sfurzadas dal 1850 è sa furmada ina plaiv cat. ch'ha erigì il 1923 ina chaplutta. 1875-77 constr. dal stradun sut il vitg. M. è oz ina vischn. d'aglomeraziun da Cuira.

Litt: *Kdm GR*, 198-201; F. PIETH, «Aus der Gesch. des Tales Schanfigg», en: *JHGG* 81 (1951), 97-125; *Maiensassinventar GR.*, quad. 16 Schanfigg, 1999. Jürg Simonett

Malans, vischn. pol. GR, cirq. Maiavilla, distr. Landquart (avant il 2001 Landquart Sut). Lieu princ. dal district cun ina fatscha dal vitg sut protecciun. M. sa chatta a las rutas da transit istoricas da la Val dal Rain e furmava il punct da partenza da las ant. vias impurtantas tras la Clus e sur il Crap Fadera en il Partenz. 9. tsch. *Mellanze*, 956 *Malanz*. 1850 912 abit.; 1880 838; 1910 1'107; 1950 1'345; 1990 1'422; 2000 1'908. Al Ruchenberg sa chatta in abitadi dal tbronz. Dal tmtemp. era M. ina regiun da colonisaziun e cultivaziun dal terren ed in center da la viticoltura; il 956 ha il retg Otto I regalà a l'uv. da Cuira vignas a M. En il tmaut apparteneva M. al domini roial dal chastè da Wynegg, a partir dal 1437 ens. cun Gianin a la dretgira civila da Neu Aspermont. Dal 1400-1600 è M. vegnì ger-

manisà o.t. tras l'immigraziun d'Alemans dal nord. En il 14/15. tsch. èn sa furmadas las corporaziuns pol., tr. a. in cussegl elegibel libramain. A partir dal 1509 era M. member da la dretgira auta da Maiavilla. Dominà fin viaden en il 19. tsch. d'aristocrats ha M. pretendì il 1798 sco emprima vischn. dal Grischun l'adesiun a la Republica helvetica. Il medem onn èn vegnidas edidas a M. las gasettas prohelveticas *Der Rhät. Staatsbothe* e *Der Merkur Hohen-Rhätens*. Il 1803 è la vischn. daventada autonoma. La baselgia da S. Cassian, menz. per l'empr. giada enturn il 1150, era en possess da l'uv. da Cuira a partir dal 1209; la pli veglia da las quatter baselgias constr. pli baud datescha dal 6. tsch. Il 1525-26 è M. convertida sco ina da las emprimas vischn. grischunas a la cretta ref. Il 1275 èn doc. chalgers, il 1287 la cultivaziun da virtit, il 1393 miradurs. M. era in impurtant lieu da transtgargiada a la ruta commerz. nord-sid e possedeve il dretg da martgà emnil (doc. en il 17. tsch.), nua ch'ìls Partenzers faschevan lur cumpras. 1840 constr. dal sviament a Landquart, 1859 da la viafier da la Val dal Rain, quai ch'ha manà il 1864 a la liquidaziun dal martgà. La filantaria e tessaria, constr. il 1861, n'ha betg pudì sa mantegnair. Dal 1613-1835 era M. en possess da la punt da Tardis. L'industria ed il commerzi èn oz pauc sviluppads (zona industrialia Karlihof), la viticultura predominescha. Litt: *Kdm GR 2*, 38-56; *Gem. GR 86* (1984); R. DONATSCH, *M. in der Bündner Herrschaft*, 1981². *Adolf Collenberg*

Malix, vischn. pol. GR, cirq. Curvalda, distr. Plessur. La vischn. cumpiglia il vitg aglomerà a l'entrada da la Val Curvalda e las fracziuns Kreuz e Spina. 1149 in *Umbilico*. 1623 ca. 375 abit.; 1850 426; 1900 340; 1950 450; 1990 618; 2000 663. M. era in vegl territori da colonisaziun dal contadi da dieschma episc., possess da la curt da S. Gliezi a Cuira e - doc. l'empr. giada il 1208 - da la claustra da Curvalda. Il chastè da Strassberg (duana) a la ruta dal Set datescha da la 2. mes. dal 12. tsch. Il 1268

cumpara M. sco vischin. cun agens giuraders. Sco possessurs dal signuradi da Strassberg vegnan numnads il 1275 il da Vaz, suenter il 1338 ils da Toggenburg, Montfort e Matsch. La dretgira da Curvalda, sortida dal signuradi, è s'associada il 1436 a la LDD. Il 1649 èn vegnids cumprads ora ils dretgs austr. existents dapi il 1466. Il 1231 vegn menz. per l'empr. giada in plevon a M., il 1307 ina pravenda, il 1508 la baselgia da S. Gagl. M. è daventà reformà il 1526. Enturn il 1570 era M. anc rum. Ils abitants vivevan da l'agricultura e da l'allevament da muvel sco era dal traffic da transit. 1834-40 constr. dal stradun. Il territ. d'aclas a Brambrüesch è vegnì explotà pli e pli turisticamain en la 2. mes. dal 20. tsch. (zonas da chasas da vacanzas, pendiculara davent da Cuira dapi il 1957, regiun da skis). Il 1990 lavuravan 50% en il 3. ed anc 16% en il 1. sector. M. fa part oz da l'aglomeraziun da Cuira (1990 73 pendularis dal lieu).

Litt: *Kdm GR 2*, 228-24; *Gem. GR 73* (1985). *Jürg Simonett*

Malögia, fracziun da la vischn. pol. da Stampa e district. La fracziun da M. è situada sin 1815 m sisum l'Engiadin'Ota al Pass dal M. e cumpiglia ils ant. abitadis da stad dals purs da Stampa M., Isola, Capolago, Pila ed Orden. 1244 *Malongum*, 1275 *Malodia*. A partir dal 15. tsch. è M. vegnì avert davent da Stampa. L'Hotel Kulm, che serviva er da staziun da posta, ha existì fin il 1880. Il cont beltg Camille de Renesse ha fatg dal lieu in center da vacanzas per l'aristocrazia europeica: dal 1882-84 èn vegnids erigids il Maloja Palace (Maloja Kursaal), da quel temp l'hotel apparentamain il pli luxurius da l'Europa, in hotel da lain (oz Schweizerhaus), ina baselgia cat. ed il chastè da famiglia (nunfinì) Belvédère. Enturn il 1900 prosperava M. Las duas guerras mundialas han alura decidì la sort da M. sco lieu da cura per la noblezza, ma betg sco destinaziun turistica cun 1882-1900 16'594 passagiers da posta sin la ruta dal Malögia, 1930-52 218'884. Las

attraccins dal lieu èn ils lais autalpins, il reservat natiral e la pli gronda cumula-ziun da mulins da glatscher en l'Europa. M. ha in'atgna scola primara. Il distr. da M., creà il 1851, cumpiglia ils circuits Bergiaglia ed Engiadin'Ota fin a la Punt Ota var 5 km sur Zernez.

Litt: H. BRUNNER et al., *Führer durch das Gletschermühlen-Reservat M. und seine Umgebung*, 1956; R. STAMPA, *Storia della Bregaglia*, 1974; B. LANGER, «M. - Stätte der Maler und Sucher», en *BJb*, 1982, 32-43.

Adolf Collenberg

Mantogna (tud. Heinzenberg), chastè e signuradi, cumin, part dal distr. da la M. 1851-2000, dapi lura dal distr. da Valragn. La M. sa chatta sin la spunda sanestra dal Rain Posterior tr. la Viamala e la stretga da la val a Giuvaulta. Ella cumpiglia las vischn. da Cazas e Tusaun constr. lung la via en il funs da la val, ils vitgs a mantun da Masagn e Tartar en la part sut da la M., Preaz, Sarn e Portagn en la part dador, Flearda ed Urmagn e l'abitadi sparpaglia da Tschuepogna en la part dadens da la M. 1380 *ze Haintzenberg*. En il circol da Tusaun 1803 2'484 abit.; 1850 3'109; 1900 3'181; 1950 4'400; 1990 5'429; 2000 5'571. Chats d'abitadis dal tneol. o. t. en la regiun da Cazas. La via da transit rom. gieva prob. lung la M. en la Viamala. En l'Urbari curretic (ca. 850) cumpara la M. sco part dal *Ministerium Tumiliasca*. La claustra da canonissas a Cazas cun ses tschintg bains gronds è daventada a partir dal 12. tsch. la possessura da terren la pli impurtanta da la M. En il 14. tsch. han Guaisers colonisà la regiun da Tschappina. Il chastè da Heinzenberg a Preaz, costruì enturn il 1200, ha dà il num tud. a la vart sanestra da la val. El serviva als baruns da Vaz da sedia signurila. Als da Vaz èn succedids il 1338 ils conts da Werdenberg-Sargans, il 1383 ils baruns da Razén, il 1459 puspè ils da Werdenberg, il 1475 l'uv. da Cuira. En il 14. tsch. elegiva il signur territorial il mastral per il cumin da la M. (Flearda, Portagn, Preaz, Sarn, Urmagn), Tusaun (vischin. da Tusaun, Cazas, Masagn, Tartar) e Tschuepogna

d'ina proposta da trais. A partir dal 1475 aveva il prefect episc. a Farschno il presidi en fatgs criminals. Purtagn era il center d'ina cuminanza da purs libers che possedeavan la giurisdicziun civila, ch'èn dentant vegnids integrads pli tard en il cumin da la M. Il 1709 ha la M. cumprà ora ils dretgs feudals episc. En la LG furmavan las trais dretgiras ensemen cun la Stussavgia la dretgira criminala da Tusaun. Eccles. appartegneva la M. a S. Gion/Reziolta. Il 1505 serviva la baselgia da S. Gagl a Purtagn sco baselgia parochiala per l'entira regiun. A partir dal 1525 han tut las vischn., cun excepziun da Cazas ed ina minoritad a Tartar, adoptà la cretta ref. Dal schlargiament da la via tras la Viamala il 1473 han profità Tusaun, Cazas e Masagn. A partir dal 18. tsch. è la regiun dal torrent Anugl vegnida devastada savens da bovas. Suentèr il 1800 han ins gudagnà terren agricul en la planira da la val. Il stradun nov, constr. il 1818-23, ha augmentà fermamain il traffic da transit. Avertura da lingia da la VR fin a Tusaun 1896, constr. da vias sin la Mantogna 1893-1904. Il 2002 predominavan en la part sura da la M. l'agricultura da muntogna ed il turissem, a Cazas ed en il center regional da Tusaun il commerzi ed il mastergn.

Litt: CLAVADETSCHER/MEYER, *Burgenbuch GR*, 154-56; E. CAMENISCH, «Das Ringen der Gerichtsgem. H., Thuisis und Tschappina um ihre polit. Unabhängigkeit 1475-1709», en: *BM*, 1948, 257-77; L. SCHMID, *Graubünden*, 1971, 94s. Jürg Simonett

Marcau, cultiras en las vischn. da Flem, Lags, Glion, Farschno ed Andeer. Il num figurescha per lung anteriuras vias impurtantas da transit e da commerzi e signifitga 'lieu da martgà'. A Lags era la prada sut la ruina dal chastè da Lagenberg il lieu da martgà. Enturn il 1300 aveva lieu qua durant trais dis il martgà da S. Gagl (16 d'oct.), al qual eran preschents tr. a. er martgadants da Ligiaun. I deva dazis sin sal, vin ed atschal, taila da launa, paintg e chaschiel. Ils visitaders stevan durant nov dis sut protecciun dals signurs da Habsburg. - Da

quel temp pudess er il M. a Flem esser stà in lieu da martgà. En vischinanza da quest prà al sidvest da Flem-vitg sa chattava er la baselgetta da S.Sbetta (Elisabetta) dal tm. Quà passava la via surs. sur Flem – Casa d'ual Sut e Staderas a Lags, suenter che ses trassé a l'ur da la chavorgia dal Rain (Trin-Pintrun-Conn-Tuora-Sagoggn) ha cumenzà a perder sia impurtanza. – Il lieu *Markaw* a Farschno, enconuschent dal 14. tsch., era ina champagna davant il portal da la culegna fortifitgada en il tm.

Litt: A. MAISSEN (red.), *Laax, ina vischinanza grischuna*, 1978; J. C. MUOTH, *Zwei sog. Aemterbücher des Bistums Chur*, 1897, 41.

Martin Bundi

Mariamunt, claustra benedictina en la vischn. da Damal (Vnuost/I), situada sin 1333 m sin la spunda al sidvest da Barbusch. Chiampel 1573: *Chia d'Munt*. M. è la claustra successiva d'in convent fundà enturn il 1100 a Scuol en l'Engiadina Bassa e dischlocchè il 1146 da Ulrich da Tarasp l'emprim a S. Stefan (ca. 500 m al sid da M.). Quatter onns pli tard ha quel occupà in nov edifizis al lieu actual. Ils 11-3-1150 èn doc. per l'emprima giada l'avat ed il convent, ina cuminanza convocada p. p. dad Otobeuren en Svevia. Muntgs da lingua tud. han fundà il 1201 sur l'areal da l'emprima baselgia ina basilica rom. La giuvna claustra ha furmà ditg ina insla germana en il Vnuost rum. Ella ha promovì en il tm. la colonisaziun e cultivaziun dal terren en ses conturn. En la Guerra da purs dal 1525 è vegnida spogliada la claustra da M. ch'ha patì fermamain er sut la refurmaziun en il 16. tsch. L'avat Matthias Lang (1605-40) ha laschè restaurar l'edifizis en stil baroc, ha reactivà la cuminanza claustrala, supprimì il moviment ref. en il Vnuost e germanisà sistematicamain il conturn. Il 1808 ha la regenza bavaraisa liquidà M., il 1816 puspè reactivà. Muntgs da la claustra han instrui tr. il 1724 ed il 1928 al gimnasi da Meraun; dapi il 1946 maina M. in gimnasi privat. Las plaivs da Barbusch, Schlingia e Platt, incorporadas en la claustra, ve-

gnan pastoradas da muntgs. Dapi il 1931 appartegna M. a la congregaziun benedictina svizra.

Litt: J. MÜLLER, «Die Anfänge des Klosters in Schuls-M.», en: *Studien und Mitt. des Benediktiner-Ordens*, 1978, 597-630; *HS III/1*, 856-71.

Martin Bundi

Marschlins, in dals paucs chastels circundads dad aua en il GR. El è situà al nordost dad Eigias al pe da la spunda dretga da la Val dal Rain. Davant l'edifizis quadrangular cun sias trais turs flancantas ed ina tur principala cun ina surconstrucziun surpendenta sa chattan div. sistems da foss. Il complex è vegnì constr. en la mes. dal 13. tsch. sco feud da l'uv. da Cuir; edifizis pli vegls dal 11. e 12. tsch. èn probabels, ma betg doc. Il 1337 è la fortezza ida sco feud al duca Albrecht d'Austria, il 1354 al cont Friedrich von Toggenburg. Il 1460 ha in incendi destrui ils edifizis. Il 1462 ha il duca Sigismund vendì la fortezza ad Ulrich von Brandis. Suentar il 1600 èn ils dubels foss d'aua vegnids drenads. Enturn il 1635 ha Ulysses von Salis renovà la fortezza e transformà ella en in chastè cun curtin franzos Il 1771 è vegnida erigida ina chaplutta en la tur princ. dal chastè; dal 1771-77 era M. sedia dal Filantropin. Il 1905 han renovaziuns extendidas dà al chastè la parita actuala.

Litt: H. R. HEYER, *Historische Gärten der Schweiz*, 1980, 69, 71, 101; CLAVADTSCHER/MEYER, *Burgenbuch*, 304-07.

Maria-Letizia Boscardin

Marsöl, denominaziun da la tur e da l'hotel en l'intschess da la curt da l'uv. da Cuir. Il num deriva da lat. tardiv *muricuolu* e signifitga 'miraglia'. I sa tractava oriund. d'ina fortezza rom. En il tm. sa referiva il num a l'entir complex da defensiun dal district episc. Al nordost da quest complex sa chatta la tur princ. cun il palaz. En in doc. dal 1284 vegn discurrì da la tur episc. sur il portal che vegniva concurrenzada da la tur Spinöl dals da Vaz al vest dal mir da la curt. La fatschada nord dal mir dal 13. tsch. è sa mantegnida p. p. fin al di dad oz.

Litt: *Churer Stadtgeschichte*, 2 t., 1913; CLAVADETSCHER/MEYER, *Burgenbuch GR*, 284-86. Martin Bundi

Martina (er Punt Martina, tud. Martinsbruck), fraz. da la vischn. pol. da Tschlin. Vitg lung la via da la vart sanestra da l'En, staziun da duana al sparavias per Danuder. Il 1196 è doc. ina punt (*pons Buvendum*). Dal tcarol. fin en il 16. tsch. aveva lieu mintg'onn a M. l'uschen. Landsprache, ina seduta da la dretgira da Danuder. 1707 constr. da la baselgia ref., 1904 da la catolica. Il stradun M.-Vinadi-Schalkl/A è vegnì constr. pir il 1912-13; avant passava il traffic da cunfin sur Danuder. Enturn il 1990 è vegnidas erigidas a M. novas punts, ina nova via da sviament, ina centrala dal stgalim Pradella-M. da las OEEngiadina e deponias da material da stgavament. 5 km sut M. sa chatta la punt rinforzada *Alt Finstermünz* ch'è doc. dapi il trom. e ch'è stada fin en il 19. tsch. ina staziun da duana impurtanta.

Litt: *Kdm GR* 3, 465-467; A. PLANTA, *Verkehrswege* 3. Paul Eugen Grimm

Masagn (tud. Masein), vischn. pol. GR, cirq. Tusaun, distr. Valragn (fin 2000 Mantogna). Dus abitadis, M. Sura e M. Sut, situada en la part inferiura da la Mantogna cun ils aclauns Dalaus, Cresta e Lochmüli. 1156 *de Medezenu*. 1803 198 abit.; 1900 228; 1950 270; 1990 333; 2000 366. Ils dus abitadis èn sa sviluppads prob. da las duas curts da la claustra da Cazas, menz. il 1156. Ils possessurs dals chastels d'Untertagstein e Schauenstein sco er singuls purs libers possedevan bains a M. en il tm. aut e tardiv. La suveranità avevan fin il 1337 ils da Vaz, lura ils da Werdenberg e da Razén, a partir dal 1475 l'uv. da Cuira. Eccles. appartegneva M. a Munt S. Gion/Reziòlta, dapi il 1505 filiala da Tusaun, 1731-1873 cun agen plevon. La baselgia da S. Flurin vegn menz. per l'empr. giada il 1441. Refurmaziun 1525. Il 1473 ha M. sustegnì l'iniziativa da meglierar la Viamala che passava tras il vitg. L'allevament da

muvel ed insatge cultivaziun dad ers predominesch fin oz. Fin il 1851 era M. in vischinadi dal cumin da Tusaun, il 1709 cumpra M. or ils dretgs episc. 1900-01 constr. dal stradun, 1920-67 fabrica da cuvertas da launa, 1960-80 megliuraziun. M. è orientà a la vischn. vischina da Tusaun. La part rum. importava il 1990 anc 9%.

Litt: *Kdm GR* 3, 203-06; *Gem. GR* 89 (1985). Jürg Simonett

Masans, lieu situà 2 km al nord da la citad veglia da Cuira, oz creschids ensemen. Oriund. aclaun cun baselgia a l'ur nord da la veglia cultira da Cuira. 12. tsch. *ad Massanes*, 14. tsch. *apud Mezans*. La derivanza dal num da persona Masso vegn preferì da la scienza a quel dad *ad malesanos* (tar ils malsauns, Campell). Tuttina vegn menz. gia il 1370 a M. ina chasa da leprus, a la quala appartegneva la baselgetta da S. Bastiaun (sontg da la pestilenza), constr. en il 13. tsch. En il 15./16. tsch. fascheva part da la chasa da leprus a M. il Lürlibad situà pli al sid. A partir dal 17. tsch. serviva l'ospital da ricover per vegls e malsauns. En la seg. mes. dal 20. tsch. è M. sa sviluppà d'ina culegna agricola ad in quartier d'abitar da la citad da Cuira.

Litt: POESCHEL, *Burgenbuch*; *Kdm GR* 7, 253. Martin Bundi

Mastrils, vischn. pol. GR, cirq. Tschintg Vitgs, distr. Landquart (fin 2000 Landquart Sut). Abitadi sparpaglià al Calanda cun Isla, Tardisbrügg e Trätsch. 1318 *Ponstrils*, 1345 *Bastrils*. 1850 460 abit.; 1900 322; 1950 433; 1970 464; 1990 585; 2000 529. En il tmaut colonisà da Rumantschs, a partir dal 14. tsch. da Gualsers ed alemanisà a partir dal 15. tsch. Pol. ed eccles. appartegneva M. a Zezras. Cun Vaz Sut existiva ina cuminanza da pastgira d'alp ch'è vegnida schliada il 1554. Il 1526 ha M. cumprà ora ils dretgs feudals da Marschlins, il 1568/77 quels da l'uv. da Cuira e da l'abazia da Faveras. Il 1854 è M. daventada ina vischn. autonoma. Dapi il 1610 vivan refurmads a M. Lur

baselgia constr. il 1613-14 è ida als catolics durants ils Scumbigls grischuns ed è vegnida cons. a Maria da la victoria. Il 1644 è ella vegnida restituida als reformads; dapi il 1840 vegn ella pastorada davent da Fläsch. La baselgia cat. da S. Antoni, constr. il 1686-88, è sa separada il 1727 da Zezras ed è daventada ina plaiv independenta, pastorada da chaputschins. Sector forestal impurtant, pauc industria, in runal da skis. Consorzi da scola cun Landquart. Il 1990 eran occupadas anc ca. 24% da las persunas cun activitad da gudogn en il l. sector, 81% lavuravan ordaifer la vischnanca.

Litt: *Kdm GR 7*, 387-89; BUNDI, *Besiedlung*; *Gem. GR 90* (1985). Adolf Collenberg

Maton, vischn. pol. GR, cirq. Schons, distr. Valragn. Il vitg accumulà sin l'521 m è il center da la Muntogna da Schons sura. 831 in *Mentaune*. 1780 123 abit.; 1850 111; 1900 74; 1950 65; 1990 49; 2000 58. *L'ecclisia*, menz. en l'Urbari curretic (entun 850), è prob. la baselgia da S. Martin; quella posseda frescas dal 10./11. tsch. La tur d'abitar, integrada en ina chasa da purs, date-scha dal 12./13. tsch. Gia a l'entsch. dal 13. tsch. allevaziun da muvel e cultivaziun dad ers a M. A partir dal 1204 existiva sin la Muntogna da Schon ina vischn. da purs libers cun in'atgna dretgira civila che sa radunava a Patagn sper M. Ils dretgs signurils avevan ils da Vaz, lura ils da Werdenberg ed a partir dal 1456 l'uv. da Cuir. Il 1458 è la val sa cumprada liber. La baselgia da M. ha appartegnì fin a la reformaziun a la plaiv da S. Martin a Ziràn. Il 1538 è la Muntogna sura daventada in'atgna plaiv. 1728 constr. d'ina nova baselgia a M. Fin il 1851 era M. in vischinadi da la dretgira da Schons e furmava entaifer quella, ens. cun Vargistagn e Lon, ina atgna pitschna dretgira civila. 1904-06 constr. dal stradun. Pop. rum. 1990: 80%/84% (l. p./l. p. u disc.). Il medem onn lavuravan anc 81% da las persunas cun activitad da gudogn da M. en il l. sector.

Litt: *Kdm GR 5*, 211-16; *Gem. GR 91* (1985). Jürg Simonett

Matsch, denominaziun d'ina val, d'ina vischn., da dus chastels e d'in domini feudal en il Vnuost Superiur.

1. Val e vischn.

Val laterala che s'estenda da Schludern/I en il Vnuost Superiur vers nord-ost cun il lieu principal M. (tal. Mazia) sin l'576 m. Il flum Saldura ed ils auls laterals Aviuns e Flitter provedan dapi tuts temps (e p. p. anc adina) in vast sistem per sauar las costas da la part exteriura da la val. La vischn. da M. ed intgins da ses aclauns han mantegnì lur character rum.: quel sa mussa en ils num da funs e bains quasi exclusivament rum., en la tipica «cultira retica» (v.d. chomps da terrassa cun mirs da sustegn da 10-15 m autezza) sco er en la constr. arcaica da chasas e curts purilas enchastradas ina en l'autra. M. è vegnì germanisà en il 17. tsch. Las parts pli veglias da la baselgia paroch. da S. Flurin dateschan dal trom. Tenor la legenda è naschì il sontg Flurin a M.; ses lieu d'operusitad principal era Ramosch.

2. Chastels

Da la vart sanestra da la Val M. al sid da Chartatscha sur l'uschen. Schlosshof (1386 m, Maso del Castello) sa chattavan ils dus chastels M. Sura e Sut, durant ca. dus tsch. sedias dals signurs da M.; duas lingias dals M. daventadas inimias èn sa ruinadas vicendaivlamain. Dapi ca. l'onn 1297, cur ch'ils da Matsch èn sa patrunads da la Churburg episc. a Schludern, èn ils chastels en la val ids en muschna.

3. Domini

En il tmaut èsi reussì als avugads da M. da cuntanscher ina posiziun da pusanza unica en il Vnuost Superiur. Ils da M. purtavon il titel dad «avugà» (advocatus) perquai che Ulrich da Tarasp, il fundatur da la claustra da Maria-munt, aveva cedì il 1161 ad Egno da M.

la protectura sur questa claustra; ils da M. avevan ultra da quai, cun interrupziuns, la protectura sur la claustra da Müstair sco er sur la glied da la Chadè en l'Engiadina Bassa, en il Puschlav ed en la regiun da l'Adisch. En il 14. tsch. eran ils da M. temporarain possessurs da pegn dals chastels da Vaduz, Reichenberg/Müstair, Tschanüff/Ramosch, Greifenstein/Filisur, alt Süns/Pasqual, Klingenhorn/Malans ed il 1338 da las dretgiras d'Aschera e Castels en il Parrenz. En il 15. tsch. èn els vegnids en possess da la dretgira da Gluorn ed il 1498 da la dretgira criminala da l'entir Vnuost. Ma gia il 1363 han els stuì acceptar formalmain la suveranità dals conts dal Tirol, quai che valeva dapi ca. 1504 er per ils conts da Trapp, lur successurs ereditars.

Litt: RAMPOLD, *Vinschgau*, 21–26, 257–65; PIETH; CLAVADTSCHER/MEYER, *Burgenbuch GR*.
Martin Bundi

Medel-Lucmagn, vischn. pol. GR, cirq. Cadi, distr. Surselva. Intschess dal Rain da Medel. Il territ. communal correspunda a quel da la Val Medel che colia cun ses 16 km lunghezza la Surselva cun il Tessin. M. cumpiglia set fracziuns fitg sparpagliadas sin in'atezza tr. 1'332 e 1'621 m: Curaglia (vitg central), Soliva, Mutschnengia, Platta (lieu da patronadi, santeri da la val), Drual/Matergia, Pardé, Fuorns, S. Gions. Ils radund 50 ant. bains ed abitadis da stad (tr. a. Pali, Biscuolm, Casura) nun èn pli abitads. 1309 *Medel*, tud. Medels i. O. 1850 609 abit.; 1900 536; 1941 645; 1960 835; 1970 611; 1990 427; 2000 500. En il tntemp. è vegnida colonisada la part externa da la val nà da Mustér, en il 12/13. tsch. la part centrala ed en il tntard. è vegnì avert il territ. dal Lucmagn (ist. Pass da S. Maria) a partir da la Val dal Blegn. Ils Gualsers èn stads participads be a l'ur, p. ex. a Mutschnengia. A la fin dal 14. tsch. devi 60 abitadis. M. steva sut il domini territ. da la claustra da Mustér, ma la glied medelina da la Chadè ha obtegnì il 1355 in agen mastral, il 1526 ed il 1643 la suveranità giudiz. Il 1744 ha

M. cumprà or las dieschmas claustralas. La baselgia da la vallada a Platta (menz. il 1338), cons. a S. Martin, era affiliada a la plaiv S. Gions a Mustér. Il 1454 è ella daventada autonoma, il 1500 ina atgna plaiv. A Curaglia è vegnida erigida il 1642 la chaplania da curatur da S. Clau. L'abazia da Mustér administrava ospizis a S. Gagl (menz. il 1261), S. Gions e S. Maria sin il pass (menz. 1374). Ca. 1366 fin en il 17. tsch. explotava ella argent a M. Avertura da l'empr. via en la Val M 1780., da la nova via dal Lucmagn 1875; constr. da la via chant. 1956–63. Dapi il 1929 viva M. dals considerabels tschains d'aua (tr. a. lai da fermada S. Maria). Il dumber dals bains purils è sa diminuì fermamain en la vischn. trad. purila, entant ch'ìl turissem d'enviern e sur il pass è creschids. Pop. rum. 1990: 90,6%/96,3% (l. p./l. p. u disc.). 1981–2001 meglieraziun generala. Scolas primaras datti a Curaglia e Platta, ils scolars secundars penduleschan dapi il 1973, ils reals dapi il 1980 a Mustér. Il 1990 lavuravan a M. anc 63% da las personas cun actività da gudogn en il l. sector.

Litt: BUNDI, *Besiedlung*, 349–55; C. PALLY et al., *Val M.*, 1996; *Piogns* (revista sem. da M.), 2000ss.
Adolf Collenberg

Medel/Valragn (tud. Medels i. Rheinwald), vischn. pol. GR, cirq. Valragn, distr. Rain Posterior. Abitadi sparpaglià a la via dal S. Bernardin, cun las fracziuns Dorf, Döörfli, Nühuus ed ist. Aebi. 1219 *Medels*. 1781 139 abit.; 1850 89; 1900 69; 1950 47; 1990 34; 2000 46. Oriund. territ. d'alp utilisà dals Rumantschs da Schons. Enturn il 1300 immigraziun da Gualsers, o. t. dal Pomat (Val Formazza). Fin il 1277 sut la protecziun dals baruns da Sax-Mesauc, lura en possess dals da Vaz. En la Aebi al vest da la vischn. da M. sa reunivan ils da Valragn tr. il 15. tsch. ed il 1856 per la tschentada da cumin annuala. Eccles. appartegneva M. oriund. al chapitel da S. Giovanni e S. Vittore en il Mesauc, lura a la plaiv da Valragn. Suentier la reformaziun enturn il 1530 annexiun a Spleia. Constr. da la basel-

gia il 1708. Atgna plaiv il 1726, a partir dal 1886 puspè unì cun Spleia. La pop. da M. ha vivì fin viaden en il 19. tsch. o. t. dal traffic da transit sur il Spleia, da l'allevament da muvel e da l'economia d'alp. Suenter las auazuns dal 1868 han ins bandunà la fracziun d'Aebi. Il 1955 è la scola vegnida serrada ed unida cun la corporaziun da scola Spleia. 1974-84 arrundaziun dal fons e constr. da paralavinas. Anc oz ina vischn. da purs.

Litt: Kdm GR 5, 256; Gem. GR 93 (1984); E. Rizzi, *L'archivio Sacco-Trivulzio e la colonizzazione Walser nel Rheinwald*, 1985.

Kurt Wanner

Meir (tud. Schin), chavorgia da l'Alvra tr. Seglias e Casti. 1639 *Schein*. Colliaziun traversala tr. la *Via Sura* (Set, Güglia) e la *Via Sut* (Spleia, S. Bernardin). Rechats al lieu cumprovan ch'il M. da la vart dretga dal flum era vegnì superà gia en il trom. Il M. separa l'intschess surmiran da quel sutsilvan e furma da vegl ennà er in cunfin pol. ed eccles. Per Scharons a la sortida dal M. è doc. en il 13. tsch. l'obligaziun al servetsch da transports; enturn il 1290 è menz. ina *taberna* episc. e dudesch berniers, il 1587 in lieu da duana. A la sortida ost dal M. sa chattava il chastè da Nivagl (vischn. da Vaz), prob. la sedia la pli veglia dals baruns da Vaz. Renovaziuns da la via dal M. enturn il 1639, 1689 e 1718. Il stradun (constr. il 1868-69) e la lingia da la viafier (averta il 1903) passan da la vart sanestra. La via dal M., che traversa in terren da bovas, è vegnida schlargiada dapi la fin dals onns 1960 ed ha survegnì trais tunnels.

Litt: PLANTA, *Verkehrswege* I, 29-74; J. CADUFF, *Der Schyn. Ein Reisezyclus*, 1870.

Jürg Simonett

Mels, vischn. pol. SG. L'onn 765 regala Tello vasts bains in *Maile* a las claustras da Mustér e Faveras. Enturn l'onn 848 è doc. a M. ina curt roiala principala. Da las quatter baselgias reunidas ad ina plaiv e las trais *villae* (cas spezial regiunal) èn sa furmadas las vischn. da Mels, Wangs e Vilters. Durant il tm.

era M. in center da fravgias. Il bain M. disponiva da pastgiras particularas per 100 portgs (sco Balzers e Flums) e da lajets spezials per peschs - perditgas d'ina furma econ. extendida en il territ. al cunfin aleman. Il 1290/98 è doc. a M. Gualsers libers ed il 1398 colonists da Tavau e Valragn a Schwendi e Weisstannen, il 1346 a Calfeisen, avant il 1459 sin la Muntogna da Vilters ed en il 15. tsch. a Palfries. Dal 9.-15/16. tsch. era M. biling: tud. era il linguatg da l'admin. e da la classe superiura, rum. il linguatg da la baselgia e da la gliעד simpla. Numerus nums da fons rum. han survivì.

Litt: P. GOOD (ed.), *Geschichte der Gemeinde M.*, 1973.

Adolf Collenberg

Meraun (tud. Meran, tal. Merano), citad e lieu da cura en il distr. tal. Burggrafenamt en il Tirol dal sid, damanaivel da la sbuccada da la Passer en l'Adisch. 2000 34'236 abit. En vischinanza da M. sa chattan la vischn. ed il chastè da Tirol. Qua residiavan en il tm. ils conts dal Tirol. En il 13./14. tsch. era M. in lieu da martgà fitg frequentà, nua ch'era nobels da la Currezia faschevan savens lur fatschentas. Il 1239 ha Schwicker von Reichenberg vendì a M. al cont Albert von Tirol il chastè da Tarasp ed ulteriurs bains en l'Engiadina. Ils uvestgs da Cuir Sigfrid (1299 e 1310) e Johann (1328) han concedì perduns e cons. baselgias a M. Ils conts da Werdenberg-Sargans possedeavan en la citad veglia da M. ina chasa sco feud. Suenter la sconfitta dals Tirolais en la Guerra da Chalavaina e la campagna da rapina dals Grischuns en il Vnuost la fin da matg 1499 è M. entrà en conflict cun las Trais Lias en la Guerra sva-baisa. 36 ostagis grischuns èn vegnids mazzads da quel temp. Grischuns proscrits u tals che vivevan en relaziuns precaras cun las autoritads gievan savens a M. Enturn il 1578 p.ex. temporarmain l'uv. da Cuir Beatus a Porta e ses frar Caspar, chapitani sin la Fürstenburg. Enturn il 1618 è fugì il chavalier ed aderent da l'Austria Rudolf Planta a M.; el ha cumprà la sedia no-

bla da Rametz ed il 1625 il chastè da Greifen che sa numna oz anc chastè da Planta e che stat sut la proteczion da monuments. Il 1799 è fugì l'uv. da Cuira Karl Rudolf Buol dals Franzos a M. El ha dirigì da là anora durant otg onns l'uvestgieu da Cuira, per il qual ses chaplan Gottfried Purtscher da Danuder aveva endrizzà in seminari da spirituals. Cur ch'il Tirol è vegnì incorporà il 1805 a la Baviera tenor il contract da pasch da Pressburg è l'uv. vegnì bandegià da M. e spedì a Cuira. Enturn il 1890 ha in comité d'iniziativa sut la dir. dal Girschun Florian Gengel, ant. cusseglier dals chantuns, lantschà la constr. d'ina viafier orientala a binari normal da Cuira a M. (Cuira-Alvra-Fuorn-M.). Il project n'ha gì nagina schanza. En il 20. tsch. èn M. e ses conturns daventads ina destinaziun da vacanzas preferida da bliers Svizzers pervi da ses clima miaivel ed il vin da Kalterer.

Litt: R. THOMMEN, *Urkunden zur Schweizer Gesch. aus Oesterr. Archiven* 1 (1899); *BUB* 1-3; H. SCHMID, «M., Residenz des Bf. von Chur», en: *BM* 1953, 120-25. *Martin Bundi*

Mesauc (tal. Mesolcina), val meridiunala dal GR averta al sid vers il TI, cunfinanta a l'ost cun l'Italia, al vest cun la Riviera e la Val Calanca ed al nord cun la Valragn. Il M. ha ina surfatscha da 374,3 km² e va da 260 m (Piano di S. Vittore) a 3'279 m s.m. (Piz Tambo). Abit.: 1802 3'104; 1850 4'570; 1900 4'579; 1950 5'333; 1990 6'109; 2000 6'662. Il M. cumpiglia las vischn. da Mesocco, Soazza e Lostallo (cirq. Mesauc), Cama, Verdabbio, Leggia, Grono, Roveredo e S. Vittore (circuit Roveredo). La lingua discurreda en questa val è il tal. e la cretta prevalenta quella cat. In'avischinaziun en il 16. tsch. a la cretta ref. è vegnida impedida efficaciamain tras il cardinal Carl Borromeo (1583).

Dal 12. tsch al 1480 è il M. stà en possess dals signurs da Sax-Mesauc che residavan sin il chastè da Mesocco. Il 1480 ha il cont Giovanni Pietro de Sax vendì il signuradi cun tut ils dretgs e possess a Gian Giacomo Trivulzio. Il

domini da quest e da ses successur Gian Francesco Trivulzio ha durà fin il 1549, onn en il qual ils Mesolcinais han recuperà lur dretgs e conquistà la libertad. Durant il domini dals Trivulzio è stada activa a Roveredo per bundant 50 onns ina 'zecca' che batteva munaidas d'aur e d'argient. Il 1480 èn entradas Soazza e Mesauc, *motu proprio*, en la LG, entant ch'il rest dal M. (cun la Calanca) è aderida successivamain (4-8-1496; da là davent è stà collià il destin dal M. adina cun quel da las Trais Lias e pli tard cun quel dal chantun Girschun. Gia dal temp dals de Sax era il M. dividì giudizialmain en dus vicariats (Mesocco e Roveredo), entant ch'el furmava sin il champ administrativ trais squadras: la squadra da Mesocco, la squadra 'di Mezzo' (Soazza, Lostallo, Cama, Verdabbio e Leggia) e la squadra da Roveredo (Grono, Roveredo e S. Vittore). L'autorità legislativa suprema era la 'Centena' che reuniva a Lostallo ils 25 d'avrigl tut ils vischins dal M. (e da la Calanca). La pussanza executiva vegniva exercitada dal Cussegl general da la val, entant ch'il tribunal da la val, ils uschen. '30 Uomini' era l'autorità giudiziala.

Tras il M. maina ina via ch'era gia en il tm. ina via da colliaziun e da transit tr. il sid ed il nord da l'Europa e ch'è vegnida schlargiada en la seg. mes. dal 18. tsch. Tr. il 1818 ed il 1822 ha l'insch. tessinai Giulio Pocobelli costruì la nova via che collia Blinzuna e Cuira sur il pass dal S. Bernardin. Tras il M. maina era da la via naziunala N 13 che collia la val cun il rest dal GR tras il tunnel dal S. Bernardin. Il Pass da S. Jorio collia il M. cun il Lai da Com, e la via da sauma da la Valle della Forcola maina vers la Val Clavenna. Dal 1907 al 1972 è stada en funcziun en la val ina viafier electrica che garantiva il transport da martganzia e passgiers tr. Blinzuna e Mesocco; actualmain exista sin quest traject sulettamain in servetsch d'autos postals.

Il M. è ritg da guauds da feglia e dascharina, explotads fermamain antruras per furnir laina a la Lombardia. L'agri-

cultura, l'allevament da muvel e da nursas vegnivan pratitgads intensivamain en il passà; actualmain è quest sector economic reducì per bainquant e concentrà en insaquantas zonas (viticultura en il M. Inferiur, allevament da muvel bovin e da chauras cun la chargiada da las alps en il M. Superiur, allevament da nursas). Gia en il 15. tsch. èn blers Mesolcinois emigrads en tut l'Europa (spazzachamins, architects, stuccaturs, vaidrers, picturs). Vers il 1950 han ins cumenzà a sfruttar l'energia idroelectrica ed erigì insaquantas centralas sco quella d'Ara (Soazza) u da Lostalio. Igl existan er insaquantas fabricas da metallurgia, da plastic e da vestgadira sco er diversas interpresas da construcziun. Era l'artisanat local ha p.p. survivì, malgrà il traffic pendular vers l'aglomeraziun da Blinzuna. Il M. ha duas scolas secundaras, ina a Mesocco, l'autra a Roveredo; ultra da quai existan scolas d'entruidament pratic ed in Collegio S. Anna a Roveredo. A Roveredo sa chatta er il 'Ricobero Immacolata', ina chasa d'attempads; ina asil da vegl exista er a Mesocco, ed a Grono sa chatta ina clinica (S. Rocco). Il turissem flurescha o. t. a S. Bernardin e sin il Monte di Laura (vischn. da Roveredo).

Litt.: F.R. Tagliabue, *Studio sulla organizzazione amministrativa della valle Mesolcina*, 1960; P. MANTOVANI, *La strada commerciale del San Bernardino*, 1988.

Cesare Santi

Mesocco, chastè situà a ca. 800 m sin in sparun grippus che dominescha il fund da la val al sid da la vischn. Il chastè da M. è la fortezza la pli impurtanta dal GR ed ina da las pli impressiunantas da la Svizra. Menz. il 1219 existiva ella gia en il tmaut; renviaments archeol. cumprovan la preschientscha d'abitadis en la zona dal tneol. La tur principalà è vegnida construïda tr. il 1150 ed il 1200. En il 13. tsch. è il complex vegnì munì d'in nov mir da tschinta che circondava l'entir areal fortifitgà. Ulterioras restructuraziuns èn vegnidadas effectuadas en il 14. tsch. ed a l'entsch. dal

15. tsch. (amplificaziun e modificaziun da la fortezza). Per ca. quatter tsch. è il chastè stà la sedia dals de Sax, signurs dal Mesauc. Il 1480 ha il condottiere Gian Giacomo Trivulzio acquistà dals de Sax la signuria sur il Mesauc cun tut ils dretgs e possess, tr. ils quals il chastè; el ha rinforzà il mir e transformà il chastè en ina fortezza impurtanta, dotada d'ina artigliaria imposanta e considerada «assaglibla sulettamain per tradiment u per fomaz». Il 1496 è il Trivulzio entrà en la LG, s'impegnond da furnir en cas da basegn armas e proviant dal chastè, circumstanza ch'è sa verifitgada cun las Guerras svabaisas e da Müsch. Il 1526 han las Trais Lias comandà da demolir il chastè. Il 1925-26 èn succedidas lavurs da consolidaziun ed il 1986-90 han ins cumenzà la restauraziun cun la tur poligonala ed ils mirs al nord e norvest. Il chastè, che s'extenda sin tut il plaun dal grip, ha in plan orizontal poligonal irregular ed allungà; il mir da tschinta è rinforzà da tschintg turs da furmas diversas. A l'intern dal mir eran las dimoras dals signurs, dals schuldads e da la servitud, ils magasins per las armas ed il proviant, la fundaria, la chascharia, il furn, la cisterna ed in avieuler, entant che, a l'intern dal chastè, sa chatta anc adina la baselgia da S. Carpofo, gia existenta en il 6-7. tsch. e reconstr. en il 11. tsch., cun campanil roman. Al pe dal chastè sa chatta percenter la baselgia romana da S. Maria, doc. gia il 1219.

Litt: CLAVADETSCHER/MEYER, *Burgenbuch GR*, 248-55; W. MEYER/E. MAURER, *Mesocco. Castello e chiesa Santa Maria del Castello*, 1985; C. SANTI, *Fonti per la storia del castello di Mesocco*, 1988. Cesare Santi

Mesocco, vischn. pol. GR, cirq. Mesauc, distr. Moesa, ultima vischn. al nord dal Mesauc e, cun ina surfatscha da 164,9 km², ina da las pli extendidas dal chantun. 9. tsch. emprima menziun en l'Urbari curretiv. La vischn. da M. cumpiglia 11 fracziuns, tr. a. quella da S. Bernardin, ed è sedia da la scola secundara, dal tribunal distr. e da numerus uffizis admin. 1701 1013 abit.; 1773

921; 1802 862; 1850 1'182; 1900 1'173; 1950 1'150; 1990 1'087; 2000 1'201. Div. chats archeol., fatgs tr. la fin dal 19. ed ils emprims decennis dal 20. tsch. e durant la constr. da la via naziunala N13, han scuvert fastizs umans antics a Tec Nev ed en ils conturns dal chastè: utensils da crap dal tmesol. (ca. 6'000 a. C.), ina fuaina dal tneol. (ca. 5'000 a. C.) e cheramica da la medema epoca. Abitadis pli duraivels dateschan dal tbronz (avant il 1400-1200 a. C.) e dal tfier. Ina necropola impurtanta dal tfiertemp. (6.-5. tsch. a. C.) è vegnida scuverta al lieu da la vischn. odierna, entant ch'ins ha chattà fastizs d'abitadis rom. sin la collina da Gorda; qua ha ins er scuvert fossas dal tmaut (6. tsch. s. C.). Ins vesa anc adina las ruinas dal chastè, in dals pli vasts dal chantun ch'era gia sedia dals Sax, signurs dal Mesauc dal 12. tsch. al 1480, alura dals Trivulzio fin il 1549. Al pe dal chastè sa chatta la baselgia da S. Maria, gia menz. il 1219, che conserva frescos prezius dal circol dals Seregnas (ca. 1450). En il passà furmava M. ina da las quatter squadras da l'uschen. *Comun grande di Mesolcina* ed era dividida en quatter *degagne* (Crimeo, Cebbia, Andergia e Darba), mintgina dirigida d'in consul. Il 1480 è M. entrà voluntariamain en la LG, ens. cun Soazza. La baselgia paroch. dals SS. Pieder e Paul, doc. il 1219, ha subì impurtantas lavurs da restauraziun en il 17. tsch. ed il 1959. Dasperas exista la baselgia da S. Roc, menz. il 1538, cun l'ospizi annex, nua ch'èn stads activs ils fraters chaputschins dal 1668 fin oz, e div. chapellas, tr. las qualas quellas da S. Giachen, doc. il 1419, quella da S. Giusep ad Andergia ch'ha servì durant il temp da la Refurmaziun da lieu da cult per ils ref., e quella da S. Giovanni Nepomuceno a Cebbia, destr. da l'inundaziun dal 1978 e lura reconstr. Menziun spez. meritan la chasa a Marca, constr. il 1565 e pli tard amplifitgada, sco er numerusas chasas patrizianas dal 19. tsch. La vischn. ha conuschì a partir dal 1960 ina impurtanta fasa da svilup econ., marcada da la realisaziun dals implants

idroelectrics dad Isola e Spina, da la constr. dal tunnel dal S. Bernardin, inaugurà il 1967, da las lavurs da la via naziunala N13 e da l'amplificaziun dals implants turistics da S. Bernardin. L'agricultura e l'allevament da muvel han tuttavia mantegnì in'impurtanza remartgabla; div. alps èn anc adina chargiadas cun arments, chauras, nursas e portgs. M. è stà fin il 1972 staziun finala da la viafier Blinzuna-M., inaugurada il 1907.

Litt: G. SCHNEIDER-SCHNECKENBURGER, *Churrätien im Frühmittelalter*, 1980, 97 ss.; *ArGR*, 1992, 22-25, 92-96. *Cesare Santi*

Mistail, baselgia ed ant. claustra da mungias en la vischn. d'Alvaschagn. Il convent è vegnì fundà avant l'onn 806 sco claustra privata episc., prob. sin iniziativa da la claustra da Cazas. Doc. fin il 9. tsch. *sororibus ad Impidines* (analog al ministeri carol. *Impetinis* en la regiun da l'Alvra), 926 *Uapitines*, avant il mars 954 *Prades*, 1290/98 *Monasterium*. Suenter edificis precedents betg classifitgabels cun segirezza è vegnida erigida enturn l'onn 800 la baselgia cun trais absidas anc oz existenta (926 patrocini da S. Pieder). Da ses temp da constr. derivan restanzas da frescas. La claustra è vegnida schliada tr. il 1096 ed il 1154. Alura ha l'uv. Adelgott cedi la baselgia cun las majarias Prada (vischn. da Casti), Suagnign e Latsch (vischn. da Bravuogn) a la claustra da premonstratens S. Gliezi a Cuir. Il 1282 è la baselgia cun las majarias Prada e Suagnign puspè ida a l'investgieu ch'ha suttamess l'admin. da quests bains ad in *vicedominat*, cun il qual è vegnida infeudada il 1386 la fam. de Marmels. Ad ina pertinenza da M. appartegneva prob. il *xenodochium sancti Petri*, menz. l'onn 831. Quest ospizi pudes avair sa chattà en vischinanza da la claustra e n'era betg identic cun quel sin il Pass dal Set. Cuntrari a doc. litterars pli vegls na po la baselgia claustrala da M. vegnir identifitgada cun l'oriunda baselgia da vallada da la regiun d'Alvra (e forsa dal Surses). Tuttina para M. d'avair servì da baselgia da

sepultura a la plaiv da Casti. Per il tm-temp. è doc. al nord da la baselgia existenta fossas entagliadas en la plattamorta ed al sidvest in mausoleum cun arviet. Suenter la dissoluziun da la claustra ha la baselgia salvà il dretg da sepultura, l'emprim apparentamain per l'entira Val d'Alvra, fin il 1679 anc per la vischn. d'Alvaschagn. Quella cumpara gia il 1397 a chaschun da la reconsecraziun sco sia possessura. A la sava dal 15. tsch. è naschidas, prob. en connex cun quest act, las frescas en l'apsida princ. ed a la paraid nord sco er la tur e la sacristia. Al nord da la baselgia è cumprovadas restanzas d'edifizis claustrals. In atrium cumprovà da fundaments al vest da l'edifizì sacral è glischnà giu p.p. en la chavorgia da l'Alvra.

Litt: *Kdm GR* 2, 266-75; 7, 1948, 432ss.; O.P. CLAVADETSCHER, «Die Urkunde Bf. Adelgott von Chur vom Jahre 1154 für das Prämonstratenser kloster St. Luzi in Chur», en: *Gesch. und Kultur Churrätens*, pf. 1. MÜLLER, edì dad U. BRUNOLD, L. DEPLAZES, 1986, 311-29; *HS III/I*, 279-82. Florian Hitz

Moesa, distr. stgaffì il 1851 sco circondari da la dretgira civila tras la Lescha davart la repartiziun dal chantun GR. Territorialmain cumpiglia quel il Mesauc che vegn drenà da la M. e che s'extenda dal Pass dal S. Bernardin fin al cunfin dal chantun Tessin. La dretgira distr. è la dretgira civila d'emprima istanza. Il distr. M. da lingua taliana sa cumpona dals circuls da Mesauc, Roveredo e Calanca ch'han remplazzà il 1851 ils trais cumins omonims.

Litt: L. SCHMID, *Der Kanton Graubünden*, 1973. Jürg Simonett

Molinas (tud. Molinis), vischn. pol. GR, cirq. Scanvetg, distr. Plessur. Vitg accumulà en il fund dal Scanvetg. 1335 *Mulina*. 1850 135 abit.; 1900 106; 1950 137; 1980 83; 1990 133; 2000 136. Uschen. Schaftlappenbeil dal tftiertemp. Enturn il 1200 era il Scanvetg d'amez pli u main colonisà. Bains possedeve là o.t. la claustra da S. Gliezi a Cuir. La suveranità avevan fin il 1338 ils da Vaz sco signurs feudals episc., lura ils

da Werdenberg ed il 1363 per l'empr. giada ils da Toggenburg. Il 1436 è M. entrà ens. cun il cumin da S. Pieder en la LDD. A partir dal 1437 eran ils da Montfort ils suverans, suenter il 1471 ils da Matsch ed a partir dal 1479 l'Austria. Eccles. appartegneva M. a la plaiv da S. Pieder; in'atgna baselgia (S. Balmtramiu) è doc. il 1509; la vischn. è vegnida refurmada il 1530. Enturn il 1570 era la lingua rum. sin il precint da svanir. La cumpra dals dretgs signurils è succedida il 1652, quella dals dretgs feudals episc. il 1657. Constr. dal stradun sur M. 1875-77 e da la via d'access S. Pieder-M. 1908. La staziun da S. Pieder-M. da la viafier d'Arosa datescha dal 1914, il rempar idraulic da l'OE dal 1928. Il 1980 ha M. subì gronds donns tras bovas. En il vitg trad. puril lavuravan il 1990 anc 28% da las pers. cun actività da gudogn en il 1. sectur, 41% en il 2. sectur.

Litt: *Kdm GR* 2, 202; F. PIETH, «Aus der Gesch. des Tales Schanfigg», en: *JHGG* 81 (1951), 97-125; *Maiensässinventar GR*, Schanfigg, quad. 16, 1999. Jürg Simonett

Mon, vischn. pol. GR, cirq. Alvaschagn, distr. Alvra., situà al sidvest da Casti sin la spunda sanestra dal Surses. 1281 *Mans*, tud. Mons (fin il 1943 num uffiz.). 1850 155 abit.; 1950 105; 1990 67; 2000 86. En il trom. e fin ca. 1400 manava la via sur ils pass dal Set e dal Güglia tras M. Sur la vischn. han ins scuvert ina fravgia dal trom. ed ina fossa. Fin il 1559 era M. territ. episc., suenter appartegneva el a la dretgira auta dal Surses/LCD. Il 1592 ha M. obtegnì il dretg d'avair in agen sigil. La baselgia importanta dal tromtemp., cons. als SS. Cosmas e Damian, vegn menz. per l'empr. giada l'onn 841 (fin il 1468 possess da la claustra da Faveras). Las frescas dateschan dal 1400; las duas statuas dals patrums-baselgia dal 15. tsch. è vegnidas enguladas il 1977. A partir dal 1592 era M. ina plaiv autonoma, colliada cun Casti. Chaputschins ha erigì il 1643-48 la baselgia barocca da S. Francestg; Johann Rudolf Sturn ha realisà ils frescos ch'èn vegnidas sur-

malegiadas p. p. il 1915 e rendids puspè visibels dapi la renovaziun dal 1975. Dapi il 1960 vegn la plaiv pastorada davent da Stierva. Il 1870 è vegnida constr. la via M.-Casti. Il vitg trad. puril quintava il 2001 anc 10 purs. Ultra d'ina ustaria e d'ina officina per maschinas agriculas ha M. in pau turissem (ca. 15 chasas da vacanzas). Dapi il 1972 furma M. cun Stierva e Salouf in consorzi da scola; a M. sa chatta be anc la scolina. Il dialect rum. da M. e Stierva ha furmà la lingua da scrittira dal Surmeir. Pop. rum.: 1990 72%/88% (l. p./l. p. u disc.).

Litt: *Kdm GR* 2, 280-90; BUNDI, *Besiedlung*; *Gem GR* 96 (1984). Gion Peder Thöni

Monstein fracz. da la vischn. pol. da Tavau GR, situada al sid da Tavau sin la spunda sanestra dal Landwassertal sin 1'626 m. 1494 *Mastein*, *Mustein*; 1526 *Mostein*. 1689 178 abit.; 1900 127; 2000 177. Il num deriva dal lat. *monasterium* e sa referescha prob. ad ina curt ed a gliedud da la claustra da Curvalda. A partir dal 1654 furmava M. cun Glaris ina pravenda; il 1719 è la vischn. sa separada da Glaris e furma dapi lura in'atgna pravenda cun in agen reverenda. 1668-70 constr. da l'empr. baselgia, bandunada il 1896 en favur d'in edifizii nov al nord da la vischn. La pop. lavura o. t. en l'agricultura (M. dispona d'atgnas alps). La fracz. è colliada tras l'auto postal cun la staziun da la VR Tavau-Glaris. Ella ha in'atgna scolina e scola che laschan sperar ad in svilup positiv.

Litt: *Kdm GR* 2, 176; *Davoser Revue* 72, 1-3-1997, 1-47. Martin Bundi

Montafun, val laterala che s'extenda al sidost dal Vorarlberg/A vers il massiv dal Reticon ed il Partenz. En il M. che fascheva part dal Walgau (*Vallis Drusianae*) e da la Rezia Inferiura è sa mantegnidas la tradiziun rom. e la lingua rum. fin a la fin dal tm. L'emprima menziun sco *Ferraires* en l'Urbari curretiv (ca. 850) cumprova ch'il M. era ina regiun da minieras e furns; menz. èn otg furns (*fornaces*). Il num M., che

cumpara pir enturn il 1100, sa constiutescha da *mons/munt* e *tofus/tovun* e signifitgescha 'val muntagnarda cun blers valluns'. L'industria da minieras ha giugà anc en il tmtard. ina rolla impurtanta, o. t. las minieras d'argent al Munt Baltramieu/Kristberg; il 1319 vegn discurrì d'ina *argentifodina seu mons dictus Montafune*. Pir en il tm. aut e tardiv è la val vegnida colonisada pli intensivamain tras ils libers purs da runcada rum. Dapi il 15. tsch. èn sa domiciliadas singulas stirpas gualsras o. t. en il Silbertal. A partir da la mes. dal 16. tsch. ha ina gronda unda da germanisaziun fatg svanir plaunsieu il rum. Enturn il 1500 tgirava il M. stretg contacts cun il Partenz e l'Engiadina. La refurmaziun dal Partenz è succedida p. g. p. tras il preditgant Jacob Spreiter dal M. Il traffic da commerzi intensiv sur ils pass (muvel, vin e sal) sa splegava o. t. sur il Schlappiner Joch (2'202 m) e la Fuorcla Vermunt (2'798 m). La Guerra svabaisa e differenzas confess. han provocà dispitas ed in'alienaziun parz. Il 1621 ha il colonel austr. Erhard Brion invadà il Partenz sur il Schlappiner Joch; ulteriuras invasiuns da truppas imp. èn succedidas il 1622. Il 1799 è il general imp. Friedrich von Hotze avanzà dal M. en il territ. grischun. Dal tmtemp. fin il 1808 ha il M. appartegnì ens. cun il Vorarlberg dal sid (*Capitulum Drusianum*) a l'uv. da Cuir. En il 19. tsch. exportava il M. chaschiel e paintg sco er forzas da lavur umanas (praders, pasturs e famegls) en il GR.

Litt: H. FLAIG/W. FLAIG, M., 1982; J. ZURKIRCHEN (red.), *Montafoner Heimatbuch*, 1974. Martin Bundi

Montalt, chastè e pitschen signuradi (13./14. tsch.) al cunfin da las vischn. da Sevgein, Pitasch e Riein en possess dals baruns da M. Il chastè è menz. per l'empr. giada il 1227. Il lieu dal chastè n'è betg eruibel; en dumonda vegnan las collinas Cresta e Muota Casti/Raclein al sid resp. al nordvest da Riein e Chischlatsch al sid da Sevgein. Cun quai che la majaria la pli impurtanta dals signurs da M. era en vischinanza

da Prada gronda, sa chattava il chastè da M. prob. a Muota Casti. Il 1350 vegn menz. in *maigerhof under der burg Montalt*. Da qua davent manava la via da colliaziun da la veglia plaiv gronda da Sagogn sur Sevgein a Pitasch e sur la Günerlückli (2'470 m) a Stussavgia. Las trais collinas surmenz. n'èn betg vegnidadas exchavadas, ins ha dentant chattà sur la Muota Casti in foss engrondì artifiz. sco er restanzas d'ina tur e d'ulteriurs edifizis. La chavorgia al sid da la collina sa numna Val Casti. Il chastè è prob. vegnì abandonà baud e na vegn betg pli menz. en las midadas da possess dal 14. tsch.

Litt: CLAVADETSCHER/MEYER, *Burgenbuch GR*, 88. *Martin Bundi*

Monticello, fracziun merid. da la vischn. da San Vittore, GR, situada sin ina collina al cunfin cun la vischn. da Lumino. 1462 *Montexelo*. 1990 ca. 50 abit. Zona rurala cun vignas, accessibla be sin ina via stretga. Già a partir dal 1400 e durant tschientaners object da grondas cuntaias pervia dals cunfins tr. il contadi da Blinzuna ed il Mesauc. La baselgetta da Nossadunna da la Naiv, menz. il 1513 ed engrondida en il 17. tsch., è vegnida restaurada tr. il 1960 ed il 1982. M. è il lieu d'origin dal stuccatur Alberto Camessina e da l'architect Giacomo Angelini.

Litt: R. BOLDINI, «Il vino di Monticello già pregiato nel 1462», en: *QGI* 46 (1977), 95-103; C. SANTI, «Per la storia dei confini tra Monticello e Lumino», en: *La Voce delle Valli* 38 (1984). *Cesare Santi*

Mulegns (tud. Mühlen), vischn. pol. GR, cirq. Surses, distr. Alvra. Vitg a la via dal Güglia a l'entrada da la Val Faller. 1850 120 abit.; 1900 145; 1950 109; 1960 57; 1990 37; 2000 36. En la Val Faller vegniva explotà arom 600-500 a. C. ed igl existivan qua ina fundaria ed ina miniera. M. è vegnì fundà dals Gualsers en il 15. tsch. (doc. il 1521). Quels èran immigrads da la Val Faller ch'els avevan colonisà il 1200. Il 1315 è doc. per l'empr. giada l'Alp Faller sco feud episc. La baselgia da S. Gudegn a M. dal tmtard. è vegnida rempl. il 1643

dals chaputschins cun ina baselgia barocca (S. Francestg). Fin oz pastoreschan chaputschins la plaiv communabla da M. e Sur. En la chapella da Faller (Visitaziun da Maria e S. Roc) sa chatta ina tavla d'altar remartgabla dal 1760. En il 19. tsch. vegnivan midads ils chavals da posta a M. (stallas per ca. 150 chavals). L'hotel Löwen vegniva frequentà da personalitads impurtantas. L'avertura da la Viafier da l'Alvra il 1903 ha inizià l'emigraziun. Actualmain datti be anc paucs purs en il vitg. Las alps en la Val Faller - abandonada en il 18. tsch. - èn affittadas, la prada vegn cultivada. Consorzi da scola cun Sur e Murmarera dapi il 1975, scola secundaria a Suagnign dapi il 1963. Uffizi postal cun Sur dapi il 1994. Pop. rum. 1990: 1980 92%; 1990 73%/86,5% (l. p./l. p. u disc.).

Litt: E. MEYER-MARTHALER, «Zur Frage der Walser im Oberhalbstein», en: *BM*, 1941, 321-36; BUNDI, *Besiedlung*; E. BRUN, *Geschichte des Bergbaus im Oberhalbstein*, 1987. *Gion Peder Thöni*

Mulin, part da la vischn. da Trin, situada sin 800 m al stradun tr. Trin vitg e Flem, al nord da la planira alluviala da Prada e Sur Aua. Il num deriva dals mulins e da las resgias ch'existivan qua dapi il tm. e che vegnivan mess en moviment tras l'aua da la Val Turnigla. Quest'aua è conuschenta da vegl ennà per sia abundanza da peschs. Fin a l'entsch. dal 20. tsch. ha ella er servì a sauar grondas parts da la prada da Trin; in document dal 17. tsch. menz. in conduct d'aua suspendì al Crap Ueara. A M. sa chatta oz l'ovra electr. da la vischn. da Trin ch'è vegnida surfabritgada fermamain cun abitaziuns secundaras. La planira da M. è in territ. da passlung fitg apprezzà.

Litt: BUNDI, *Besiedlung*. *Martin Bundi*

Mundaun, muntogna al sidvest da Glion, 2'064 m, numnada er il «Rigi grischun» pervia da sia bella vista. 765 (Testament da Tello) *Mendane cum scivo suo*, q.v.d. cun l'alp al nordvest dal Pez M. sin territ. da la vischn. da Surcuolm, utilisada - sco dal medem

temp l'Alp Naul d'amez – per pascular il muvel. Il Pèz M. è daventà famus tras la festa da la Battaglia da Porclas (1352), celebrada il 1860 (!) al pe dal M. e tras Gottfried L. Theobald («Naturbilder», 1860) ed è pli tard er vegnì dechantà dals poets rum. Michel Caderas, pictur da Glion, ha creà enturn il 1860 l'emprim panorama stampà dal M. Il 1867 ha la cumpagnia da mats da Breil represchentà il drama *Guglielm Tell* (versiun rum. da Gion Antoni Bühler) sin la spunda dal Pèz M. sper il nov Hotel Pèz M., avert il 1862. L'hotel odiern «Bündner Rigi Pèz M.» datescha dal 1902. Il Pèz M. è avert fin sisum al turissem d'enviern.

Litt: A. DARMS, «Der Piz Mundaun, die Wiege des Tourismus in der Surselva?», en: *25 Jahre Bergbahnen P.M. AG*, Surcuolm, 1994, 7-17; C. CADUFF-VONMOOS, «Il Pèz Mundaun e siu hotel», en: *Per mintga gi*, 1992, 33-41.
Martin Bundi

Munt S. Gieri (tud. Jörgenberg), chastè-fortezza, domini dal tm. e pli tard cumin cun il center Vuorz. Il num dal domini da M.S.G. deriva da la baselgia (*habet ecclesiam sancti Georgii in Castello*), menz. per l'empr. giada enturn l'onn 850. Gia en il Testament da Tello (ca. 765) vegn menz. si M.S.G. in chastè (*agrum super castellum*) ch'è sa sviluppà d'ina fortezza cun baselgia dal tmtemp. ad in chastè da famiglias aristocratas (1209 *Waltramsburg*). Il chastè da M.S.G., situà a l'ost da la vischn. da Vuorz, è il cumplex fortifitgà il pli grond da la Surselva: el cumpiglia sin ina surfatscha da 100 x 70 m ina tur d'abitar, in palaz, la baselgia da S. Gieri cun il campanil ed in mir da tschinta. La tur da la baselgia dal 11. tsch. è l'edifizi il pli vegl mantegnì si M.S.G. I sa tracta prob. d'ina annexa ad ina baselgia antecessura, erigida entaifer il plan orizzontal da la baselgia odierna. La tur d'abitar è vegnida destr. en il decurs da dispitas per l'ierta dals Friberg en ils onns 1330-43. Suenten il 1351 han ins reconstruì ed engrondì la tur: in nov palaz, erigì al nordvest dal cumplex, serviva da tract d'abitar signuril. A la fin dal 15. tsch. sa lascha cumpro-

var a la fatschada orientala da la tur d'abitar in'ulteriura reconstrucziun.

In domini da M.S.G. per propi è doc. pir enturn il 1300 sco possess dals signurs da Friberg (chastè da fam. a Siat). Enturn il 1330 è il domini ì als baruns da Vaz, suenter il 1338 als da Werdenberg, il 1343 als da Razèn, il 1458 al cont Jos Nicolaus da Zollern ed il 1472, tras vendita, a la claustra da Mustér. Enturn il 1580 ha L. Gandreya cumprà il chastè ch'el ha prob. anc abità. En il 17. tsch. è il chastè vegnì bandunà. En il tmtard. è M.S.G. vegnì amministrà da chastellans e cumpigliava ils vischinadis da Vuorz, Andiastr, Rueun, Siat e Schlans. A partir dal 16. tsch. han quels furmà ens. cun Pigniu il cumin da Vuorz cun ina vusch en la LG ed en la Republica da las Trais Lias. Il 1734 èn ils vischinadis ed il cumin sa cumprads ora dals dretgs feudals da l'abazia da Mustér. En connex cun la reorganisaziun dal chantun GR l'onn 1851 è sa constituì dals cumins da Vuorz e Sursaissa il nov cirq. da Rueun cun las vischn. rum. da Vuorz, Andiastr, Pigniu, Siat, Rueun e la vischn. tud. da Sursaissa. Schlans è vegnì incorporà al circuit da Mustér, sortì da la Cadi. En il circuit da Rueun è Vuorz ref., las autras vischn. èn catolicas.

Litt: *Kdm GR* 4, 5, 321; P. TOMASCHETT, «Der Zehntenstreit im Hochgericht Disentis 1728-1738», en: *JHGG* 84 (1954), 1-162; A. CARIGIET, «Zu den Burgen Friberg (Siat) und J. (Waltensburg)», en: *JbADG* 2000, 153-62.

Martin Bundi

Munt S. Gion u Reziòlta (tud. Hohenrätien, Hochrialt), cumplex fortifitgà situà sin in aut grugn a l'ost da l'entrada en la Viamala, vischn. da Seglias GR. Il num *Hohenrätien*, ina da las pli veglias fortezzas da la Svizra, cumpara pir il 1573. Il cumplex cumpiglia in areal exteriur cun ina baselgia e duas turs d'abitar al vest, la curt interna cun la tur princ. ed annexas al sidvest ed in mir da tschinta che circundescha il vast areal. Il munt era abità gia en temps preist. L'onn 2001 han ins scuvert ina chapella da batten dal 5. tsch. Dal tmtemp. dateschan er la fortezza cun il

mir da tschinta e la baselgia da S. Gion Battista che serviva fin enturn il 1500 da baselgia paroch. per la Tumleastga da la vart sanestra dal Rain e cun quai er da lieu da sepultura. Las turs d'abitar, constr. en il 11/12. tsch., eran abitadas da fam. noblas. Il chastè da Reziòlta è prob. identic cun l'areal intern da la fortezza da M. Ils signurs da Riòlta vegnan doc. repetidamain dal 12-14. tsch. A l'entsch. dal 14. tsch. è la fortezza vegnida bandunada. Dapi intgins decennis vegn ella sanada.

Litt: CLAVADETSCHER/MEYER, *Burgenbuch*, 142-46; H. BOXLER/J. MÜLLER, *Burgenland Schweiz*, 1990, 7-13; TG 5 (2001).

Maria-Letizia Boscardin

Munt Spleia (tal. Monte Spluga), pitschen aclaun sisum la Val San Giachen/I, 1908 m, al pe dal Pass dal Spleia, part da la vischn. tal. d'Isolato. El sa chatta a la fin d'ina ant. planira auta, cuverta en il tm. p. p. da larischs e tieus. Gia en il trom. existiva qua prob. ina susta; dapi il tmtard. è doc. in ospizi u in albiert. En doc. grischuns vegn menz. in'ustaria sin il M. S. Enturn il 1600 era questa chasa averta l'entir onn. Ca. 1700 è sa furmà cun l'augment dal traffic in vitget enturn la «Ca della Montagna». En connex cun il schlargiament da la via tras il Cardinell è l'ospizi vegnì engrondì e renovà e munì cun stallas ed in zain che sunava permanentamain en notgs da malaura. Cun la constr. da la via commerciala il 1823, ina baselgia e la chasa da duana ha M.S. survegnì quasi l'aspect odiern. Dapi il 1932 cuvra in lai artificial la pli gronda part da la planira da M.S. Sin ina collina al sid dal lai steva en il tm. l'imposant chastè da Castelasc. Da questa fortezza controllavan e segiravan vassals dals baruns da Vaz en il 13. tsch. il traffic internaz. dal nord al sid.

Litt: M. GIANASSO, *Guida turistica della provincia di Sondrio*, 1979, 384. Martin Bundi

Muntfallun, M. Suot e Sur inditgescha dus districts giur. per la giurisdicziun criminala en l'Engiadina Bassa. L'ual da Muntfallun a l'ost dal vitg da Ftan furma il cunfin tr. ils dus districts. En

il tmtard. era la giurisdicziun criminala d'Engiadina Bassa, che vegniva exercitada a partir da la dretgira da Munt Danuder (Naudersberg) en il contadi dal Tirol, anc nundivida ed en possess da l'Austria. En il contract statutar dal 1519 è quella alura vegnida reparitada tr. l'uestg da Cuir e las vischn. d'ina vart e l'Austria da l'autra. A M. Sur appartegnevan Zernez, Susch, Lavin, Guarda, Ardez e Ftan, a partir dal 1803 er Tarasp. Il lieu d'execuziun, numnà *Güstizia*, era tr. Zernez e Susch. Da M. Suot faschevan part Scuol, Sent, Ramosch, Tschlin e Samignun. Lur lieu d'execuziun *Chünettas* sa chattava sut Sent. Il 1652 èn sa cumpradas liber las vischn. da M. Sur per 14'000, quellas da M. Suot per 12'600 rentschs dals davos dretgs suverans austr. La repartiiziun da la dretgira criminala è sa mantegnida fin il 1851.

Litt: SSRQ GR I/2; P. E. GRIMM et al., *Libertà Engiadina Bassa: 350 Jahre Loskauf von Oesterreich*, 2002. Paul Eugen Grimm

Muntogna da Schons, denominaziun per la spunda sanestra da la Val Schons main cuverta da gaud. Fin en il tmtard. existiva ina cuminanza da purs libers, ils uschen. Libers da la M. che vivevan en ils vischin. sin la spunda. Intgins privilegiads ch'appartegnevan medemamain als Libers da la M. abitavan en il funs da la val. Il 1204 han ils *homines liberos de Saxammo* affittà sco cunpossessurs l'alp Niemet. En il contract da pasch dal 1428, stipulà tr. Clavenna ed ils vischinadis da la Val Schons, cumpara il mastral da la vischn. a la M. cun in agen sigil. La giurisdicziun civila exercitavan ils Libers da la M. prob. sezs. Lur corporaziun pudeva decider davart l'utilisaziun da gauds, pastgiras ed alps. Il lieu da reuniun era a Padagn/Maton. La giurisdicziun criminala exequivan ils possessurs da la pussanza comitala en la Val Schons. Ils dretgs particulars dals Libers da la M. da disponer dal terren e da la persuna nun èn sclerids en detagl. Il plant dals conts da Werdenberg-Sargans dal 1434 pertutgant la refusa da

pajar tributs da prefectura sa drizzava er cunter ils Libers da la M. Suent'er la Guerra da Schons dal 1451-52 e la liberaziun da la val dal signur feudal il 1458 èn ils Libers da la M. s'incorporads en il cumin da Schons.

Litt: B. MANI, *Heimatbuch Schams*, 1958, 70-104. *Jürg Simonett*

Murbegn, vischn. en la provinza tal. da Sunder cun 11'101 abit. (2002), situada da la vart sanestra giudim la Vuclina a la sortida da la Val Gerola e da la Val del Bitto. En il tmtard. era M. ina citadina fortifitgada cun palazis gotics. Suent'er l'incorporaziun en il domini da las Trais Lias il 1512 è M. daventà sedia uffiz. d'in podestat. La citadina ha gi' ina fluriziun (agricultura, mastergn, commerzi), ella è dentant vegnida infestada repetidamain d'epidemias (pestilenza, malaria importada da las palids da l'Adda) e tribulada d'invasurs venezians, grischuns e milanais. Il 1526 ha il chastellan da Müsch, ch'era avanzà fin a M., subì ina sconfitta cunter ils Grischuns. Enturn la mes. dal 16. tsch. existiva a M. ina pitschna cuminanza ref. cun temporarmain dus preditgants ed in'atgna baselgia (S. Pietro). Pervi da la vischinanza cun l'Italia sa trategnevan bliers fugitivs religius ref. a M. L'inquisiziun ch'agiva davent da la baselgia da S. Antoni a M. ha provocà dispitas rel. cun la Republica grischuna. Suent'er il Mazzament en Vuclina il 1620 n'existiva pli nagina cuminanza ref. a M. Il 1563 è vegnì erigì l'emprim ospital en Vuclina. Dal 1592-93 è vegnida schlargiada la Via S. Marco tr. M. e la vischn. veneziana da Bergamo ad ina ruta da commerzi impurtanta (Via Priulana, Via del sale). Il 1635 ha il duca Henri de Rohan victorisà durant la conquista da la Vuclina cunter ils Spagnols en vischinanza da M. Il 18. tsch. è stà ina perioda da svilup ruassavel ch'ha purtà bainstanza a M. Il 1797 ha la radunanza da la Società Patriotica a S. Pietro-Berbenno declerà cun sustegn da la pop. da M. la separaziun da la Republica da las Trais Lias.

Litt: G.R. ORSINI, *Storia di M.*, 1959.

Martin Bundi

Murissen (tud. Morissen), vischn. pol. GR, cirq. Lumnezia, distr. Surselva (fin 2000 Glogn), situada al pe meridiunal dal Péz Mundaun, sur la via en Lumnezia. 12. tsch. *Mureinsene*, 1210 *Murerzens*, *Moraizen*. 1850 250 abit.; 1950 297; 1990 231; 2000 211. Prob. vegl territ. da colonisaziun. En il 13-15. tsch. èn doc. ministerials dal medem num. Enturn il 1290 bains feudals en possess da l'investgieu da Cuir, fin il 1370 prefectura dals Belmont, suent'er il 1390 dals Sax-Mesauc. Il 1538 è M. sa cumprada liber dals dretgs feudals episc. La baselgia da S. Giachen e Cristoffel, menz. il 1345 (cons. suent'er la reconstr. dal 1867/68 als SS. Giachen e Filip), è stada fin il 1907 ina filiala da la baselgia da S. Vintschegn a Pleif/Vella (1702 chaplania, 1806 curazia). Situada a la via da transit da Sursaissa al Cuolm Val, è M. s'unida econ. en il tmtard. cun Surcuolm, la vischn. vischina «da l'autra vart da la muntogna». 1630 separaziun en consequenza da dispita permanenta per l'utilisaziun dal guaud e dal pascul sin la spunda nord dal Péz Mundaun; cuminanza da pascul cun Surcuolm fin il 1895. La communitad purila rum. pratitgescha l'allevament da muvel e l'economia da latg. 1973-79 megliuraziun generala. Oz numerus pendularis a Glion e Domat, pauc commerzi al lieu, turissem (chalets da vacanzas). Cuminanza da scola e societad cun Cumbel dapi il 1980, center communal dapi il 1992.

Litt: Kdm GR 4, 200-02; Gem. GR 97 (1985); F. MAISSEN, «Historia dalla pleiv da M.», en: *ASRR* 90-93 (1977-80); CLAVADETSCHER/MEYER, *Burgenbuch GR*, 98.

Adolf Collenberg

Murmarera, vischn. pol. GR, cirq. Surses, distr. Alvra. Fin il 1950 vitg lung la via a la ruta dal Set e Güglia, oz sin la spunda orientala sur il Lai da M. 831 *ad Marmoraria cum taberna*. 1850 156 abit.; 1900 143; 1920 100; 1941 94; 1950 140; 1960 28; 1990 38; 2000 49. En il tm. era M. sut domini dals signurs

da Marmels; lur chastè, situà sut in cron, vegn menz. per l'emprima giada il 1193. Eccles. appartegna M. fin oz a Beiva (baselgia da S. Flurin). 1631-1925 pastoraziun tras chaputschins. Dal tm. fin en il 17. tsch. explotaziun da serpentinitis en il conturn da M. Fin il 1950 vivevan a M. o. t. purs da muntogna ch'avevan chattà dapi il tm. in'ocupaziun supplementara en la vituraria ed en il traffic sur ils pass. Immigraziun considerabla tras l'avertura da la viafier da l'Alvra (1903). Il 1948 ha la radunanza comm. da M. accordà a las OE-Turitg la concessiun per la constr. d'in lai da serra cun centrala a Tinizong. 1954 stagnaziun dal Lai da M. (2,5 km lunghezza) cun in mir da serra natural (l'emprim en Europa); il vitget da M. vegn mess sut aua. Cun il nov vitg da M., constr. sur il lai da serra, è svanida l'agricultura, las alps èn vegnidas affittadas utrò. Consorzi da scola cun Mulegns e Sur. Pop. rum. 1941 95%; 1980 41%; 1990 47% /68% (l.p./l.p. u disc).

Litt: A. GRISCH, *En viada tras Sursès*, 1915; P. ALEXANDER LOZZA o.c., «Adia, M.» (poesia), en: *Sulom* 32 (1953); E. BRUN, *Bergbau im Oberhalbstein*, 1986. Gion Peder Thöni

Müsch (tal. Musso), chastè e vischn. en la provinza da Com/I, situà da la vart dretga al nord dal Lai da Com. Lieu da cunfin e fortezza en il temp che las Trais Lias possedevan las Trais Plaivs (1512-31). Il chastè da M. era dapi il 1406 sco feud milanais en possess dals Malacrida. Enturn il 1500 en possess dal feldmarschal general Gian Giacomo Trivulzio ch'aveva renovà il chastè, costruì in port e rendì qua tras l'areal quasi inconquistabel; el aveva er erigì qua cularias da fier ed ina monetaria. Dapi il 1522 viveva sin il chastè da M. il chastellan Gian Giacomo Medici, numnà il *Medeghin*; quel aveva erigì sur il chastè in'ulteriura fortezza cun in foss insuperabel en il grip ed aveva munì l'entir implant cun chanuns ed indrizs da defensiun. Cun sia artigliaria dominava el davent da M. tut la part sura dal Lai da Com e disturbava il traffic. Il

1526 ed il 1531 ha el declerà la guerra als Grischuns. Il 1532 han quels destrüi l'entira fortezza. Pli tard han ins explotà marmel en la part sura da l'ant. implant ch'ins ha elavurà industrialmain ed exportà en il 19. e 20. tsch., p. ex. il 1850 per la renovaziun dal dom da Com.

Litt: L. CAROVE, *Il castello di Musso e le sue cave di marmo*, Milaun, s. a..

Martin Bundi

Müstair, claustra da benedictinas, avant l'empr. mes. dal 12. tsch. claustra da benedictins, vischn. da Müstair GR, uvestgieu da Cuira. A l'entsch. dal 8. tsch. *monasterium Tuberis* (Tuberis tenor la regiun da medem num, pli tard è la denominaziun vegnida transferida a la vischn. vischina da Tuer/Taufers), 1157 *Monasterium*, ca. 1170 *ecclesia sancti Iohannis Baptiste in Monasterio*. L'implant claustral monumental erigì en il davos quart dal 8. tsch. tenor il model vestfrancon è ina fundaziun da Carl il Grond u ina fundaziun dals uv. da Cuira influenzada dal spiert carolingic. Quel spiert religius ha era manà en il 8. tsch. a la fundaziun da las claustras pli pitschnas da Cazas, Mistail, Faveras e Mustér. La claustra da M., erigida sco residenza episc. e per segirar ils pass ad l'Imperi tr. l'Italia e la Baviera, è daventada l'onn 881 tras barat ina claustra privata da l'uv. da Cuira. Tenor ils cudeschs da fraternisaziun ha la claustra carolingica prosperanta pers sia impurtanza a la fin dal 9. tsch. En il 12. tsch. è M. daventada ina claustra da benedictinas. Sco claustra da mungias cumpara ella per l'empr. giada il 1163 suenter la refurma tras l'uv. Adalgott. La basa econ. han furmà o. t. donaziuns dals signurs da Tarasp, dals uvestgs da Cuira e dals conts dal Tirol sesents en V.M. ed en il Vnuost, en la Val da l'Adisch mesauna, en l'Engiadina Bassa, a Danuder ed en l'Ötztal. In prevost administrava ils bains.

En la baselgia-sala carolingica cun oriund. tschintg absidas èn mantegnidas frescas impurtantas dal tmtemp. europeic (temas cristians centrals e

scenas da la vita da David, creadas enturn l'onn 800). Quellas frescas èn vegnidas cuvernadas a la fin dal 12. tsch. cun picturas rom. (past da festa da Herodes, verginas scortas e tuppas, apostels, S. Steffan). Questas picturas èn indizis per ina fluriziun spirituala ed econ. da la claustra. Gia dal 11. tsch. datescha l'edifiziu nov da la residenza episc. (tur d'abitar da l'uv., claustrigl, chapella dubla dals SS. Ulrich e Niclà). En il 14/15. tsch. aveva la mistica ina impurtanza centrala en la claustra da M., sco quai che la veneraziun d'ina ostia dal ss. sang da Gesu e la festa da Sontgilcrest, introducida avant il 1300, ans mussan. Plirs *codices* cumprovan la tgira da la liturgia, da l'uraziun en chor e da la spiritualità individuala, p. ex. en innari dal 14. tsch. ed in cudesch da devoziun dal 15. tsch., l'autur dal qual crititgava la pietusadad superfiziala. Enturn il 1500 è la baselgia claustrala carolingica vegnida transmida en ina baselgia-sala gotica tradiva cun trais navs. En pli han ins reinstallà la tur Planta dal 10. tsch. e costruì la tur-baselgia.

Ils Artitgels da Glion dal 1524/26 han periclità la basa econ. e l'existenza dal convent. Ils uestgts han promovì en il spiert dal Concil da Trent (1545-63) cun las constituziuns dal 1600 e dal 1614 la vita religiosa, p. ex. la recepziun dal sacrament ed il brevier. Da l'autra vart han els remess p. p. la claustra en ses stadis dal tmtard., cumbain ch'ins aveva mitigià en il 16. tsch. div. reglas, sco il scumond dal *Saittenspil* u la prescripziun d'ina sala da durmir cuminai-vla. L'avugadia claustrala che cumpigliava la protecziun e la surveglianza da l'admin. e la tscherna da las abadessas era in feud da l'uv. Ils dretgts d'avugadia èn ids enturn il 1211 dals signurs da Tarasp als baruns da Matsch ed il 1421 illegitimamain sco feud ereditar a l'Austria. Il 1803 èn els vegnids transferids a la Regenza grischuna.

La situaziun pol. e confess. a l'ur ed ils dretgts dispitads tr. l'uv., las Lias e Habsburg han pregiuditgà durant tschientaners la sort da la claustra. Sa-

vens gievi per la tscherna e la conferma da l'abadessa e l'occupaziun dals uffizis da l'avugà, dal spiritual e dal prevost. L'avugadia è vegnida schliada il 1956 e la surveglianza transferida al Corpus catholicum. L'implant claustral vegn restaurà sistematicamain e perscrutà da da l'archeologia e da l'istorgia d'art dapi il 1947. Dapi il 1969 stat la claustra da M. sut protecziun da monuments, dapi il 1983 è ella in bain cultural mundial da l'Unesco.

Litt: I. Müller, *Geschichte des Klosters D.*, 1978; *HS III/1*, 1882-1911; R. Kaiser, *Churrätien im frühen Mittelalter*, 1998; H.R. Sennhauser, „Kloster M., Gründungszeit und Karlstradition“, en: *König, Kirche, Adel*, edì da R. Loose, S. Lorenz 1999, 125-150; *Reallex. der Germ. Altertumskunde*, 20 (2002²), 372-81.

Lothar Deplazes

Müstair (tud. fin 1943 uff. Münster), vischn. pol. GR, cirq. Val Müstair, distr. En. Vischn. pli gronda da la V.M., construida lung la via oradim la val il pli a l'ost da la Svizra. Al territ. communal da M. appartegna era la Val Mora che sa drenescha en direcziun dal Lai da Livign. Entsch. dal 8. tsch. *monasterium Tuberis*. 1835 513 abit.; 1850 475; 1900 599; 1950 776; 2000 745. Sut la stalla nord da la claustra han ins chattà la fundamenta d'in edifiziu che datescha prob. dal thronztard. La claustra da benedictinas cun la baselgia carolingica a trais apsidas dal davos quart dal 8. tsch. ha marcà fermamain l'istorgia da la vischn. Enturn la claustra sa gruppavan majarias; ina curt signurila dal 10. tsch. pudess esser stada ina donaziun da l'imp. Otto I a l'uv. da Cuira. La separaziun da M. dal territ. da Tuer (Tirol dal sid) è succedida prob. en il 13. tsch. Il 1239 è doc. per l'empr. giada in martgà, nua ch'i vegniva vendì ed exportà o. t. ponn grisch. Il 1367 è la dretgira V.M. entrada en la LCD. Avant la Guerra da Chalavaina (1499) era M. lieu da reuniun da las truppas grischunas, silsuent è la vischn. vegnida destr. tras truppas austr. Cuntrari a las autras vischn. da la val n'è M. betg vegnida reformada. Durant ils

Scumbigls grischuns è la vischn. puspè vegnida demolida. Il 1696 han chaputschins surpiglià la pastoraziun en il vitg (ospizi da chaputschins dal 1709). Il 1728 ha l'uv. da Cuira vendì la V.M. a l'Austria, il 1762 è quella vegnida recumprada. Il 1854 è M. daventada in vischn. autonoma. Dapi ils onns 1970 èn sa domiciliadas div. interpresas comercialas ed industrialas en la vischn. da cunfin; svilup d'in turissem moderà, tr.a. grazia al Parc naziunal. L'onn 2000 lavuravan 57% da las persunas cun activitad da gudogn en il 3. sector. Pop. rum. 1990: 91%/98% (l.p./l.p. u disc.).

Litt: P. NOLFI, *Das Bündner Münsterthal*, 1969²; I. MÜLLER, *Geschichte des Klosters M.*, 1978; D. PINÖSCH, *Val Müstair - Münsterthal. Geschichtschronik* (cun bibl.), 1983, 2002².
Paul Eugen Grimm

Mustér, claustra da benedictins en la vischn. pol. da M. GR, appartegna a la diocesa da Cuira. Patrunds: Maria, Martin, Pieder, Sigisbert e Placidus. La claustra da M., situada al curs superiur dal Rain Anterior è vegnida fundada enturn l'onn 700. 765 *Desertina*, 846 *coenobium Desertinense*, 1020 *abbatia Tisentinensis*, 1127 *monasterium Desertinensis*, e.a.).

Tenor la tradiziun (*Passio Placidi*, 12. tsch.) ha il muntg francon Sigisbert, purtà dal spiert irofrancon dal missiunar ed avat irlandais Columban a Luxeuil (F), erigì ina cella en la *Desertina*. El ha mess quella sut il patronadi da S. Martin, il sontg dals Francs, ch'ha dà qua tras il num a l'abazia. Sigisbert ha obtegnì sustegn da l'indigen Placidus, in dals possessurs ils pli pussants menz. en la *Lex Romana Curiensis* contemporanea. Sin cumond dal Praeses Victor a Cuira è Placidus vegnì assassinà. La tradiziun ha fatg da l'assassinat in martiri (festa dals sontgs claustrals Sigisbert e Placi ils 11 da fanadur). Ina claustra per propi è M. daventada enturn ils onns 750 sut l'avat Ursicinus. Da l'investg da Cuira Tello, in figl da Victor, ha M. survegnì vasts regals che pon bain vegnir chapids sco donaziuns d'ex-

piaziun (Testament da Tello 765). Confirm a la lavur culturala benedictina èn vegnidas urbarisadas las vals vischinas che M. aveva survegnì sco dotaziun. Il cudesch da fraternisaziun da Rechanau l'onn 810 numna gia 93 muntgs morts e 71 vivents cun nums retics, alemans, francons e langobards.

Las emprimas baselgias, cumprovadas tras exchavaziuns archeolog. dal 1980-83, dateschan dal 8. tsch. Enturn l'onn 800 suondan duas baselgias-sala a trais absidas tipicamain reticas, numnadamain la baselgia da S. Martin e la baselgia da S. Maria sco era la chapella da S. Pieder. En la baselgia da S. Martin era integrada la cripta da S. Placidus che appartegna ens. cun la cripta-rudè da S. Gliezi a Cuira a las emprimas criptas en Svizra. La tradiziun ha attribui la destrucziun dal complex claustral carol. a las invasiuns dals «Ungarais», la persecutaziun dentant a las invasiuns dals Saracens dal 940. Sco protectura dal Cuolm da S. Maria/Lucmagn ha la claustra da M. laschà eriger ospizis lung la via dal pass. La claustra imperiala è vegnida involucada en la politica da pass dals regents tud. Sut il domini dad Otto I (912-973) ha M. obtegnì donaziuns ch'èn vegnidas confermadadas da ses successurs. L'imperatur saxon Heinrich II (1002-24), che preferiva il Brenner al Cuolm da S. Maria/Lucmagn, ha surdà M. il 1020 al chapitel catedral da Brixen (Tirol dal sid). La claustra è restada silsuenter ina marionetta dals imperaturs. Ella è puspè vegnida privilegiada sut il Stauf Friedrich I Barbarossa (1152-90) ch'ha engrondì ses possess en la Lombardia. Il domini claustral, numnà *Casa Dei*, s'extendeva il 1185 da Breil al Pass dal Furca. Ils avats possedeavan la giurisdicziun criminala sur la glieud da la Chadè ed il dretg da fiera; els han era fundà plaivs independentas. Lur domini è però prest vegnì indeblì: administraturs laics èn doc. per Ursera il 1203 e per Medel il 1322. Sco convent imperial era la claustra da M. apparentamain suttamessa gia en il 12. tsch. ad in chastellan. Questa funcziun han exercità en servetsch dals conts da Lenzburg la

fam. de Torre, Heinrich da Sax-Mesauc il 1213 ed ils conts da Werdenberg a partir da la mes. dal 13. tsch. (cumprà liber il 1401). En il 12/13. tsch. han ministerials erigì lur chastels en il territori dal domini claustral.

Il 1251 cumpara la Cadi per l'empr. giada sco persuna giuridica. I sa tractava d'intermediar tranter il feudalissem e moviments d'autonomia. L'avat Johannes da Glion (1367-1401) ha accordà a la Cadi in mistral independent. L'avat è stà il 1395 confundatur da la Lia da Glion ch'ha confermà l'unificaziun pol. da las regiuns a la ruta sursilvana vers sid. Da quella è sortida il 1424 la LG. L'avat Pieder de Pultengia (1402-38) è stà a la testa dals sutsegnaders. Il 1472 ha M. s'acquistà il signuradi da Munt S. Gieri, ha però stuì conceder a la Cadi ulteriurs privilegis en connex cun la nominaziun dal mastral. Il 1477 è la vischn. da M. perfin sa segirada il dretg da protesta tar la recepziun da novizs ed ha surpiglià qua tras la rolla dals avugads claustrals. La claustra percunter ha incorporà ulteriuras plaivs ed ha expandì sia pussanza eccles. fin a Domat. Ils avats èn sa laschads attestar da l'imp. lur privilegis imperialis.

Las midadas provocadas tras la Refurmaziun han rinforzà supplementarmain la pussanza seculara. Ina disposiziun spez. stipulada en ils Artitgels da Glion dal 1524/26 segirava l'existenza da la claustra. Il 1536 è l'avat Martin Winkler (1528-36) sa convertì ens. cun trais muntgs a la cretta ref. Las autoritads da M. han però nominà in nov avat e salvà la claustra, surtut er per tema da perder ils vegls privilegis. Il 1539/40 ha l'avat stuì ceder il chastè da Munt S. Gieri als signurs ref. da Vuorz. Durant la Refurma cat. ha l'avat Cristian de Castelberg (1566-84) envidà il 1581 l'archuvestg milanais Carl Borromeo a M. ed ha rinforzà la refurma tridentina. L'abazia ha manà en ils onns 1587-96 ina scola per candidats spirituals, questas stentas da refurma e furmaziun n'han dentant betg pudì fitgar pe. Cur che l'avat Sebastian de Castelberg (1614-34)

ha stuì fugir durant ils Scumbigls grischuns da las truppas da Gieri Gienatsch, han las autoritads secularas surpiglià l'admin. da la claustra. Tras l'intermediaziun dal nunzi e da la Congregaziun svizra dals benedictins, en la quala M. era vegnida recepida il 1617, è la claustra sa revegnida sut l'egida da l'administratur ed avat Augustin Stöcklin (1634-41) da la claustra da Muri/AG. Sut l'avat Adalbert Bridler (1642-55) è la claustra sa separada da l'uvestgieu da Cuira, ella ha però cedì l'entira giurisdicziun a la vischn. Il 1649 ha la Val d'Ursera cumprà or ils dretgs da domini da M. Ils avats Adalbert de Medell (1655-96) ed Adalbert Defuns (1696-1716) han laschà eriger il nov edificzi claustral represchentativ en il spiert dal temp baroc tenor il plans dal frater Caspar Moosbrugger da Nossadunnaun.

En la Segunda guerra da coaliziun (1799-1801) è M. vegnì involvì en ils cumbats tranter la Frantscha e l'Austria. Il pader erudit Placidus a Spescha ha empruvà senza success d'intermediar. Ils 6-5-1799 èn vegnids intschendrats la claustra ed il vitg e cun quels n'èn ids a perder betg mo numerus stgazis d'art, mabain er l'archiv e la biblioteca claustrala. L'abazia ha pers ils possess vuclinais a Postalesio e radund la mesadad da la facultad claustrala. La claustra è vegnida preservada da la secularisaziun grazia al fatg che las davosas restanzas dal domini feudal eran gia vegnidas dismissas cun la liberaziun da Vuorz il 1734 e cun la dismessa da las dieschmas il 1737. Il spiert radical dal cumbat cultural ch'ha provocà l'aboliziun da numerusas claustras en Svizra, è era s'influenzà a M. Il 1859 è l'admin. da la claustra vegnida suttamessa a la controlla statale. Ultra da quai ha la Regenza grischuna impedì il 1861 la recepziun da novizs. Il medem onn è la giurisdicziun da la claustra vegnida suttamessa a l'uv. da Cuira. La restauraziun è stada pussaivla grazia ad in nov pensar dal pievel e da la Regenza, procurà dal redactur Placi Condrau da M., dal politicher Caspar Decurtins da

Trun e da Theophil von Sprecher da Maiavilla. Cun agid da la Congregaziun svizra dals benedictins è M. pudì sa revegnir. Benedikt Prevost, mess a disposiziun da la claustra da Muri-Gries (Bulsaun/I), ha cumbinà sco avat (1888-1916) l'innovaziun interna cun l'erecziun da la scola claustrala, la pastoraziun ed il pelegrinadi. Il 1895-99 ha el incumbensà August Hardegger da construir la nova baselgia deditgada a Maria. Sut ils avats Beda Hophan (1925-63) e Viktor Schönbächler (1963-88) è il gimnasi sa consolidà ed è daventà in center da furmaziun regional. Il complex claustral è vegnì engrondì tras l'internat il 1937-40 (Walther Sulser) e tras il nov edifiz da scola il 1969-73 (Hermann e Hans Peter Baur). En la baselgia da Hardegger reconstr. (Felix Schmid) è vegnidas integradas la biblioteca ed ina collecziun da l'istorgia culturala e natirala. A chaschun d'exchavaziuns archeol. en ils onns 1980-83 han ins segirà e rendì accessibla la cripta da S. Placi dal tmtemp. Il convent dumbrava il 2001 36 commembers, da quels 33 cun profess.

Litt: I. MÜLLER, *Gesch. der Abtei D. von den Anfängen bis zur Gegenwart*, 1971; I. MÜLLER, «Die Frühzeit des Klosters D.», en: *BM* 1986, 1-45; *HS* III/1, 474-512; W. JACOBSEN et al., *Vorrom. Kirchenbauten*, 1991, 93-95, (tom suppl.); G. CONDRAU (ed.), *Disentis/M.: temps vargai, temps present*, 1996.

Daniel Schönbächler

Mustér (tud. Disentis), vischn. pol. GR, cirq. Cadi, distr. Surselva (fin 2000 Rain Anteriur). M. è la pli gronda da las set vischn. da la Cadi ed er sia chapitala. La vischn. sa cumpona da Mustér-vitg sco center e dals vischinadis Mumpé-Tujetsch, Segnas, Acletta, Funs/Clavaniev, Disla, Cavardiras e Mumpé-Medel. Cun excepziun dals dus Mumpés cumpiglian ils vischinadis mintgamai plirs abitadis. 765 *Desertina*, 1127 *monasterium Disertinensis*. La culegna da Brulf da vart dretga dal Rain è vegnida sutterrada d'ina bova il 1689. M. è il center da la Sursassiala (sur la chavorgia da la Val Russein. La

vischn. sa chatta al spartavias sur ils Cuolms da S. Maria/Lucmagn e d'Ursera ed è il punct da colliaziun da la VR e da la Viafier Furka-Alpsu (VFA). Dapi il tmtard. è M. lieu da cumin. 1850 1'260 abit.; 1900 1'359; 1950 2'330; 1990 2'176; 2000 2'172.

A la periferia da la vischn. han ins fatg singuls chats dal tbronze e dal trom. Malgrà singulas culegnas presupponidas en temps preistorics è la Desertina tr. la Currezia e l'Italia langobarda vegnida colonisada pir a partir dal 7/8. tsch. L'istorgia da M. è colliada stretgmain cun l'abazia da S. Martin e ses domini, la Cadi. A partir dal 1285 possedevan ils subdits claustrals a M., ultra da la claustra e dals ministerials, in agen sigil. Entant che las curts ed ils aclauns èn restads pol. senza gronda impurtanza, han ils abitants da M.-vitg surpiglià in rolla directiva en la LG. En consequenza da la Refurmaziun ha M. engaschà a partir dal 1522 in maiordom da survegliar la facultad claustrala ed ils vischins elegivan dal 1538-1614 perfin l'avat. A partir dal 14. tsch. èn sa domiciliads Gualsers sin territori da M., o. t. a Mumpé-Tujetsch ed a Mumpé-Medel. Ils immigrants èn s'assimilads a la lingua rum. Radund 20 da lur bains ed aclauns èn vegnids abandonads. Ils chastels feudals dal tmaut, tr. a. Tra vaulta, Ragisch e Chischliun èn ids en muschna. L'origin da la baselgia princ. da S. Gion-Battista, menz. per l'emprima giada il 1261, nun è sclerì. La collatura possedeva la claustra, ed a quella è vegnida incorporada la plaiv il 1491. A la plaiv appartegnevan oriund. era la vischn. da Tujetsch, en pli, fin il 1500, il vischinadi da Medel. Dal 1648-1818 eran ils chaputschins responsabels per la pastoraziun, lura ils benedictins, dapi il 1879 plevons seculars. Cavardiras è daventà in benefizi da chaplania il 1713, Segnas il 1773. La baselgia da S. Gada, constr. il 1100 a la via veglia en la Val Medel, è la pli impurtanta da las 14 baselgias e chapluttas da M. Il 1251 cumpara la Cadi per l'emprima giada sco pers. giuridica. Suenter il 1643 possedeva la vischn. la giurisdicziun

cumplaina. L'emprima constituziun comm. è entrada en vigur il 1848 e cun l'introducziun da la Const. chant. è M. daventada ina vischn. pol. La funtauna da S. Placi, menz. il 1740, ha la pli gronda concentraziun da radium da la Svizra ed è vegniva explotada suenter il 1870 per ils bogns da l'hotel da cura Disentiserhof a l'entrada dal vitg. Il 1857 ha M. survegnì in access a la nova via chant. sur il Cuolm d'Ursera. Il medem onn è vegnida fundada la stamparia e chasa editura *Stampa Romontscha*. M.-vitg ha gì en il 19. tsch. ina fluriziun moderada. Il turissem da stad ed il commerzi e mastergn han prosperà pir suenter la colliaziun a la VR il 1912 ed a la VFA/FOB il 1926. Il 1952 ha Pius Condrau fundà la chasa editura Desertina ch'è sa concentrada l'emprim sin la litt. rum., pli tard sin ils secturs cultura ed istorgia. La chasa editura è vegnida vendida il 1994 a la Gasser SA. Dapi il 1960 è Mustér-vitg center da scola dal vischinadi, mo Segnas ha vivand ina scola primara. Il liceum clustral installà il 1927 è sa sviluppà ad in center da furmazion regiunal cun la renconuschientscha sco gimnasi tras la Confederaziun (1944). Suenter il 1965 è sa stabilida in'industria a M. (Landis & Gyr fin il 1988, dapi lura Distec/constr. da furmas e d'apparats). Dapi l'avertura da las pendicularas Péz Ault il 1971 è M. sa sviluppà a moda rasanta ad in center turistic. M. è ina vischn. da pionier sin il champ da la telecommunicaziun e da l'energia solara (Ovra solara Desertasol). Il cussegl comm. che cumiglia dapi il 1973 21 commembers vegn elegì libramain, igl è dentant usit da resguardar tut ils vischin. che possedan p. p. autonomia econ. Il 2001 lavuravan 15% en il 1., 63% en il 3. sector. Pop. rum.: 1990 78%/87% (l. p./l. p. u disc.).

Litt: Kdm GR 5, 2-4, 81-118; G. GADOLA, «Nies vitg, ses ucleuns e sias uclivas», en: *Fegl parochial de S. Gions*, 1959-62; I. MÜLLER, *Gesch. der Abtei D. von den Anfängen bis zur Gegenwart*, 1971; Gem. GR 39 (1983); G. CONDRAU (ed.), *Disentis/M: temps vargai, temps present*, 1996.

Adolf Collenberg

Mut, vischn. pol. GR, cirq. Alvaschagn, distr. Alvra. Culegna sin trais stgalims situada al sid sur il Meir, cun M. Sut (abità l'entir onn, 1'394 m), Stafel (1'761 m) e M. Sura (1'860 m). 1363 *unz uff die Mutten* 1803 98 abit.; 1850 132; 1900 193; 1910 99; 1950 125; 2000 80. Oriund. alps ed aclauns da Stierva e da Ziràn. Ils signurs territ. da Vaz paran d'avair colonisà il territ. cun Gualsers suenter il 1300. Cun Stierva furmava M. in quart dal cumin da Vaz, possedeve però in agen landamma ed a partir dal 1655 ina dretgira matrimoniala. Eccles. appartegna M. a Stierva. Il 1582 ha la vischn. adoptà la cretta ref. Baseligas èn vegnidas erigidas il 1583-84 a M. Sut ed il 1718 a M. Sura. Ils abitants da M. vivevan da l'allevament da muvel e da la cultivaziun dad ers en ina regiun isolada cun sendas precaras; l'agricultura sin trais stgalims aveva per consequenza che l'entira pop. midava domicil en il decurs da l'on. Dapi il 1851 è M. l'unica vischn. tud. e ref. en il cirq. d'Alvaschagn. La via constr. il 1869 (dapi il 1903 cun access a la staziun da la VR a Solas) ha pussibilità in turissem modest. Il 1946 è ina gronda part da M. Sura arsa giu. Il 1990 lavuravan anc 35% da las pers. cun activitad da gudogn a M. en il 1. sector.


Litt: R. Hotzenköcherle, *Die Mundart von M.*, 1934; *Kdm GR 2*, 290-92; *Gem GR 100* (1984).

Jürg Simonett

La tabla emblidada

Historia dalla tabla commemorativa per Arnold Escher
von der Linth, Placi a Spescha e Gottfried Ludwig Theobald
sper la punt Russein denter Sumvitg e Mustér .

Ivo Berther



Fotografia: Museum retic, Cuera

La veglia punt Russein, erregida 1857.
Xilografia da Themistocles von Eckenbrecher (entuorn 1865)

Survesida ed emblidada

«Sper la Punt gronda denter Mustér e Sumvitg regorda ina tabla commemorativa a treis perscrutaders da nossas muntognas. Strusch in pedunz che passa per la Senda Sursilvana, numdi ils automobilists preschai fan stem da quella.» Aschia s'exprima Augustin Manetsch en sia scartira sur da Placi a Spescha da 1990. Fuss la tabla vegnida fermada vid il grep pèr suenter l'erecziun dalla nova punt d'autos (1938), savess ins daveras far la reproscha als iniziants da buca gest haver eligiù il liug cun bien maun. Mo la tabla ei in tschuat onns pli veglia che la punt nova, 64 per esser exacts. Da lezzas uras passava il traffic per la punt lenn veglia, fageva pia ina menada anetga gest al pei dalla tabla. Mirau aschia era la tabla situada en in liug marcant ed exponiu che fageva tuttavia senn. Buca d'emblidar che la punt Russein, erigida 1857, valeva sco sensaziun tecnica ed era in'attracziun. E tgi che havess vuliu profetisar da lezzas uras che la punt lenn vegni pli tard stuschada agl ur d'aunc duas autras punts, fuss matei vegnius taxaus da fantast.

Era in'egliada en la litteratura muossa che la tabla ei vegnida negligida ed emblidada. Sper l'ovra citada para sulettamein Cristian Caduff da haver fatg cuortamein menziun dalla tabla ils davos onns en dus artechels sur da fatgs alpinistics en Surselva («Annalas» 1981 e «Bündner Kalender» 1992). Encuntercomi vegn la tabla ignorada aschibein en las historias da vischnaunca da Sumvitg e Mustér sco era en las pli novas descripciuns culturhistoricas dalla Surselva, respectivamein dalla Senda Sursilvana. Motiv: Quellas descripciuns partan en general dils vitgs anora. Situada agl ur dallas duas vischnauncas, ei la tabla semplamein vegnida emblidada.

E pli baul? 1879 ha Emil Zittel fatg menziun dalla tabla en sias brevs da viadi «Aus Disentis». Dus onns pli tard descriva Martin Truog en sia biografia da Gottfried Ludwig Theobald ina tabla da marmor nera (!) cun l'inscripciun: «*Den kundigsten Forschern des Bündner Oberlandes: Pater Plazidus a Spescha, Arnold Escher von der Linth und G. L. Theobald*». 1898 entscheiva P. Maurus Carnot sia enconuschenta historia dalla litteratura romontscha intitulada «Im Lande der Rätoromanen. Kulturhistorisch-litterarische Studie» cun ils plaids solems:

«*Wo im bündnerischen Oberland die Russeina unter der kühn-
geschwungenen Travaultabücke hindurch zur Verlobung mit*

dem jugendlichen Rheine eilt, trägt ein tannengekrönter Fels an seiner Brust eine Platte, welche <den Forschern rätischer Alpenwelt> gewidmet ist. Gross waren die Mühen und sind die Verdienste jener drei durch diese Felseninschrift verewigten Männer: sie haben dem rätischen Gebirge mit seinen Merkwürdigkeiten und dem kostbaren Geschmiede edlen Gesteines liebe- und mühevoll Forschung angedeihen lassen.»

La descripziun empau malgartegiada dalla tabla fatga entras Martin Truog para era Gustav Bener-Lorenz da haver surpriu 1938 en ina publicaziun intitulada «Ehrentafel bündnerischer Naturforscher» tier sia cuorta biografia da Gottfried Ludwig Theobald, plinavon Friedrich Pieth en sia «Bündnergeschichte» da 1945. Mo lain bandunar quellas menziuns plitost magherettas e mirar anavos sin gl'origin dalla tabla, vul dir sils onns 1873/74.

«In vengonz schege simpel monument»

La secunda mesadad dil 19avel tschentaner ha purtau en Surselva treis svilups ch'ei impurtonts en nies connex. Sco emprem ei da menziunar il svilup tecnic ed industrial ch'ei vegnius acceleraus en Svizra dil stadi federal da 1848. El ha purtau novas vias, punts, in cuors da posta pli regulau e spert, pli tard era la viafier. Sco secund svilup sa igl interess carschent d'ordvart per la regiun valer, seigi quei da vart da linguists che s'interessavan per il romontsch ni da scienziats ed alpinists che levan perscrutar ils cuolms. E la finala sco tierz svilup – ed empau pli tard – il moviment ch'ei vegnius enconuschents sut il num «renaschientscha romontscha». El marchescha ina schientscha carschenta dils Romontschs e Sursilvans per lur agen lungatg e cultura.

Ils treis nums silla tabla commemorativa marcheschan en quei senn quasi la simbiosa denter l'optica d'ordvart e l'atgna – pudess ins tertgar. Ins sto daveras s'avischinar bein alla tabla per engartar che tut ei stau empauet auter. Mo ussa pass per pass.

L'historia dalla tabla entscheiva 1873. El decuors da quei onn ha in tagliacrappa (cul num S. Hager sco ins sa leger agl ur dalla tabla) survegniu l'incumbensa da scalprar il suandont text en ina tabla da marmor alv:

DEN
 FORSCHERN RÄTISCHER ALPENWELT
 A. ESCHER VON DER LINTH
 UND
 G. THEOBALD
 1873.

Denton, alla sava digl onn 1874 era la tabla aunc adina buca fermada el liug previu. Ils 31 da december 1873 eis ella presenta l'emprima gada en ina gasetta, interessantamein el «Bund» che cumpara a Berna. Igl interess dil «Bund» per schabetgs el Grischun ei bein d'attribuir al fatg che Andreas Rudolf von Planta da Samedan era staus in dils confundatur dalla gasetta 1850. Plinavon figurescha Johann Karl Tscharner da Cuera da 1850 entochen 1874 sco redactur tier il «Bund». Siu interess per cultura e natira da sia patria haveva Tscharner gia demussau 1842 cun la publicaziun «Der Kanton Graubünden historisch, statistisch, geographisch dargestellt für einheimische und fremde Reisende». En la numera menziunada reporta il correspondent «O.» sur da different fatgs politics ord il cantun Grischun e cuntinuescha silsuent:

«Zum Schlusse noch eine Mittheilung, die uns von kompetenter Seite gemacht wird und kaum bekannt sein dürfte. Wie Sie wissen, hat sich das leider nunmehr verblichene Freundespaar Escher von der Linth und Professor Theobald große Verdienste um die geologische Erforschung der rhätischen, namentlich aber der Oberländer Alpenwelt, erworben. Dank den Bemühungen einzelner Privaten aus dem Oberlande, soll nun den beiden Unvergeßlichen an den Felswänden ob der Russeiner Brücke bei Disentis, da, wo aus dem Hohenbalkentobel sich der Gießbach in den Rhein stürzt, eine marmorne Gedenktafel angebracht werden mit der Inschrift: <Arnold Escher von der Linth und Theobald, den verdienten Forschern surselvanischer Alpenwelt>. Bei diesem Anlasse möchten wir auch an den alten, freidenkenden Benediktiner a Spescha erinnern, den kühnen Bahnbrecher für geologische Kunde an den Ufern des Vorderrheins.»

Ils 3 da schaner 1874 fa era la «Neue Zürcher Zeitung» menziun digl artechel cumparius el «Bund». Silsuent s'annunzia la «Gasetta Ro-

montscha», numnadamain ils 9 da schaner: «*In correspondent el Bund manifestescha la biala idea de metter ella preitgrepp sper la pun Russein ina tabla de marmor culs nums dils defuncts professors Escher e Theobald, ch'ei sefatgs meriteivels per il mund alpin sursilvan tras lur studis geologics. In vengonz schege simpel monument, pil qual ei vegness flessiar bein enqual subsidi en Surselva.*» Ed in di pli tard san ins era leger en la gasetta «Alpenpost. Repertorium der gesamten Alpenkunde und Touristik» cumparida a Turitg:

«Disentis. Eine Gesellschaft dankbarer Bündneroberländer hat beschlossen, dem für die geologische Forschung der Schweizeralpen leider allzfrüh verstorbenen edlen Freundespaare Arnold Escher v.d. Linth und Prof. Theobald in den Felswänden ob der Russeiner-Brücke bei Disentis, da, wo aus dem Hohlenbalkentobel sich der Giessbach in den Rhein stürzt, eine marmorne Gedenktafel anzubringen mit der Inschrift: <Arnold Escher v.d. Linth und Theobald, den verdienten Forschern subsilvanischer [!] Alpenwelt>».

Las gasettas da lezs onns duvravan daveras buca relatar als lecturs da tgi ch'ei setracti tier quels dus umens. Morts omis dus paucs onns avon, eran els aunc en buna memoria aschibein en Surselva sco en gl'entir Grischun.

Gottfried Ludwig Theobald (1810–1869)

Gottfried Ludwig Theobald ei oriunds dad Allendorf sper Hanau (Hessen). Carschius si en ina famiglia da predicants, ha el sez studegiu teologia e perdegau a Hanau. Suentier engaschaments sco scolast a Montpellier (Frontscha dil sid) ed en sia patria ei igl onn dalla revoluziun da 1848 vegnius. Muort sias activitads politics ei Theobald staus sfurzaus d'encurir exil suenter il naufragi dalla revoluziun. La Svizra, da lezzas uras in'insla republicana enamiez monarchias, ha priu si el sco biars auters fugitivs politics. Suentier dus onns d'instrucziun a Genevra eis el vegnius eligius scolast per historia naturala alla Scola cantunala a Cuera (1854). El Grischun ha el buca mo agiu 15 onns sco scolast, mobein era perscrutau natira e cuolms sco buc in avon el. Geologia, botanica, zoologia, meteorologia, topografia... ei deva strusch in fenomen ella natira che havess buca interessau el. Tier sias lavurs geo-

logicas ha el denter auter saviu sebasar sin studis preparatorics da siu amitg Arnold Escher von der Linth.



Fotografia: Peter Metz, Geschichte des Kantons Graubünden II, 1991


Gottfried Ludwig Theobald (1810–1869)

Cun numerusas publicaziuns e referats ha Gottfried Ludwig Theobald fatg enconuscentas sias perscrutaziuns ad in publicum pli vast. Tier sias publicaziuns principalas s'audan «Naturbilder aus den Rhätischen Alpen» (1860) e «Das Bündner Oberland» (1861). La davosa ovra vegn bein ad esser il motiv principal, daco che siu num ei vegnius perpetnisaus sin la tabla en la Val Russein. Quei cudisch da varga 200 paginas cuntogn daveras in panopticum da geografia, historia naturala, cultura e historia dalla Surselva sco buca ina publicaziun avon. Quel che viseti la regiun, aschia Theobald en l'introducziun da si'ovra, «*wird in unserem Oberland ein Land finden, das an hohen Schönheiten der verschiedensten Art, an lieblichen wie an grossartigen, wilden und schauerlichen Bildern der Natur hinter keinem andern Alpenland zurücksteht, und nur bekannter werden muss, um denselben Ruf zu erlangen.*»

Gottfried Ludwig Theobald ei era staus commember da fundaziun dil Club alpin svizzer (1863) e dalla secziun grischuna Rätia (1864). Plinavon eis el staus biars onns ella suprastanza dalla Societad svizra per la perscrutaziun dalla natira e medemamein ella suprastanza dalla secziun grischuna da quella societad. Per siu engaschi en favur dalla perscrutaziun dalla natira ha il Cussegl grond concediu ad el igl onn 1864 il dretg da burgheis grischun.

Arnold Escher von der Linth (1807–1872)

Sper Gottfried Ludwig Theobald ei era Arnold Escher von der Linth da Turitg d'anflar els onns sisonta denter ils commembers dalla Societad svizra per la perscrutaziun dalla natira ed el Club alpin svizzer. En la secziun grischuna dalla Societad per la perscrutaziun dalla natira eis el vegnius recipius sco commember d'honor. Siu bab, igl enconuschent Hans Conrad Escher, haveva agiu sco scienziau, pictur,



Fotografia: Schweizer Lexikon 1991, tom 2

Arnold Escher von der Linth (1807–1872)

professer e politicher. Il canal dil Linth denter il Lag rivaun ed il Lag da Turitg va anavos sin sia persuna, plinavon in'immensa quantidad da panoramas da cuntradas svizras, aschia era dalla Surselva. Arnold Escher von der Linth haveva gia accumpignau da buob siu bab sin ses viadis e turas. Suenter studis a Genevra, Berlin e Halle ha el dociu geologia all'universidad ed al politecnicum da Turitg. El ei staus igl emprem che ha intercuret a moda sistematica la geologia dallas Alps en Svizra, el Vorarlberg, el Tirol, en la Lombardia ed el Piemont. Plinavon eis el vegnius consultaus per differentas expertisas, denter au-ter tier il tunnel dil Gotthard. Medemamein eis el staus engaschaus en connex cun catastrofas dalla natira, aschia 1834 tier l'aua gronda en il Grischun.

Arnold Escher von der Linth sez ha publicau ina carta geologica dalla Svizra e schiglioc plitost pauc. Encuntercomi ha el fatg accessibels ses diaris ad auters, en emprema lingia a Bernhard Studer per sia studia «Geologie der Schweiz» (1851-1853). Dalla relaziun d'Arnold Escher von der Linth tier Gottfried Ludwig Theobald e tier la Surselva relata ina biografia cumparida en il rapport annual dalla Societad grischuna per la perscrutaziun dalla natira 1872/73:

«Theobalds Arbeiten erregten gleich von Anfang an seine ganze Theilnahme, und stellte er demselben seine Tagebücher gänzlich zur Verfügung. Die Erforschung des Oberlandes versprach eine zum Theil gemeinschaftliche Arbeit der beiden Männer zu werden, indem Escher an der glarnerischen Seite die Tödigruppe, wie Theobald an der bündnerischen thätig waren; der frühe Tod des Letzteren trat leider unterbrechend dazwischen.»

Auter che Gottfried Ludwig Theobald ha Arnold Escher von der Linth perscrutau in territori bia pli vast ch'il Grischun. Gie, il Grischun stat atgnamein gnanc el centrum da sia lavur e sur dalla Surselva sezza ha el publicau neginas lavurs specialas. Sia attaschadadad per quella regiun ha auters motivs. Duront siu temps da studi a Berlin habitava el en la medema casa sco Alois de Latour da Breil. L'amicezia denter ils dus students ha menau Arnold Escher von der Linth sin vi-seta a Breil. E sco il destin meina las caussas... Igl onn 1857 ha Arnold Escher von der Linth maridau Barbara (numnada Bina) de Latour, la sora dad Alois. Quellas nozzas denter il protestant turitges e la

catolica da Breil paran dad esser stadas ina fatschenta ualti hanada. Oswald Heer, il biograf dad Arnold Escher von der Linth, scriva sur da Bina de Latour: «*Sie liebte Escher herzlich und gab ihm im Sommer 1848 ihre Hand, sie wollte aber die Verbindung nur mit Einwilligung der katholischen Kirchenbehörden eingehen.*» Quels disputs confessionalas ein bein stai la cuolpa che la lètg ei vegnida serrada pèr biebein diesch onns pli tard. Tenor indicaziuns els archivs dallas pleivs han ins anflau in cumpromiss denter las duas confessiuns cun far maridar ils nozzadurs duas gadas, numnadamein ils 26 d'uost a Breil (en teschamber!) ed ils 31 d'uost a Vuorz.

Il ligiom dad Arnold Escher von der Linth cun la Surselva ei pia en emprema lingia sedaus sur sia dunna oriunda da Breil. E Breil ha saviu seprofitar. Aschia per exempel tier l'erecziun dalla via nova denter Vuorz e Breil igl onn 1870. Sin quei fatg muossa era la «Gasetta Romontscha» vi el necrolog dad Arnold Escher von der Linth:

«Cunzun ils vischinadis de Breil e ded Uors han d'engraziar bia a quei niebel um. Per la via nova ha el participau la bella summa de fr. 3000 senza dumbrar ses numerus beinfatgs. Sin il crap della <Crusch> sper Breil stat siu num sco quel ded in dils pli caulds promoturs della via, mo quei ei mo ina fleivla ensenna della renconoschienscha, che nus duein al defunct.»

Ina part dil legat da 15'000 francs per l'erecziun d'uauls da schurmetg che Arnold Escher von der Linth haveva fatg si, ha la Surselva medemamein saviu trer a nez. Tenor scriver dalla «Gasetta Romontscha» dils 19 d'october 1873 «*ha la societad cumunizeivla concludiu de dar 5000 fr. alla Lunghezza per schar plantar uaul tenor plan de forst-inspector Coaz*». Ils 13 da november 1874 precisescha la «Gasetta Romontscha» che la plantaziun vegni tschentada sin territori dalla vischnaunca da Morissen: «*Ventireivlamein ha Morissen acceptau las condiziuns ed aschia ha la plantada saviu prender la sia entschatta quest matg vargau. Ad interim ei vegniu assignau ual sur S. Carli in spazzi de circa 30 tschaveras della pli biala pastira.*» E cun euforia finescha quei artechel: «*L'entira interpresa fa schon ussa ina sorprendenta impressiun e vegn a daventar ina nova decoraziun della classica spunda dil Mundaun.*» Rodund siatonta onns pli tard ha la vischnaunca da Morissen tschentau a Gatreis (denter Morissen e S. Carli) in crap commemorativ cun l'inscripziun: «*Per memoria de prof. dr. A.*

Escher v.d. Linth 1807–1872, promotur digl uaul de S. Carli, vischnaunca Morissen 1945».

Commemoraziuns

La muntada scientifica aschibein dad Arnold Escher von der Linth sco da Gottfried Ludwig Theobald ei vegnida renconuschida gia dals contemporans. Suenter lur mort ha ei dau liungs necrologs e differents commemoraziuns. La Societad grischuna per la perscrutaziun dalla natira e la secziun Rätia dil Club alpin svizzer han decidu cuort suenter la mort da Gottfried Ludwig Theobald da procurar per in crap fossa da granit cun l'inscripziun «*Dem kundigsten Forscher der rhätischen Alpen*». 1871 ein Gottfried Ludwig Theobald ed Arnold Escher von der Linth vegni eligi ensemen cun auters pioniers digl alpinissem sco commembers d'honor dil Club alpin svizzer e quei sco «*Coryphäen der Wissenschaft und der Erforschung der Alpenwelt*». Arnold Escher von der Linth da sia vart ha gia obteniu igl onn 1873 ina voluminusa biografia da Oswald Heer da Glaruna, professor per botanica a Turitg.

Aschia sa era l'idea d'installar ina tabla commemorativa en la Val Russein valer sco tipic affon dil temps. Mo tgi ein propi stai ils iniziants da quella tabla? En gl'artechel cumparius en la «Gasetta Romontscha» tier l'inauguraziun dalla tabla croda en quei connex il num da Heinrich de Latour (1821–1877). El s'auda tier in dils davos descendants da quella veglia famiglia da mercenaris da Breil ch'ei sedecidius per la carriera militara. Gia baul eis el entaus en il regiment svizzer en survetsch papal ed ha surviu leu sco offizier sut il commando da siu bab, Caspar de Latour. Suenter la revoluziun da 1848/49 en l'Italia ei Heinrich de Latour turnaus anavos en il Grischun e secasaus a Cuera. Sia carriera militara ha el cuntinuau en la miliza grischuna. 1852 eis el daventaus cumandant districtual, 1854 major e 1857 colonel districtual. Plinavon eis el staus administratur dil sisavel district federal per la fabricaziun da puorla da sittar.

Sco zavrin dad Aluis e Bina de Latour ha el era fatg l'enconuschientscha dad Arnold Escher von der Linth. Il medem selai bein era dir en connex cun Gottfried Ludwig Theobald, menziunescha lez gie en sia ovra «*Im Bündler Oberland*» cusseglier naziunal Caspar de Latour, il frar da Heinrich, sco informant e bien amitg. Plinavon ei Heinrich de

Latour staus commember dalla Societad historica grischuna e dalla Societad grischuna per la perscrutaziun dalla natira, nua ch'el ha medemamein giu caschun da far l'enconuschientscha dils numnai.



Fotografia: Archiv de Latour, Breil

Heinrich de Latour (1821–1877)

Schebein Heinrich de Latour ei staus il sulet iniziand ni tgi che ha eventualmein susteniu sia idea da tschentar ina tabla commemorativa sper la punt gronda, ei buca documentau en las fontaunas avon maun. Las relaziuns descrettas e la remarca en la «Gasetta Romontscha» laian en mintga cass supponer ch'el hagi tgamunau l'entira interpresa. Cun quei fuss pia la historia dalla tabla scretta: Zacu el decuors digl onn 1874 vegn ins ad haver fermau la tabla en regurdientscha da Gottfried Ludwig Theobald ed Arnold Escher von der Linth sper la punt Russein, e quei fuss ei lu stau – pudess ins tertgar. Avon che la tabla ei definitivamein setschentada el liug destinau, ha ei denton aunc dau in intermezzo. Las rollas principalas en quei davos act giogan in giuven scolar dalla Scola cantunala cul num Caspar Decurtins ed in pader dalla claustra da Mustér, morts rodund 40 onns avon, cul num Placi a Spescha.

In referat en absenza digl autur

Ils 22 da december, 1873 ha Alexander Balletta da Breil prelegiu en la Societad historica grischuna a Cuera ina lavur sur da veta ed ovra da pader Placi a Spescha. Scret quella lavur haveva Caspar Decurtins da Trun. Igl autur sez era, cun ses 18 onns e sco studiosus dalla Scola cantunala, aunc memia giuvens e nunenconuschents per sez astgar esser presents. Anzi, igl ei stau ina honur per el che sia lavur ei in-summa vegnida prelegida el cerchel dils erudits studegiai.

En ver Paid ei quei buca stau igl empren referat ord sia plema. Ella sezciun grischuna dall'uniun studentica Zofingia alla Scola cantunala ha el gia tenu il november 1872 in referat «Über Sage und Volksdichtung des romanischen Oberlandes», cumparius l'entschatta 1873 sin romontsch en «La Ligia Grischa» ed el decuors dil medem onn en la «Feuille centrale, organe officiel de la Société de Zofingue» sin tudestg. Medemamein 1873 ei cumpariu en la «Feuille centrale» ina cuorta biografia dil linguist e litterat engiadines Zaccaria Pallioppi scretta da Caspar Decurtins. L'entschatta schaner 1874, pia cuort avon il referat sur da Placi a Spescha, ha Decurtins plinavon referiu el ravugl dils Zofingers sur da «Der Krieg des Bündner Oberlandes gegen die Franzosen». Era Giachen Hasper Muoth ed Alexander Balletta ein stai presents ed han ludau il referent, sco ins sa leger el protocol. Quei referat ei medemamein cumparius el decuors digl onn 1874 sin tudestg en la «Feuille centrale».

Il giuven Caspar Decurtins pudeva pia gia esser enconuschents empau en la scena da students e tier ils lecturs dalla «Ligia Grischa». Ils studegiai da lungatg tudestg ella capitala vegnan denton strusch ad haver udiu grondas dil giuven student avon che siu referat vegni prelegius. Ed el ha buca trumpau igl auditori. El protocol dalla Societad historica grischuna vegn il text dil student «J. [!] Decurtins» ludaus:

«Der jugendliche Verfasser hat das Material zu dieser anregenden Monografie mit großem Fleiße zusammengetragen und die hinterlassenen Manuscripte Speschas mit Eifer gelesen. So ist es ihm gelungen, ein naturwahres und lebenswarmes Bild von dem Leben und der Wirksamkeit des seltenen Mannes zu entwerfen. Die Wahrnehmung, daß auch ein junger Nachwuchs das Feld rätischer Geschichtsforschung zu betreten beginnt, erfreut in hohem Grade die Mitglieder der Gesellschaft.»

«Cun nunstunclenteivel iffer»

Era las gasettas han fatg menziun dil referat. Il «Bündner Tagblatt» dils 26 da schaner 1874 lauda la *«sehr schöne und fleißige Arbeit des Kantonsschülers Decurtins»* e muossa vi detagliadamein sin veta ed ovra da Placi a Spescha. *«Bei einer sorgfältigen Sichtung dürften die Schriften Spescha's noch immer eine reiche und interessante Ausbeute versprechen. Die mühevollen Arbeit wäre lohnend und verdienstvoll. Möge sie bald ihren Meister finden!»*

Ed era la «Gasetta Romontscha» ha schau suandar ils 30 da schaner in artechel pli liung en quei connex:

«(Termess en.) La Surselva cun sias bellezias della natira e sia bucca meins originala historia ei entochen el novissim temps pauc stada enconaschenta al mund exteriur. Rars ein entochen dachau ils scribents, ils quals han sedau bregia d'investigar e publicidar la historia de nos perdavons e duvrau lur plema per describer la bellezza de nossa cara patria. Ils pli intressants documents historics de quella schaien eunc per la pli part ella puorla ed ein eunc mai tratgs alla glisch. Ei nus legra per quei de saver relatar, ch'il talentus giuven Caspar Decurtins de Trun, de present scolar della scola cantonala, incitatus d'in extraordinari patriotismus, applichescha gia ses giuvens ons e ses bials talents cun nunstunclenteivel iffer al studi della historia della patria.

Schon igl onn passau ha nies giuven scribent surdau alla publicitat ina interessanta collecziun de anticas novellas popularas (Volkssagen), las quallas circuleschan eunc denter il pievel grischun tscheu e leu. Ils 22 d.q. ha il numnau giuven legiu avon ella societad historica-antiquaria a Cuera ina intressanta historia dil renomau naturalist Pader Pl. Spescha, conventual della venerabla claustra de Mustèr, la qualla ha enflau gron applaus tier ils auditurs, e vegn sin giavisch de biars comparer en squetsch.

Cun gronda deligenza e perseveronza ha Decurtins rimnau ensem ten sco pusseivel, cun agit de buns amitgs, ils eunc existents products scientifics e topografics dil renomau Pader. Ils numerus citats ord las scartiras de P. Spescha, nua ch'el describa detagliadamein sias frequentas excursiuns sils quolms en Surselva e duront siu exil el Tirol, ses studis mineralogics, ses entruidamens per emeglieraziun della cultura d'uuals,

d'alps e pli rendeivel tractamen dil latg, sia premura pil pauperesser, siu patriotismus duront l'ujarra franzosa, siu exil el Tirol etc. etc. ein zun intressants ed instructivs per scadin Sursilvan. – Nus sperein de cul temps era saver comunicar al pievel romonsch la ludeivla lavur dil Student Decurtins, e giavischein ad el per denton perseveronza en ses studis historics sur nossa Surselva.»

La «Gasetta Romontscha» ei buca la suletta che muossa interess da publicar la lavur da Caspar Decurtins. Dal fevrer entochen il fenadur 1874 cumpara il referat en il «Fremdenblatt» dals loghens da cura dil Grischun. Era la Societad grischuna per la perscrutaziun dalla natira ha mussau interess vid il text. Ils 9 da mars 1874 protocolescha la suprazion il giavisch da publicar la lavur da Placi a Spescha el rapport annual dalla societad. Il president Eduard Killias ha surpriu da contactar Caspar Decurtins. Decurtins saveva denton sez tgei ch'el leva. En la sesida dils 16 da mars rapporta il president, «*Decurtins habe sich dazu entschlossen, seine Arbeit über Pl. a Spescha als besondere Broschüre drucken zu lassen*». Daveras cumpara la biografia el decuors dalla primavera 1874 cun ina introducziun dad Eduard Killias. Tetel dalla lavur: «*Pater Placidus a Spescha – Lebensbild eines rhätischen Forschers*».


All'entschatta d'ina gronda carriera – e d'in mitos

En emprema lingia ei Caspar Decurtins (1855–1916) vegnius enconuscents sco politicher conservativ e social e sco editur dalla Crestomazia. Carschius si a Trun sco feagl dil miedi e mistral Cristian Luregn Decurtins e da Margreta Catarina de Latour da Breil ha Caspar Decurtins visitau il gimnasi a Mustér (1867/68–1870) e pli tard a Cuera (1870–1874). Suenter la matura (1874/75) ha el studegiu historia, historia d'art e dretg statal a Minca e Heidelberg (doctorat 1876) e silsuenter in semester giurisprudenza a Strassburg.

Ses biografs laian pil pli cumparer Caspar Decurtins ella schientscha dalla populaziun cul cumin da 1877: Il giuven, nunenconuscent student ascenda la buora, tegn in plaid fulminont per salvar la claustra e vegn eligius spontanamein sco mistral. Senza dubi ha negin quintau 1877 ch'il manti da mistral mondi al giuven student da Trun. Era Caspar Decurtins buc, ch'era dil reminent aunc memia giuvens

quei onn per saver representar la Cadi sco deputau el Cussegl grond. La moda e maniera co differents biografs accentueschan la muntada dil cumin da 1877 per la carriera da Caspar Decurtins lai denton perscher aunc in'otra finamira (ch'ei dil reminent era vegnida contonschida), numnadamain da crear in mitos entuorn la persuna da Caspar Decurtins. Ils biografs circumdeschan sia persuna cun l'aura da quel che vegn ord il nuot – e spendra la claustra.

Las activitads da Caspar Decurtins gia entuorn ils onns 1873/74 datan denton in auter maletg. Cun ses referats e publicaziuns recipi a moda fetg beinvulenta, gie bunamein euforica en la «Gasetta Romontscha» era Caspar Decurtins tut auter che nunenconuschents tier la populaziun dalla Cadi igl onn 1877. Ed il referat e publicaziun sur da Placi a Spescha dall'entschatta 1874 ein buca stadas sias davosas activitads da quei gener duront ils onns da studi. Gia il fenadur 1874 cumpara siu num en in artechel dalla «Gasetta Romontscha» sur da «*novellas popularas (praulas)*»:



Fotografia: Carli Fry, Caspar Decurtins, tom 1, 1949

Caspar Decurtins (1855–1916)
enamiez ses collegas da studi a Strassburg 1876/77

«Ina collecziun de tallas praulas, che circuleschan particularmein denter il pievel della Cadi, ha il premurau student Caspar Decurtins da Trun el novissim temps surdau en squetsch alla publicitat en lungatg tudestg. Penetraus dad ina particulara amur per sia patria, lavura quei giuven cun nunstunclenteivla premura e deligenza vid il scriver si ils scazis historic, scientifics e characteristics de nossa Surselva; ed ei gliei reusiu a sia perseveronza de rimnar ensemen in considerabel diember de praulas, consideradas da biars per misteris de familia. Quellas ein zun adatadas per allegrar compagnias e divertir innocentamein auditurs e lecturs. Igl auctur ha schau comparer la racolta de sia deligenza, sco appendix d'ina semglionta ovra de Sgr. Jecklin a Cuera, en fetg popular lungatg tudestg. Semgliontas raquintaziuns ein tradiziuns ord il temps vegl, fetg adatadas per designar il character de nos vegls perdavons e dil temps vegl en general, sco era intressantas e fritgeivlas fanteunas per studis mithologics. L'ovra meritta per quei motiv d'esser recomandada! – El decuors de quest on vegn eunc comparer en squetsch dal medem ina continuaziun de praulas, plinavon novas intressantas lavurs sur ils usits ed ils giugs d'affons el cantun Grischun. Conclusivamein recomandain nus eunc al pievel della Surselva, de vuler esser gidonts al giuven scribent en ses studis cun metter curteseivlamein en sia disposiziun scartiras anticas d'interess historic.»

L'entschatta dall'uiara 1875 cumpara sia ovra sur dall'uiara da 1799 en Surselva medemamein el «Fremdenblatt», plinavon sco squetsch separat. Igl avrel 1875 ha el tenu en la Societad retoromontscha in referat sur da canzuns popularas romontschas. El ha saviu rapportar en quei referat da haver rimnau cun gidonters buca meins che 500 canzuns popularas. 1876 ha el publicau studias sur da praulas sursilvanas, proverbis, reglas da purs e grammatica romontscha en la revista «Romanische Studien», edida a Strassburg da Eduard Böhmer, e «Studien aus dem Bündner-Oberlande. I. Das rätoromanische Märchen» en la revista «Monatrosen», igl organ dall'uniun studentica catolic-conservativa. 1877 ei plinavon sia dissertaziun sur da Clau Maissen cumparida en squetsch. Daveras in'activitad sorprendenta sin camp cultural.

Mo era politicamein ei Caspar Decurtins gia staus activs avon sia elecziun sco mistral, numnadamein en l'uniun studentica Zofingia. Sper ils referats culturhistorics menziunai cheu sura ha el tenu en la secziun grischuna da quell'uniun differents referats politics e naziuna-

listics, aschia per exempel ils 22 da november 1873 en rama dil «Grütli-Commers». Gl' uost 1874 ei lu la damonda vegnida dilucidada, schebein la Zofingia duei seligiar cun l'uniun da students Helvetia che haveva ina tenuta radicala, adversaria alla politica (catolic-)conservativa. Sco president ha Caspar Decurtins representau la secziun grischuna tier quella impurtonta radunonza a Zofingen. La «Gasetta Romontscha» dils 28 d' uost 1874 rapporta:

«Encunter quella nova alianza ed odiusa exclusivadat ein se-schai si resolutamein Sgr. Caspar Decurtins de Trun ed il teolog protestant de Vat Lecoultré. Igl'empre ha giu l'honor de tener il plaid festiv, ed ha cheu mussau si ord la historia della patria, ch'il patriotismus segi tuttavia bucca in privilegi mo dad ina partida politica ne ded ina confessiun, in anfli daper-tut buns amitgs della patria, ed ei fussi perquei era in gron entiert encunter la fin e mira dell'uniun de Zofinga sch'in lessi dar a quella in colorit politic e radical.»

La finala ein las duas uniuns studenticas buca seligiadas. Denton era Caspar Decurtins sco ei para buca setenius en tuts graus vid las directivas che la secziun haveva dau ad el sin via. Suent'er admoniziuns ed ina corrispondenza che ha culminau en in «*freches Schreiben*» da Decurtins digl' october 1874, eis el vegnius exclaus l'entschatta 1875 ord la Zofingia. Sco gia viu ei Caspar Decurtins d'anflar cuort suenter ell'uniun studentica catolic-conservativa.

Placi a Spescha (1752–1833) vegn rescuvretgs

Mo anavos puspei tier la historia dalla tabla: Suent'er il referat da Caspar Decurtins era in num en bucca da tuts: Pader Placi a Spescha. Naschius e carschius si a Trun ei Spescha entaus igl' onn 1771 en la claustra da Mustér. Suent'er studis da filosofia e teologia a Nossadun-naun ha el pastorau en differentas pleivs dalla Surselva. Placi a Spescha ha prestau lavur da pionier sil sectur digl' alpinissem (numerusas premascensiuns) e dil cavar cristallas. Medemamein ha el skizzau differentas cartas geograficas dalla regiun. Dasperas ha el perscrutau literatura e lungatg romontsch e scret differentas lavurs sur da historia, cultura e pievel dalla Surselva. Duront l'uiara da 1799 ha el agiu sco intermediatur denter ils indigens e las truppas franzosas. Cun il bar-



Fotografia: Museum retic, Cuera

Placi a Spescha (1752–1833)

schament dalla claustra dil medem onn ha el piars ina gronda part da ses maunscrets. Muort sia simpatia per la Revoluziun franzosa eis el vegnius deportaus per 18 meins en l’Austria.

Placi a Spescha sez ha buca publicau bia. Malcapius da ses conventuals e dallas pleivs nua ch’el pastorava, eis el darar vegnius vegls en in liug, plitost staus in vagabund. Tier biars valeva el sco «curios pader». Sch’ins enquera parallelas denter Gottfried Ludwig Theobald, Arnold Escher von der Linth e Placi a Spescha anflan ins quellas en lur engaschi per la perscrutaziun dallas Alps. Plinavon ein tuts treis stai commembers dalla Societad per perscrutaziun dalla natira. Placi a Spescha era daventaus commember dalla societad svizra igl onn 1826, dalla grischuna igl onn 1827.

Il referat da Caspar Decurtins ei senz’auter staus in impurtont pass ella rescoperta da Placi a Spescha. Carli Fry creescha denton in secund mitos entuorn la persuna da Caspar Decurtins sch’el scriva: «*Jedenfalls hat der Gymnasiast Decurtins das Verdienst, Spescha zuerst ans Licht gezogen zu haben.*» Quei constat buc. Igl interess per pader Placi a Spescha ei buca pér naschius cun la lavur da Caspar Decurtins. Gia 1850 e 1852 haveva Rudolf Wolf publicau entgins excerpts da

brevs da Placi a Spescha tier la Societad per la perscrutaziun dalla natira a Berna e risguardau Spescha en sias biografias culturhistoricas dalla Svizra. 1858 ei cumpariu el «Bündner Monatsblatt» «Eine Ersteigung des piz Urlaun» e 1860 ina dallas descripciuns dils schabetgs da 1799 da Placi a Spescha. Detagliadamein relata plinavon Gottfried Ludwig Theobald en sia ovra «Im Bündner Oberland» da 1861 sur da Placi a Spescha. Aschia constatescha era Alexi Decurtins che Gottfried Ludwig Theobald hagi «*per aschidadir discuvretg dils 1861 P. Placi a Spescha per ina publicitad pli gronda*». Denter auter accentuescha Gottfried Ludwig Theobald che Placi a Spescha seigi staus gl'emprem, «*welcher das Land, welches uns beschäftigt, wissenschaftlich zu untersuchen und zu beschreiben unternahm.*» Fussien dapli lavurs da Placi a Spescha cumparidas en squetsch, aschia cuntinuescha Theobald, vessi quei promoviu l'enconuschientscha dalla Surselva, «*denn damals war Graubünden und besonders das Oberland im Ausland und selbst in der Schweiz ungefähr so bekannt wie jetzt Habesch oder Bornu*». Quella descripciun da Gottfried Ludwig Theobald ei era vegnida recipida sis onns pli tard en il «Glogn, Kalender romonsch per 1867». El rapport annual dalla Societad grischuna per la perscrutaziun dalla natira da 1865/66 ei in referat da Johann Wilhelm Fortunat Coaz cumpariu, ch'el haveva tenu tier la radunanza generala dil Club alpin svizzer a Cuera. 1866 ha Samuel Plattner publicau ina cuorta biografia da Placi a Spescha en las «Alpenrosen» ed el «Bündner Tagblatt». Ils proxims onns ei Spescha staus presents en special en il Club alpin svizzer. En igl annuari da 1868/69 ei in text da Placi a Spescha («Das Klima der Alpen») cun notizias biograficas da Gottfried Ludwig Theobald cumpariu. Theobald numna Spescha en quei liug «*Papa Rhätischer Clubisten*». Plinavon anflan ins en quei cudisch per l'emprema gada igl enconuschent entagl en lenn da Placi a Spescha fatgs da Kassian Knaus. En gl'annuari da 1871/72 suonda «Über das Urserenthal» e 1874 tegn Paul Lorenz – bein inspiraui dil referat da Caspar Decurtins – en la secziun Rätia dil Club alpin svizzer in referat pertuccont ils manuscrets da Placi a Spescha. Sin fundament dil referat da Caspar Decurtins ein biografias da Placi a Spescha medemamein cumparidas igl onn 1874 en la «Basler Nachrichten» ed en la «Alpenpost».

Denton attesteschon era ils contemporans al giuven student Caspar Decurtins d'haver scret la megliera lavur sur da Placi a Spescha entochen lura. Aschia san ins per exempel leger en la recensiuon dall'ovra

da Decurtins cumparida en il rapport annual dalla Societad per la per-
scrutaziun dalla natira digl onn 1873/74: *«Es ist nicht die erste Bio-
graphie des merkwürdigen, um die Berg- und Landeskunde über-
haupt so verdienten Mannes, die hier geboten wird, aber weitaus die
vollständigste, indem der Verfasser das noch vielfach zerstreute
Quellenmaterial zu sammeln bedacht war.»*

Onns da resvegl

Igl ei daveras buca pretendiu da memia da dir ch'igl onn 1874 mar-
cheschi in dils puncts culminonts el rescuvierer Placi a Spescha. Sper
las activitads da Caspar Decurtins ei quei aunc d'attribuir a dus auters
fatgs. Ils 11 e 12 da settember 1874 ha la Societad svizra per la per-
scrutaziun dalla natira teniu sia radunonza annuala a Cuera. Gl'em-
prem di ha la societad remunerau Gottfried Ludwig Theobald. Il
«Bündner Tagblatt» rapporta:

*«Bei dem Festessen im «Steinbock» fand die gemüthliche Stim-
mung ihren höchsten Ausdruck (...). Die Toaste stiegen auf
wie Raketen. Der Ausflug nach Passugg ist trotz zweideuti-
ger Witterung gelungen. Araschgen hatte sich geschmückt als
Feststadt. Bei den Quellen trefflich arrangirte Dekorationen.
Oben auf dem Bödeli die Festwiese mit Tischen, Lampions,
Feldküche, Stadtmusik, Landvolk. In einem Wäldchen die
große weiße Büste des unvergeßlichen Theobald. Rede Szadro-
wsky's und Enthüllung der Büste. Prächtiger Ehrenwein. Das
Sichtbarwerden eines «wilden Mannes», eines «Berggeistes».
Vertheilung von Festschriften und einem Gedicht. Tapferer
Laternenzug nach Chur. Sektionsweise Fortsetzung der Ge-
müthlichkeit.»*

Cun «toasts sco rachetas» eis ei era vegniu cuntinuau la dumengia,
sco il «Bund» rapporta: *«Besonderer Erwähnung wurde dabei gethan
der nur zu früh vollendeten, um Graubünden und die Schweiz. Natur-
forschende Gesellschaft überhaupt im hohen Grade verdienten Escher
von der Linth und Prof. Theobald.»* E vinavon: *«Ein Hoch wurde
überdies gebracht (...) dem wackeren Benediktinermönch Placidus a
Spescha, der seit vierzig Jahren ruht im friedlichen Kirchhof zu
Truns.»* Quella radunonza ha pia ruchegiau Placi a Spescha en la vi-

schinonza da Gottfried Ludwig Theobald e dad Arnold Escher von der Linth e quei avon in publicum buca mo grischun mobein svizzer.

Quasi il medem temps ei il num da Placi a Spescha aunc curdaus en rama d'in'otra societad naziunala: Il fenadur 1874 relatan las gasettas ch'il Club alpin svizzer hagi eligiu la Val Sumvitg sco territori d'excursiun per 1874/75. Gia 1865 era ina cadeina da cuolms sursilvana vegnida tier quella honur, numnadamein il territori dil glatscher da Medel. El decuors da quels diesch onns ei denton semidau dabia. La muntada d'in tal territori d'excursiun per la regiun era carschida considerablamein. Il «Freier Rhätier» scriva ils 4 da fenadur 1874: *«Den Oberländern empfehlen wir freundliche Aufnahme der Alpenklubisten und zwar in ihrem eigensten Interesse, denn ein besseres Mittel, ihr schönes Thal in Aufnahme zu bringen, werden sie kaum finden.»*

La secziun Rätia ha per quei intent endrizzau la tegia da mises da mistral Andreas Arpagaus a Run en la Val Sumvitg sco camona da club. Ord il medem motiv ei era il cudisch annual dil Club alpin svizzer staus dedicaus igl onn 1875 per gronda part alla Surselva. Johann Wilhelm Fortunat Coaz dat leu ina survesta naturhistorica-topografica dalla regiun, differentas turas el territori d'excursiun vegnan presentadas, Johann Andreas von Sprecher dat ina survesta dalla historia dalla Surselva e Placi a Spescha ei presents cun sia «Beschreibung der Bergpässe im Grauen Bund». Il cudisch annual dalla Societad grischuna per la perscrutaziun dalla natira scriva en sia recensium concernenta:

«In eben so anziehender als belehrender Weise wird auf die grossartigen Naturschönheiten eines noch so gut wie unbekanntes Alpenthälercomplexes hingewiesen, und es ist nur zu wünschen, dass wie der S.A.C. in dankenswerther Weise zur besseren Erschliessung unseres Oberlandes vorangegangen ist, andererseits auch im Thale selbst immer mehr Anstrengungen gemacht werden mögen, um die Touristenwelt hinzuziehen und festzuhalten.»

Renaschientscha romontscha

Tgei ei semussau entochen ussa? Entuorn la mesadad dil 19avel tschentaner entscheivan perscrutaders d'ordvart a scuvierer sistematicamein la Surselva. Uniuns sco la Societad per la perscrutaziun dalla natira ed il Club alpin svizzer e lur secziuns grischunas portan e pro-

movan quei svilup, il plaid «tourismus» croda l'emprema gada. Ils pioniers da quei svilup, denter els Gottfried Ludwig Theobald ed Arnold Escher von der Linth, valan gia cuort suenter lur mort sco «heroxs dalla perscrutaziun dallas Alps» e vegnan memorisai intensivamein.

Parallel tier igl interess per ils cuolms vegn denton era il lungatg romontsch intercuretgs da rudien. Da menziunar ein cheu ils dicziunaris e grammaticas d'Otto Carisch (1836/48), da Zaccaria Pallioppi (1857) e da Baseli Carigiet (1858). Scienziats d'ordvart studegian la historia dil lungatg romontsch e tilan punts tier il ladin el Tirol dil sid e tier il Friulan, aschia per exempel Fr. Walter (1832), Lorenz Diefenbach (1837) ed August Fuchs (1849).

A Strassburg docescha il romanist Eduard Böhmer che fa dapi 1868 vacanzas a Mustér e tgira contact cun pader Baseli Carigiet. Dil remiment ha Caspar Decurtins visitau a Strassburg sias prelecziuns sco Carli Fry relata: «*In einem Kolleg im Wintersemester 1876/77 erwähnte er [Böhmer], die beste Schrift über rätoromanische Sagen und Märchen habe ein gewisser Kaspar Decurtins geschrieben. Aus der Begegnung mit dem Genannten, der sich ihm nach der Vorlesung zu erkennen gab, entstand eine Freundschaft fürs Leben.*» Friedlieb Rausch publichescha 1870 ina gronda historia dalla litteratura romontscha e Graziadio Isaia Ascoli suonda 1873 cun «Saggi ladini», in'impurtanta ovra sur dils dialects romontschs. Igl interess per la persuna da Placi a Spescha en quels onns ei bein era d'attribuir al fatg che Spescha cun ses camps d'activitad multifars ha saviu fascinar aschibein alpinists sco linguists.

Ei dat en egl ch'il stausch per quels svilups ei vegnius d'ordvart. Bein nuot muossa quei meglier che la tabla commemorativa per Gottfried Ludwig Theobald ed Arnold Escher von der Linth che spetga aunc adina – nus essan zanuas amiez igl onn 1874 – da vegnir tschentada sper la punt Russein. Ils onns entuorn 1870 marcheschan denton ina midada da perspectiva. Ils indigens entscheivan a vegnir activs, la Surselva senza entscheiva plaun a plaun a vegnir cunscenta dils sczis naturals e linguistics dalla regiun. L'activitad da Caspar Decurtins e dad auters, la fundaziun dalla Societad retoromontscha (1863/1870) e differents artechels en las gasettas romontschas muossan ch'il temps era madirs. E quei ei era vegniu mussau anoviars. Aschia san ins leger en il rapport dalla «Basler Nachrichten» sur dalla sentupada dalla Societad svizra per la perscrutaziun dalla natira a Cuera menziunada pli baul: «*Auch die romanische Sprache ließ sich hören in einem Trink-*

spruch von Hr. Condrau.» (Manegiau ei cheu Augustin Condrau da Mustér che s'udeva tier ils paucs commembers sursilvans dalla Societad grischuna per la perscrutaziun dalla natira).

E la tabla commemorativa dat entochen oz perdetga da quella midada da perspectiva: El decuors digl onn 1874 han Gottfried Ludwig Theobald ed Arnold Escher von der Linth numnadamein survegniu cumpignia. El liug digl «und» che steva oriundamein denter ils dus nums vegn il num da Placi a Spescha integraus. Ils dus pioniers jasters vegnan cumpletai cun il pionier indigen ch'ei daveras staus in miez tschentaner ordavon a ses contemporans. Aunc oz vesan ins vid la tabla, co il num da Placi a Spescha ei vegnius marclaus sur l'inscripziun veglia vi. La midada da perspectiva, igl origin dalla renaschientscha romontscha, ei en quei senn sematerialisada en quella tabla commemorativa. Quei fatg dat alla tabla ina dimensiun e muntada supplementara.

Naturalmein che la damonda interessescha uss, tgi che hagi bein giu l'idea da cumpletar la tabla commemorativa cun il num da Placi a Spescha. Sco tier ils iniziants dalla tabla insumma, dattan las fontaunas era cheu negina risposta definitiva. Igl artechel dalla «Gasetta Romontscha» cumparius tier l'inauguraziun dalla tabla dat denton in indezi. Sper Heinrich de Latour vegn cheu era fatg menziun dalla «gronda premura» da Caspar Decurtins per la tschentada da quei monument. En verdad ei igl engaschi da Caspar Decurtins per far enconuschents Placi a Spescha ius igl onn 1874 aunc sur la publicaziun da sia biografia da Spescha ora. Aschia scriva la Societad historica grischuna l'entschatta 1874 en siu rapport annual digl onn vargau: «*Im Laufe dieses Jahres hoffen wir, unserer Gallerie auch die Bilder des Herrn Prof. Theobald und des Pat. Pl. a Spescha einverleiben zu können.*» In onn pli tard sa la societad informar che quei seigi succediu ed el quen annual suonda sut la rubrica «*Geldschenkungen*» la remarca: «*Aus dem Oberland durch Studios Decurtins für Restauration und Einrahmung des Porträts von a Spescha Fr. 61.80*». Ei setracta cheu digl enconuschent portrait da Placi a Spescha che sesanfla uss el Museum retic.

Aschia eis ei bein realistic da veser en Caspar Decurtins era igl iniziant per cumpletar la tabla commemorativa cun il num da Placi a Spescha. Quei suppona dil reminent era Carli Fry en sia biografia da Decurtins: «*Ihm war es wohl auch zu verdanken, daß P. Spescha überhaupt auf die Tafel kam; denn ursprünglich hatte man, getreu*

dem Wort, daß ein Prophet nirgends weniger geehrt sei als in der eigenen Heimat, nur an die beiden Nichtbündner gedacht.» Per sutta-strihar quella tesa selaian era allegar ligioms familiars denter Heinrich de Latour e Caspar Decurtins: La mumma da Caspar Decurtins era numnadamein ina sora da Heinrich de Latour. Ch'ìls Decurtins da Trun tgiravan stretgs contacts cun ils de Latour da Breil muossa era il fatg che Cristian Luregn, il bab da Caspar Decurtins, e Heinrich de Latour ein menziunai el cudisch da lètg dalla pleiv da Breil sco perde-tgas tier las nozzas da Bina de Latour ed Arnold Escher von der Linth.

«Gliei stau ina biala festivitàt!»

Igl october 1874 eis ei la finala stau aschi lunsch: En rama d'ina fiasta d'inauguraziun ei la tabla commemorativa vegnida montada el liug nua ch'ella ei aunc da contemplar oz. Gia ils 19 da settember 1874, tier la radunonza annuala dalla Societad svizra per perscrutaziun dalla natira a Cuera, haveva la «Alpenpost» da Turitg nudau:



Fotografia: La Quotidiana

La tabla commemorativa suenter la renovaziun digl onn 2002

«Den 3 berühmtesten Erforschern der rhätischen Alpenwelt: Theobald, Escher von der Linth und Pater Placidus à Spescha wird von der bündnerischen naturforschenden Gesellschaft eine Marmortafel als Andenken in die mächtigen Schieferfelsen am Eingang in das Rufeinertobel [!] gesetzt werden. Wer sich mit den Verdiensten dieser 3 Männer der Wissenschaft genau bekannt machen will, der lese die soeben erschienene Biographie des P. Pl. à Spescha von C. Decurtius [!] (Chur bei F. Gengel), auf die wir nächstens im literarischen Theile zu sprechen kommen werden, sodann die Biographie Theobalds von Scadrowsky [!] (Chur bei L. Hitz) und die grössere Arbeit Heer's über das Leben und Wirken Escher's von der Linth.»

Sco ei vesa ora, haveva Heinrich de Latour fatg paleis el ravugl dalla Societad svizra per la perscrutaziun dalla natira che la tabla vegni beingleiti inaugurada. Davart d'in engaschi dalla secziun grischuna da quella societad per tschentar ni finanzia la tabla dian ils protocols denton nuot. Dil reminent queschan era ils protocols dalla secziun Rätia dil Club alpin svizzer e quels dalla Societad historica dil Grischnun pertuccont la tabla commemorativa. Ils 16 d'october annunzia lu la «Gasetta Romontscha»:

«Sonda proxima, ils 17 d. q., all'ina suenter miezdi vegn teniu ina pintga festivitât sper la pun de Russein sils confins dellas vischneuncas Mustèr e Somvitg. En memoria e honur dils treis defuncts investigaturs dellas alps reticas Pader Placi Spescha, professor Theobald e prof. Linth-Escher vegn ei leu ella preit crap sper il stradun tschentau en ina platta de marmor culs allegai nums. La scola claustrala vegn a comparer en corpore cun plirs personals de Sur- e Sutsassiala. Duess l'aura esser quei di disfavoreivla vegn quella festivitât refretga.»

Dalla fiastetta d'inauguraziun dils 17 d'october han differentas gasettas rapportau. Il «Bündner Tagblatt» ed il «Bund» scrivon ils 19 d'october: *«Am 17. d. wurde die früher besprochene Marmorplatte zum Andenken an Pl. Spescha, Theobald und Linth-Escher auf einem Felsen bei der Russein-Brücke, auf der Grenze zwischen Disentis und Somvix, angebracht. Die Klosterschule und eine Anzahl anderer Gäste betheiligte sich nach der Disent. Ztg. an dieser Festlichkeit.»* In di pli tard cumpletescha il «Bündner Tagblatt»: *«Am Sonntag wurde, wie*

dem «Bund» telegraphirt wird, das Denkmal der bekannten Forscher der rhätischen Alpenwelt bei der Russeinbrücke mit patriotischen Liedern und Reden vom Abt von Dissentis und Studiosus Kaspar Decurtins von Truns eingeweiht.» Il medem di ei era il «Freier Rhätier» s'expressimus en caussa: «Im Oberland ist am Samstag das Denkmal in Marmor für die Alpen- und Naturforscher Spescha, Escher und Theobald bei der Brücke von Russein aufgestellt worden. Darauf folgte die gebührende Weihe in fließenden Worten und flüssigem Rebensaft.» Il telegraf da «O.» al «Bund» ei cumparius leu ils 23 d'october:

«Die Russeiner Gedenktafel (Korresp. vom 20. d.) Vor einiger Zeit berichtete ich Ihnen, daß Freunde der Naturwissenschaften den unvergeßlichen Forschern der rhätischen Alpenwelt, P. Placidus à Spescha, Escher von der Linth und Theobald, eine Gedenktafel nahe bei der Russeiner Brücke, zwischen Sumvix und Dissentis, zu setzen gedachten. Besagte Tafel blickt nun, wie mahnend, hinein in die ernste, gewaltige Natur des oberen Oberlandes, auf daß die Nachkommen sich aufrichten am Beispiele thatkräftiger Männer. Die diese Einsetzung begleitende Feierlichkeit gestaltete sich zu einer einfachen, aber würdigen. Möge der Wanderer vor den Felsschluchten des Russeiner Tobels, da wo die Brücke zwischen Himmel und Erde schwebt, stillstehen und einen Augenblick emporschauen zu der marmornen Tafel mit den drei wackeren Namen!»

Ils 23 d'october ha era la «Gasetta Romontscha» rapportau sur dalla fiasta:

«Ual suenter 17 ons ch'ei gliei silla magnifica pun de Russein, sils confins de Muster e Somvitg, stau vegniu taniu ina biala festivitât cun caschun che quella ei solemnamein vegnida benedida en, ei leu sonda vergada vegniu celebrau la tschentada dil monument en honor de A. Escher della Linth, de pader Placi Spescha e Theobald en preschientscha della scola claustrala e ded in respectabel publicum ord las proximas vischneuncas Mustèr, Somvitg e Trun. En honor de quella festivitât ei il cor viril de Mustèr puspei sedestadaus ed ha schau sgolatschar sia biala bandiera nova. Tier igl edificont cant ei vegniu teniu duas peroraziuns. Monsignur avat, che ha generusamein giu honorau Escher e Theobald cun sia hospitalitât, ha plidau eruditamein sco adina sur quels treis geologs

relevont lur sen e lur activitat egl investigar e lur particulara modestiadat e ludeivla simpladat. Il secund plaid ei vegnius tenius dal meriteivel biograf de Pader Placi Sgr. Studiosus Caspar Decurtins de Trun, che ha cun siu Sgr. aug major Heinrich Latour, mussau gronda premura per la tschentada de quei monument. Cun gron entusiasmus e per generala edificaziun dil publicum ha el relevau pliras bialas acziuns dils treis celebrai umens. La patriotica canzun «Clomas o patria!» nua ch'era la biala schlateina ha schau resonar sia vusch melodica ha coronau la fiasta. In butschin saft della vit ei lura vegnius attaccaus silla piazza festiva, quel ha leventau il humor, niev cant e novas peroraziuns cun toasts. Silla nova ch'ina paupra femna de Somvitg segi quei suenter miezdi vegnida disgraziada, ei spert vegniu priu si ina collecta per quella. Prendent la sera las treis vischneuncas comiau ina da lautra era tut che scheva: «gliei stau ina biala festivitad!»»

Postscriptum

El Museum d'art dil Grischun a Cuera sesanfla in'ovra che porta il tetel «Berggänger». Il maletg en ieli muossa in alpinist equipaus cun in fest da viandar e cun ina tastga e zappunet per cavar cristallas. Vestgius eis el d'ina rassa liunga e sin tgau porta el ina capetscha d'ureglias; ils calzers bass paran buca gest d'esser adattai per ir a cuolm. Igl alpinist ei representaus duront l'ascensium d'in péz; davos el ina cuntrada alpina glaciala (che po far endamen il glatscher da Medel ni il Péz Ault). Il maletg datescha da 1876 e deriva digl artist Karl Heinrich Gernler (1811–1880). Gernler ei naschius a Basel, ha studegiu a Paris ed ei arrivau pli tard a Cuera nua ch'el ha viviu entochen tier sia mort.

Tgi che cumpareglia quei maletg cun igl entagl en lenn da pader Placi a Spescha cumaprius en igl annuari dil Club alpin svizzer da 1868/69, constatescha parallelas frappantas. Sin il maletg da Karl Heinrich Gernler ei la cumparsa digl alpinist bein pli giuvenila e lingiera e la fatscha empau pli stendida – la vestgadira ed igl equipaschi ein denton quasi identics.

Igl alpinist da Gernler ei reproducus en treis publicaziuns dil Museum d'art, numnadamein en «Gemälde und Skulpturen» e «Bilder einer Sammlung. 101 Werke aus dem Bündner Kunstmuseum» (omissus da 1989) ed en il catalog d'exposiziun «Der romantische Blick. Das Bild der Alpen im 18. und 19. Jahrhundert» (2001). En la publi-

caziun «Bilder einer Sammlung» vegn il maletg era descrets da rudien. Ch'ei savessi settractar da pader Placi a Spescha ei denton menziunau cun buc in plaid. Era en las numerusas publicaziuns sur da pader Placi sez vegn quei maletg buc avon. Daco quei? Retschercas tier il Museum d'art han buca purtau alla glisch novs resultats, sulettamein l'infurmaziun ch'il maletg arrivi oriundamein neu dil Museum dalla natira. Mo era tier il Museum dalla natira ei negina documentaziun sur dil maletg stada d'anflar.



Fotografias: Annuari dil Club alpin Svizzer 1868/69 e Museum d'art dil Grischun, Cuera

Placi a Spescha: Entagl en lenn da Kassian Knaus (1868)
e maletg en ieli da Karl Heinrich Gernler (1876)

L'idea ch'ei savessi settractar tier quei alpinist da Placi a Spescha ei denton buca nova. Quei muossa il fatg ch'ina fotografia dil maletg ei vegnida registrada 1932/33 en la cartoteca dil Museum retic sut il tetel «Pater Placidus à Spescha (1752–1833)». Medemamein vegn il maletg menziunau en l'ediziun da texts da Placi a Spescha, procurada igl onn 1913 entras Friedrich Pieth e Karl Hager: «*Im Rätischen Museum in*

Chur befindet sich auch ein Ölbild aus dem Jahre 1876, das P. Placidus a Spescha als Bergsteiger darstellt, und von Maler H. Gernler herrührt. Er ist möglicherweise auf Grund der Handzeichnung im Jahrbuch S.A.C. 1868 entstanden, stellt aber keine glückliche Leistung dar.» Dil reminent accentuescha era la descripziun dil maletg en la publicaziun «Bilder einer Sammlung» ch'igl artist eri buca gest sigl ault da siu temps: «Gernler steht noch ganz in der Tradition jener Alpenmalerei, die im Gebirge eine wohl herausfordernde, gleichzeitig jedoch bedrohliche Welt sah. Altertümlich muten auch die malerischen Mittel an: Typisiert, steif ist die Figur dargestellt, gedämpfte Grau- und Brauntöne herrschen vor. Wie weit Gernler von der Kunstaktualität seiner Zeit entfernt war, lässt sich schon daran ersehen, dass Hodlers erste wichtige Werke in diese Zeit fallen.»

La qualitat artistica dil maletg ei denton buca relevanta en nies connex. Cheu setract'ei plitost da mussar tgei fretgs la rescoperta da Placi a Spescha entuorn ils onns 1870 ha purtau. E per far la punt da quei maletg tier la tabla commemorativa: Sper Heinrich de Latour figurescha era Karl Heinrich Gernler sin la gliesta da commembers dalla Societad historica dil Grischun. Ch'els dus han era giu contact ordvart las sesidas dalla societad muossa il suandont: Igl onn 1877 ha Heinrich de Latour schau portretar siu bab, il general Caspar de Latour (morts 1855) sin basa d'ina fotografia. Il portrait che sesanfla egl archiv de Latour a Breil porta davostier l'indicaziun «*Henri Gernler pinxit 1877, in Chur*». Tgisà, forse che Heinrich de Latour ei buca mo staus igl iniziand dalla tabla commemorativa sper la punt Russein, mo bein ha era intimau Karl Heinrich Gernler tier siu maletg dil pli enconuschent «Berggänger» lunsch entuorn...

(Tenor il referat tegnì tar la reinauguraziun da la tabla commemorativa ils 7 da december 2002 a Sumvitg. Pertutgant la festa da reinauguraziun cumpareglia «La Quotidiana» nr. 238 dals 9 da december 2002, p. 3, e «Bündner Tagblatt» nr. 288 dals 10 da december 2002, p. 21).



Il Grischun sco cantun svizzer 1803

L'impurtonza dil temps entuorn 1800 per il svilup dil stadi grischun

Martin Bundi

I. Svilup avon 1803

Fin dil stadi liber dallas Treis Ligias

Il stadi liber ed independent dallas Treis Ligias ha existiu daven da 1524 tochen 1798. Dispetas fatalas da partidas e munconza da spért da refuormas han caschunau sia fin. Politichers conservativs e specialmein aristocrats eran buca prompts da dar alla populaziun dalla Valtina ils medems dretgs sco la populaziun gudeva ellas Treis Ligias, ed els eran medemamein buca d'accord da recepir la Valtina sco quarta Ligia. Perquei ha Napoleon finalmein 1797 dau siu consentiment che la Valtina banduni il Grischun e daventi ina part dalla Lombardia, dalla schinumada «Republica cisalpina». Denton semussavan ils conservativs era buca prompts per las refuormas necessarias da regenza ed administraziun el stadi regent. Il federalissem era exageraus extremamein. Il Grischun disponeva buca d'ina regenza permanenta, buca d'ina armada sco tala ed era buca da dertgiras supremas. Il stadi fuva in cuminesser fleivel cun sias 52 vischnaucas giudizialas suveranas (mintgina ina pintga republica per sesezza), las qualas representavan per propi la pussonza statala. Quei sistem era antiquaus e corrispondeva maina pli allas pretensiuns dil temps.

En connex cun la Secunda uiara da coaliziun europèa (la Frontscha encunter l'Austria, la Prussia e la Russia) 1799/1800 ei il Grischun daventaus camp da battaglia e per temps vegnius occupaus da Franzos e dad Austriacs. Tut leusunter han quellas pussonzas influenzau igl uorden statal dallas Treis Ligias. Il prighel era gronds ch'il Grischun vegni dividius e repartius sin ina pussonza ni l'autra jastra (Austria, Frontscha, Republica cisalpina). En quella situaziun plidavan ils «patriots» ni «unitarists» (adherents da refuormas) per l'integraziun el stadi svizzer ch'era gest vegnius reorganisau el senn dalla Revoluziun franzosa. Ils «conservativs» ni «federalists» denton manegiavan da saver

mantener vinavon il vegl stadi liber ni eventualmein schizun saver viver cun in statut da protectorat entras l'Austria.

La Helvetica

En quei conflict ha la posiziun ferma dalla Frontscha dau la decisiun. General Masséna ha, suenter haver occupau militarmein il Grischun, erigiu cheu la primavera 1799 ina regenza provisoria. A quella eis ei gartegiau – denton senza votaziun formala – da survegnir il consentiment dalla pluralitad dallas vischnauncas per ina reuniun cun la Svizra. Aschia ha il Grischun deponiu ils 21 d'avrel 1799 la domanda per l'admissiun alla Republica helvetica. En quei connex ei il Grischun s'obligaus d'acceptar la constituziun helvetica che prevedeva ch'el seigi dacheudenvi sco «cantun Rezia» in district administrativ senza atgna suveranitat enteifer il stadi centralisau svizzer. L'Austria ha empruau da disturbar quei process, denton senza success. Suenter ina secunda occupaziun dil Grischun entras ils Franzos ha general Lecourbe confirmau il fenadur 1800 la sligiaziun fatga la primavera 1799, instituiu ina nova regenza e declarau la reuniun dil Grischun cun la Svizra sco legala e definitiva. Suenter la fin dalla secunda uiara da coaliziun ha Napoleon – ch'era ussa il pli pussent regent en l'Europa – modificau empau igl uorden statal svizzer (Constituziun da Malmaison), declarond denter auter il Grischun sco 16avel cantun helvetic e confirmond sia reuniun cun la Svizra.

La «constituziun helvetica» muntava ina midada dallas relaziuns existents da bunamein 180 grads. Enstagl dalla suveranitat dils singuls cantuns: ina centralisaziun; enstagl d'ina democrazia directa: ina democrazia rappresentativa. Denton prevedeva ella ina clara separaziun dallas autoritads (legislativa, executiva, giudicativa), garanteva las libertads persunalas e scumandava tuts privilegis da persunas, da stans ni da loghens.

La Mediaziun

Sco en auters loghens en Svizra dev'ei era el Grischun gronda opposiziun encunter quei uorden statal. Schizun ina pintga revisiun dalla constituziun helvetica en direcziun da dapli federalissem, concepida da Napoleon, ha buca cattau il sustegn necessari. En ina votaziun dil pievel – l'emprema votaziun dil pievel svizzer insumma – il matg 1802

ha ina pluralitad dils votants schibein en Svizra sco el «cantun Rezia» fiers quella constituziun. Ei regeva ussa vinavon ina schliata atmosfera e gronda renitenza dad applicar ella pratica il niev dretg. En quella situaziun ei Napoleon s'offerius sco «mediatur». El era prompts da corrisponder als giavischs dils biars Svizzers e da dar ad els in uorden da stadi federalistic. Aschia ha el supplicau la dieta federala (Tagsatzung) ed ils cantuns da tarmetter representants a Paris per secussegljar cun el schibein sur d'ina constituziun nova per l'entira Svizra sco era sur da talas per mintga cantun. Sinquei ei ina deputaziun svizra da ca. 60 delegai, numnada la «consulta», serendida a Paris il december 1802; leu ha quella secussegliau cun representants da Napoleon tochen il fevrer 1803 davart in niev uorden statal dalla Svizra. Da quella delegaziun svizra fagevan ils dus Grischuns Florian Planta (federalist) e Jakob Ulrich Sprecher (unitarist) part.

II. La constituziun dalla «Mediaziun» da 1803

In dictat da Napoleon

Ils deputai svizzers han bein saviu presentar propostas a Paris, denton savevan els da principi buca menar tractativas, mobein havevan da prender encunter las decisiuns da Napoleon. Quel haveva beinspert capiu ch'in uorden federalistic svizzer savessi survir il meglier als interess dalla Frontscha; denton ha el refusau mintga sort da privilegis aristocratici. El cass dil Grischun ha el demussau interess per la veglia constituziun dil stadi liber d'avon 1798 ch'el vuleva cumbinar cun in rinforzament dall'autoritad centrala. El ha destinau in comite da diesch deputai svizzers – tschun federalists e tschun unitarists, denter quels era Sprecher – per secussegljar sur dils sbozs costituziunals. Ils 28 da schaner 1803 ha el rimau quei comite entuorn el ed ils 19 da fevrer l'entira «consulta» ed ha dau part a quels gremis sias decisiuns partenent la constituziun dil stadi svizzer sco era partenent quellas da mintga cantun. Gia pli baul haveva el declarau als delegai: «Vous ne devez pas prétendre à jouer un rôle entre les Puissances d'Europe.» Ussa ha el regurdau els al fatg che la Svizra hagi giugau inaga ina rolla en l'Europa, cu la Frontscha seigi stada dividida. Oz seigi la Frontscha unida e ferma, la Svizra denton ina tiara paupra muntagnarda che deigi secuntentar en moda mudesta sco stadi neutral el rom da siu

uorden federalistic, da ses usits e ses divers lungatgs. Il Grischun drovi pervia da sia gronda diversitad da Ligias e vischnauncas giudizialas ina fuorma da regenza rinforzada. Sia posiziun da pussonza d'antruras en l'Europa seigi definitivamein a fin, denton vegni il Grischun ad anflar segirtad, ruaus ed in bien uorden ella reuniun cun la Svizra.

Cuntegn dalla constituziun da «Mediazion»

Aschia ei la Svizra setransformada dil stadi centralistic al stadi federalistic cun ina plitost fleivla regenza centrala. Sco progress ein denton da taxar: Il scamond da relaziuns da subdits e la garanzia dils dretgs persunals da libertad (dretg general da burgheis svizzer, l'egualitad dil dretg, la libertad da domicil, da traffic, da commerci e da mistregn).

El niev cantun Grischun ei il signeradi da Maiavilla vegnius sligliaus e transformaus en ina vischnaunca giudiziala; medemamein ei il signeradi da Haldenstein vegnius dismiss ed il vitg da Haldenstein vegnius incorporaus alla vischnaunca da dertgira dils Tschun vitgs; la Cuort episcopala a Cuera ei vegnida repartida al marcau, ed il vischinadi da Tarasp ei vegnius integraus ella dertgira da Sur Tasna. Il signeradi da Razén ei aunc semantenius en moda restrenschida tochen 1815; ses quater vischinadis formavan, sco avon 1798, ina atgna vischnaunca giudiziala.

Da niev ei vegniu scaffiu il *Cussegl grond* sco autoritad suprema en legislaziun, administraziun e polizia. Quel esisteva denton, sco el temps dil stadi liber, da 63 deputai ord las 52 vischnauncas giudizialas. Interessanta ei la novaziun, tenor la quala ils conclus dil Cussegl grond che havevan vigur legislatoria, havevan da vegnir publicai en tuts *treis lungatgs* dalla tiara. Il romontsch fuva da quellas uras il lungatg maioritar dil cantun!

Igl organ suprem executiv fuva il *Cussegl pign*. El haveva dad exequir tuts «acts sorti dal Cussegl grond». El secumponeva mo da treis commembers, numnadamein dils caus dallas treis Ligias. Quels funcziunavan sco autoritad stabla, denton mo mintgamai per in cuoz d'in onn.

La *giurisdicziun* ei restada per gronda part els mauns dallas vischnauncas giudizialas (dertgiras penals e civilas). Per cass civils han ins scaffiu ina dertgira cantunala d'appellaziun; per cass penals fuv'ina tala prevedida mo en maniera fetg restrenschida.

Ina midada severa ha ei dau partenent il dretg da *referendum* (consultaziun dil pievel). Votaziuns dil pievel eran buca previdas. Tuttas midadas da constituziun, leschas e concordats haveva la regenza denton da suttametter allas vischnauncas giudizialas; quellas mettevan la materia cun occasiun da lur cumins ni tschentadas en votaziun ed annunziavan lu il resultat dalla pluralitad a Cuera. Il Cussegl pign «classificava» quels resultats. La politica exteriura era ussa buca pli caussa cantunala, mobein dalla dieta federala svizra (Tagsatzung). Damondas partenent pasch ed uiara ni alleanzas cun pussonzas digl exteriur fuvan ussa buca pli caussas da referendum – sco dil temps dil stadi liber –, mobein vegnevan decididas alla numnada dieta federala svizra. – La nova constituziun grischuna ha era schaffiu la basa per in menaschi finanziel ordinau dil cantun.

Entrada en vigur

Las constituziuns dalla Confederaziun e dils cantuns eran vegnidadas dictadas ils 19 da fevrer da Napoleon a Paris. El Grischun han ins erigi ina cumissiun dalla regenza che haveva dad introducir la nova constituziun cantunala. Quella ha tarmess ils 30 da mars 1803 il «text dil document da mediaziun digl empren consul dalla Republica franzosa» allas vischnauncas giudizialas, per che quellas sappien prender enconuschientscha dil cuntegn. Ina votaziun dil pievel ha ei buca dau, essend che Napoleon haveva giu dau sia decisiun definitiva leusura.

Gl'empren Cussegl grond ei serimnaus ils 20 d'avrel 1803 a Cuera ella sala dalla casa cumin per sia seduta constitutiva e per discutir sur digl ulteriur proceder. El ha seschau informar dils dus delegai alla «consulta» ed ei allura passaus all'elecziun dils organs previ tenor la constituziun.

Plinavon ha il Cussegl grond era tschentau las relaziuns denter il cantun e la Confederaziun sin nova basa. La Confederaziun dils 13 cantuns da pli baul haveva subiu in augment a 19 cantuns cun il cantun Grischun e tschun auters che fuvan stai per gronda part pli baul tiaras subditas: Argovia, Turgovia, S. Gagl, Tessin e Vad. Geneva, Neuschatel ed il Valleis ein vegni pér 1814 tier la Confederaziun. – Il Cussegl grond grischun ha numnau ussa ils dus deputai alla dieta federala svizra, la pli aulta autoritad dalla Confederaziun. A quels deputai ha il Cussegl grond surdau da cass tier cass sias instrucziuns; auter che ils parlamentaris federals dapi 1848 che dattan lur vusch libra-

mein, havevan ils delegai denter 1803 e 1848 da vuschar tenor la veglia da lur superiurs cantunals. Il Cussegl grond aveva plinavon dad exequir ils decrets dalla dieta federala svizra.

III. Appreziaziun dalla costituziun da 1803 e dil temps dalla «Mediazium»

La costituziun da 1803 ha cuzzau aschi gitg che siu creatur, Napoleon, ha saviu mantener sia pussonza en l'Europa ed en Frontscha, numnadamein tochen la fin da 1813. Ils 29 da december 1813 ha ina radunonza federala a Turitg decidu dad abolir la costituziun dalla «Mediazium». Lu ein suandai dus onns da nunsegirtad: Forzas reacziunaras empruavan da reconstruir las relaziuns sco ellas existevan avon 1798. Denton dev'ei sper quellas tendenzas restaurativas per fortuna era forzas progressivas. Il niev uorden svizzer ei denton per gronda part vegnius imprimius dil Congress da Vienna 1814/1815, il qual ha reglau da niev las relaziuns statalas ell'Europa. Per la Svizra ei seresultau finalmein ils 7 d'uost 1815 il schinumnu «Contract da federaziun dils 22 cantuns suverans», il qual representava in pign pass anavos cumparegliau cun la costituziun dalla «mediazium» e che ha giu vigur tochen 1848.

Duront ils diesch onns dalla «mediazium» steva la Svizra schibein politicamein sco era arisgurad il militar e l'economia en dependenza dalla Frontscha. Cun renunziar a sia neutralitad ha ella stuiu serrar ils 27 da settember 1803 ina «capitulaziun militar» ed ina «alleanza defensiva» cun la Frontscha. Igl onn 1810 ha ella stuiu separticipar alla «bloccada continental» economica da Napoleon encunter l'Engheltiera. E 1812 eis ella vegnida sfurzada da s'obligar da metter a disposiziun a Napoleon per sia campagna en Russia 1200 mercenaris.

En vesta a tonta dependenza eis ei clar che la Svizra fuva duront la Helvetica e «mediazium» negin stadi suveran, mobein in satellit (protectorat) dalla Frontscha. Da l'autra vart ha la costituziun da 1803 purtau per la Svizra e per il Grischun ina retscha d'avantatgs: Ella garanteva diversas valurs dalla Revoluziun franzosa e dalla Helvetica sco per ex. ils dretgs persunals da libertad, la separaziun dallas pussonzas el stadi, il scamond dad ereger tiaras subditas. Il svilup els cantuns era considerabels. Il Grischun ha entschiet ad ereger in sistem da posta, ad organisar da niev la giurisdicziun, la polizia ed il militar, ad intro-

ducir refuormas sil camp dallas scolas, dalla sanitad e dil pauperesser e da promover il traffic da transit e l'economia dalla tiara. En quei connex ha ei dau ina nova orientaziun politica, economica e culturala anoviars: Il stadi liber grischun sedrizzava fermamein viers sid ed ost, ferton ch'ins s'orientava ussa dapli viers vest e nord. – Atgnamein fuva il Grischun vegnius integraus gia 1799 ell'organisaziun statale dalla Confederaziun, denton lu mo sco district administrativ. Cun la «mediaziun» 1803 ha il cantun survegniu ina posiziun suverana sco commember dalla Confederaziun cun novas structuras efficientas. Aschia san ins concludend mo consentir al giudicament da Friedrich Pieth en sia Historia grischuna 1945 (p.334): «El Grischun ha Napoleon sco instrument dalla Revoluziun franzosa realisau ina missiun historica necessaria e sligiau in problem costituziunal en moda ventireivla.» Ina enconuschientscha impurtonta ord quei temps transitori astgass esser per nus oz d'interess general: «Ch'ei sa esser ruinont sch'in stadi adattescha buca sias structuras statalas ad uras als basegns dil temps ni sch'el sedistanziescha e s'isolescha en moda superbia da ses vischins egl'exteriur; lu vegnan auters a decider in gi sur dad el!»

Informaziuns cumpletontas per il temps dalla mediaziun el Grischun

Martin Bundi
translatau dad Isidor Winzap

1. Conta pussonza haveva Napoleon ch'el saveva semplamein cumandar?

Il success militar da general Napoleon Bonaparte ellas uiaras che la Frontscha revoluziunara ha fatg encunter las grondas monarchias dall'Europa (Austria, Prussia, Russia, Engheltiara) han era favorisau el politicamein. La Frontscha fuva dapi 1792 (cura ch'il davos retg ei vegnius privaus dalla pussonza e mess vi) ina republica che vegneva dirigida d'in «directori». Quella regenza ei vegnida derscha 1799 e Napoleon ei vegnius proclamaus sco «*emprem consul*». En quella posiziun e sco general dall'armada ha la Frontscha remportau la secunda victoria sur las pussonzas grondas europeas (secunda uiara da coaliziun) ch'ei vegnida confirmada culla pasch da Lunéville 1802.

Il territori dalla Frontscha ei s'engrondius sin donn e cuost dalla Prussia e dall'Austria ed ha contonschiu il cunfin dil Rein. El vest dalla Frontscha ha Napoleon schaffiu ina retscha da stadis neutrals, *republicas dependentas* (protectorats) dalla Frontscha: ell'Italia settentriunala la Republica cisalpina, la Republica ligurica ed il Piemont; al Rein inferiur la Belgia (cun Luxemburg) e la Republica batavica (Hollanda). La Confederaziun sivzra steva sco ulteriur stadi satellit denteren. La Frontscha haveva occupau 1799 la Svizra cun truppas ed haveva cun quei in plaid el capetel. Igl ei pil pli aunc adina aschia ozilgi ch'ina pussonza occuponta decida per gronda part senza igl uorden che suonda el stadi occupau.

Napoleon che fuva 1803 aunc «*emprem consul*» (el ha schau proclamar 1804 sco imperatur dils Franzos) ha era saviu reglar a moda ualti autoritara il niev uorden dalla Svizra sco *Europè cul pli grond success*. El enconuscheva sez mo ina pintga part dalla Svizra ord atgna esperienza, il Grischun in summa buc. Mo el haveva excellentas enconuschientschas dalla geografia e dalla historia dils Svizzers e Grischuns sco da lur situaziun statale e politica e dil svilup da lur costituziuns. Aschia ha el percurschiu ch'il stadi unitar dalla «*Helvetica*» (1798–1803)

sfurzaus si al pievel haveva priu negin risguard dil svilup historic e dall'esperienza svizra, ed aschia ha el ordinau in retuorn al model federalistic mantenend ils principis dalla Revoluziun franzosa.

Napoleon ha dictau schibein all'entira Svizra ina constituziun sco era dau als singuls cantuns ina constituziun adattada a lur atgnadads. El ha denton era fixau ina cumissiun (cumissiun dils diesch) che secumponeva da diesch commembers dalla «consulta» svizra che fuva cumpetenta e responsabla per *la realisaziun* dalla constituziun federala e dallas constituziuns cantunalas. Da quella cumissiun dils diesch fageva era il commember grischun dalla «consulta», Jakob Ulrich Sprecher, part. Quella cumissiun ha numnau da sia vart per mintga cantun ina cumissiun da regenza che haveva d'interpreter la realisaziun cantunala pratica en atgna cumpetenza, ed ella ha elegiu en quella mintgamai sis commembers, ferton che Napoleon numnava sez il siatavel commember.

Las autoritads grischunas havevan denton buca dau a lur dus commembers dalla «consulta» Sprecher e Planta veras instrucziuns sin via, mo tonaton ina orientaziun generala, en tgei direcziun ch'els giavischien ina atgna constituziun. Napoleon ha acceptau ina buna part dallas ideas dils mess. El ha lu surdau siu «dictat» als dus delegai dil Grischun culla pretensiun da comunicar quei als *representants dil pievel grischun*. Quels representants da lur vart fuvan ils 63 deputai ord las vischnaucas giudizialas che vegnevan eligi da cumin/dalla tschentada (tochen 1798 numnai mess, dapi 1803 deputai).

Napoleon haveva priu la via da miez cun la constituziun dalla mediaziun, haveva creau ina reorganisaziun orientada viers in consens, la quala pudeva era vegnir acceptada e «tuchegiada» dil pievel senza votaziun dil pievel. Dil reminent fuva *il pievel cumin* (purs, luvriers, burghois) fixaus fermamein sin il *cumbat d'existenza economic* pervia dils onns d'uiara e da crisa precedents e buc interessaus aschi fetg da damondas politicas. Aschia ha el surschau senza murmignar a ses delegai, als mistrals, als deputai (pil pli da derivonza buc nobla) da metter en vigur la constituziun nova e da realisar siu cuntegn.

2. Tgi fuvan ils protagonists (ils acturs) entuorn 1803?

Sco acturs principals en la politica dil Grischun igl onn 1803 san ins numnar *diesch persunas* ch'ein semussadas sco acturs els gremis suandonts, per part pliras gadas: en la «consulta», en la cumissiun dalla regenza, el Cussegl pign, el Cussegl grond e sco delegai alla dieta.

a) *En la «consulta»*, ella delegaziun svizra da ca. 60 dels a Paris, fuvan sco menziunau ils dus Grischuns Sprecher e Planta representai.

Jakob Ulrich Sprecher von Bernegg da Luzein (1765–1841), adherent impurtont dalla partida dils patriots, v. d. dallas ideas dalla Revoluziun franzosa e dalla adhesiun dil Grischun alla Svizra, valeva per «unitarist» (rinforzar las autoritads centralas el stadi); el haveva funcziunau sco «senatur» (legislativa) dalla Republica helvetica. A Paris fuva el fetg respectaus, commember dalla giunta dils diesch dalla «consulta», versaus diplomaticamein e saveva perquei cotscher caussas decisivas per il Grischun. El ei vegnius pliras gadas in suenter l'auter commember dil Cussegl pign e dil Cussegl grond e pliras gadas mistral dalla Ligia dallas Diesch Dertgiras.

Forian Planta-Samedan (1763–1834) ei staus in politicher conservativ, denton da maniera concilianta, buc reacziunari, che valeva sco «federalist» (rinforzar las forzas decentralas). La dieta grischuna dil november 1802 haveva eligiù igl empren el sulet en la «consulta»; essend denton memia pauc versaus en la diplomazia ha el giavischau sez d'eleger in secund delegau, quei ch'ei lu succediù cun l'elecziun da Sprecher. Planta ha schau la precedenza a Sprecher ed ha purtau solidarmein cun el ils resultats da Paris. El ha giu pliras gadas la funcziun da president dalla Ligia dalla Casa da Diu e mintgaton sco commember dalla deputaziun alla dieta federala.

b) *La cumissiun dalla regenza*. En quella cumissiun da 7 dels per realisar la constituziun da mediaziun el cantun Grischun sesevan il pli davon ils dus commembers suranumni dalla «consulta»: Sprecher e Planta. Lu suandavan ils suandonts «burgheis»:

Gaudenz Planta-Samedan (1757–1834). Il patriot grischun il pli premurau e cumbattant passiunau per refuormas, 1797 delegau tier Napoleon ell'Italia dil nord per mantener la Valtina tiel Grischun, valeva per in unitarist perschadiu ed ha funcziunau dil temps dalla Helvetica sco prefect dil cantun «Rezia», v. d. sco il pli ault Grischun. El ha survegniù il surnum «igl uors» pervia da siu engaschament cumbattiv per spindrar il Grischun dil declin. El ha aunc funcziunau pli tard sco president dalla Ligia dalla Casa da Diu e sco delegau alla dieta federala, mo fuva buca pli d'impurtonza el Cussegl pign e Cussegl grond.

Franz Riedi da Sursaiassa (* 1759), pauc enconuschents e buc aschi renomaus sco siu frar Peter Anton Riedi, fuva staus 1791 cauder-

schader (landrehter) dalla Ligia Grischa ed ei documentaus sco capitani (probabel en survetschs franzos). Igl ei pusseivel ch'el fuva il siatavel commember dalla cumissiuin, numnaus da Napoleon sez.

Georg Anton Vieli (1745–1830) da Cumbel/Razén, docter dalla medischina e mistral dalla Lumnezia, dapi 1777 administratur dil signeradi austriac da Razén, fuva patriot ed adherent dalla Frontscha, perquei eis el vegnius depurtaus 1799 sco ostagi austriac ad Innsbruck e Graz. Dil temps dalla Helvetica era el – sco Sprecher – «senatur» e plinavon statalter dil district dil Glogn. Vieli ha funcziunau suenter sco commember dil Cussegl pign, cauderschader (landrehter) dalla Ligia Grischa e delegau alla dieta.

Johann Theodor Enderlin da Maiavilla (1795–1835), staus pliras gadas ufficial administrativ ella Valtina, mistral da Maiavilla e dalla Ligia dallas Diesch Dertgiras, ha funcziunau dapi 1803 pliras gadas sco cusseglier guvernativ e deputau sco era delegau alla dieta. Unitarist.

Georg Gengel (†1821) da Churwalden/Cuera, ha occupau avon 1798 differents uffecis ella Valtina e sco mistral dalla Ligia dallas Diesch Dertgiras ed ha funcziunau 1801 sco commember dil cussegl dalla municipalitad a Cuera e 1801/1802 sco suppleant dalla regenza dil cantun «Rezia». Suenter 1803 eis el adina puspei cau dalla Ligia dallas Diesch Dertgiras e cunquei commember dil Cussegl pign sco era mintgaton delegau alla dieta federala. Gengel ei semidaus d'in federalist ad in unitarist moderau.

c) *Il Cussegl pign*. 1803 fagevan ils treis caus dallas Ligias Vincenz Salis-Sils, Peter Anton Riedi e Georg Gengel part dil Cussegl pign.

Vincenz Salis-Sils (1760–1832) descendeva dalla lingia dils Salis da Samedan, fuva staus avon 1798 podestat a Morbegno e castellan da Farschno. El era in conservativ perschuadiu ed adherent dall'Austria, perquei eis el era vegnius depurtaus 1799 sco ostagi en Frontscha. Tier la nominaziun dils caus 1803 han tuttas treis Ligias eligiu plitost umens conservativs e federalistics sco parsuras dallas Ligias. Il pli conservativ dad els, Vincenz Salis, president dalla Ligia dalla Casa da Diu, ha il Cussegl grond numnau schibein agen president e parsura dil Cussegl pign sco era empren delegau alla dieta federala. El ha priu part 1804 sco delegau dil Grischun dalla encorunaziun digl imperatur Napoleon a Paris, nua ch'el ha admirau la monarchia renaschida. Salis ha denton pers sia carteivladad 1814, cura ch'el ha fatg part dil moviment reacziunar dil barun da Salis ed

ha collaborau al pamflet discreditont «aunghel dalla pasch» (Friedensengel) dalla gruppaziun.

Sco secund commember dil Cussegl pign ha il cauderschader dalla Ligia Grischa, *Peter Anton Riedi* (1742–1815) da Sursaissa, funcziunau, frar dil suranumnu Franz Riedi. Sco guvernatur staus duas gadas ella Valtina, sco mistral da Sursaissa ed en tut sis gadas cauderschader disponeva el d'ina gronda esperienza politica. Riedi valeva per in partisan austriac e federalist moderau; el ei sesius da 1803 tochen 1813 adina puspei era el Cussegl grond ed ultra da 1803 era 1809 el Cussegl pign, ei denton buc staus delegau alla dieta federala. Sco tierz el Cussegl pign ha *Georg Gengel* funcziunau, il mistral dalla Ligia dallas Diesch Dertgiras presentaus sura.

d) *Il Cussegl grond*: President fuva 1803 *Vincenz Salis-Sils* e vicepresidente *Jakob Ulrich Sprecher*, omsidus gia menziunai. – Schegie ch'il Cussegl grond secumponeva per la pli gronda part da federalists, sestentava el d'era risguardar ils unitarists. Aschia ha per exempel igl unitarist Sprecher anflau 1803 e 1804 il risguard duiu sco vicepresidente e Johann Theodor Enderlin 1805 sco president.

e) *Delegai alla dieta federala*. Sco tals ein *Vincenz Salis-Sils* e *Paul Anton Toggenburg* da Ruschein vegni eligi 1803 dil Cussegl grond. Toggenburg aveva prestau survetschs militars franzos ed engles, purtava 1803 il grad da capitani ed ei daventaus 1804 cumandant dil battagliun grischun e pli tard litinent colonel dall'armada svizra. El ei s'engaschaus per dapli risguard dalla minoritad catolica el Grischun.

Sco ei resorta dalla occupaziun dils posts politics suramenziunai, pretendeva la costituziun da mediaziun bein la separaziun formala dallas pussonzas sco organs, denton buc arisguard las personas. Per aschidadir tut ils cussegliers dil Cussegl pign fuvan era commembers dil Cussegl grond.

Ina analisa partenent la posiziun ideologica, la derivonza e la posiziun linguistica dallas diesch personas prominentas da 1803 dat il suadont maletg:

L'orientaziun ideologica: Per unitarists valevan Sprecher, Gaudenz Planta, Vieli, Enderlin ed Engel, sco federalists Salis, Florian Planta, Peter Anton Riedi, Franz Riedi e Toggenburg; tut en tut pia ina cumposiziun equilibrada.

La derivonza: Dalla Ligia Grischa derivavan Vieli, ils dus Riedis e Toggenburg, dalla Ligia dalla Casa da Diu Salis ed ils dus Planta, dalla Ligia dallas Diesch Dertgiras Sprecher, Enderlin ed Engel.

Ils lungatgs: Tschun persunas fuvan da derivonza linguistica romontscha (ils dus Planta, Salis, Vieli e Toggenburg), duront ch'ils auters tschun havevan il tudestg sco lungatg mumma.

PS. Sco protagonists el senn pli vast valevan era ils *votants* da gliez temps che votavan davart las leschas dil cantun sils cumins e che savevan era eleger leu lur deputai e derschaders. Tenor ina ordinaziun dalla cumissiun dalla regenza dils 30 da mars 1803 havevan «mo ils vischins che han cumpleniù il 18avel onn e che ein buca senza honor pervia d'in nausch bancrut ni schiglioc entras sentenza» il dretg da votar.

3. Tgei impurtonza veva il Grischun en la Confederaziun e Cuera el Grischun?

En la Svizra dalla mediaziun s'udeva il Grischun ella categoria dils cantuns cun ina fetg gronda populaziun; denter ils sis cantuns cun ina populaziun da sur 100 000 «olmas» figurava el *sco sisavel*. Tenor quei vegneva era la quota da vuschs valetada. Dalla gruppa dils sis emprems cantuns possedeveva mintga cantun, pia era il Grischun, duas vuschs alla dieta federala; ils ulteriurs 13 cantuns havevan mintgamai ina vusch. Il diember total dallas vuschs alla dieta muntava pia a 25.

Da principi elegeva il Cussegl grond dil Grischun in responsabel principal sco delegau alla dieta, il qual disponeva leu dallas duas vuschs. Tonaton devan ins pil pli a quei delegau in secund sco cussegliader, mintgaton era in tierz sco secretari. 1807 ha ina «Lescha davart l'elecziun dalla delegaziun alla dieta federala» reglau la deputaziun sco suonda: L'elecziun dalla deputaziun dil cantun duei esser libra ed illimitada, denton duei vegnir numnaus mintga treis onns in delegau principal catolic. Ultra da quei delegau vegnan el futur dus cussegliers dalla deputaziun ni condeputai numnai; sch'igl'emprems delegau ei da religiun reformada, sto in dils dus concussegliers esser in catolic, sina-quei che quel sappi defender ils interess dalla part catolica dil cantun, sche temas religiun vegnien deliberai alla dieta. – En quella davosa disposiziun sereflectescha il principi da dus tiarzs ed in tierz en proporziun da reformai e catolics, principi che fuva usitau da gliez temps el cantun per occupar biars uffecis.

La costituziun da mediaziun pretendeva ch'ei vegni mess a disposiziun in effectiv d'armada da contingents cantunals; quellas truppas duevan garantir la costituziun, il territori, la libertad e l'indipendenza dalla Svizra. Ina ordinaziun fixava il diember total dall'armada sin 15'203 umens ed ina clav partenent reparter quels sils cantuns. Tenor quei figurava il Grischun cun 1'200 umens sin plaz sis. Ils cuosts per quell'armada fuvan calculai cun 490'507 francs svizzers. Repartend quels cuosts sils cantuns steva il Grischun cun 12'000 francs pér ella 12avla posiziun. Il Grischun purtava pia mo 2,5% dallas expensas finanzialas. Apparentamein veva ei nezegiau che las autoritads havevan gia recumandau, orientond lur dus delegai alla «consulta», da render attents en moda cunvegna alla pupira dil cantun da muntogna grischun, sinaquei che pretensiuns finanzialas nungiustificadas vegnien buca fatgas ad el!

L'impurtonza dil Grischun en la Confederaziun fuvà considerabla cun 8% dalla forza da vuschs – bia pli impurtonza che oz; era sia cumpart da bunamein 8% al potenzial militar dalla Svizra era respectabla. Perencunter cumprova la cumpart da mo 2,5% dallas expensas per l'armada la pintga forza finanziaria dil cantun che fuvà buc el cass da separticipar commensuradamein dallas ovras pli grondas dall'entira confederaziun.

La damonda dalla capitala dil cantun. El vegl Stadi liber dallas Treis Ligias deva ei negina capitala. Cuera era sco pli grond marcau da principi buca da pli gronda impurtonza che in'otra vischnaunca giudiziala. Suenter che la costituziun dalla mediaziun ha pretendiu *la dismessa da tuts privilegis dil liug*, dalla naschientscha, dallas persunas ni famiglias, ein era el Grischun ils vegls privilegis en las singulas ligias curdai. Ella Ligia Grischa fuvà ei vargau cul privilegi ch'il cauderschader sappi vegnir eligius mo ord il ravugl d'entginas paucas vischnauncas giudizialas; era la dertgira d'appellaziun civila dalla Ligia a Trun ei vegnida dismessa. Ella Ligia dalla Casa da Diu han ils privilegis dil marcau da Cuera concernent l'occupaziun dils uffecis dalla Ligia e lur moda d'elecziun calau. Medemamein eis ei stau alla fin ella Ligia dallas Diesch Dertgiras cul privilegi da Tavau d'occupar ils uffecis dalla Ligia. Ultra da quei ha il turnus usitau dapi tschentanners medemamein calau da far las dietas comunablas alternontamein a Glion, Cuera e Tavau.

El conclus dalla cumissiun dalla regenza digl 1. d'avrel 1803 eis ei vegniu decidiu partenent *il liug dalla dieta dil Cussegl grond*: «Il

Cussegl grond vegn a fixar il liug dalla reuniun, nua ch'el duei haver sias tschentadas usitadas; per l'emprema gada vegn quel a sereunir a Cuera.» 1805 ei il Cussegl grond revegnius a quella damonda ed ha concludiu, sin giavisch d'entginas vischnauncas, che levan las tschentadas en las diversas Ligias, da fixar las radunonzas alternontamein per emprova 1806 a Glion e 1807 a Tavau,

Il Cussegl grond ha denton resalvau, tut tenor «las difficultads che arrivau» da terminar quella «alternaziun». Talas difficultads temeva il Cussegl grond en vesta dil traffic cun la Confederaziun: Sche «il Cussegl grond fa sias radunonzas en in liug allontanau dalla sedia dalla regenza e dallas vias da posta.»

Ella davosa construcziun ei fatg allusiu ch'il Cussegl pign inclusiv sia canzlia haveva siu sez (ufficial) stabel a Cuera. Per motivs pratics eis ei perquei daventau silsunter usit ch'era il Cussegl grond ei seradunau da principi a Cuera – cun excepziun da 1806 e 1807.

Aschia ha il marcau da Cuera survegniu plaunsiu informalmein la posiziun d'ina capitala dil cantun. Quei process ei vegnius sustenius dall'acquisiziun dil palaz «Neues Gebäu» en possess dils Salis a Cuera igl onn 1807 entras il cantun, edifeci ch'ei daventaus silsunter cul num «Casa grischa» il center dall'administraziun grischuna, la *casa dalla Regenza*. Bunamein il medem temps ha il cantun era survegniu in *sigil statal* – il Stadi liber dallas Treis Ligias haveva enconuschiu mo ils sigils dallas singulas treis Ligias –, che ha surviu igl emprem da sigillar ils decrets dalla regenza. Da quel ei igl emprem *uopen statal* sesviluppau.

4. Tgei ha la constituziun da mediaziun muntau politicamein, economicamein e culturalmein?

Politicamein

- Ella ha dau alla tiara ina regenza ed administraziun habla d'agir.
- Ella ha effectuai ina megliera giurisdicziun.
- Ella ha fatg uorden cun biars privilegis.
- Ella ha eliminau abus, scumandond rigurusamein d'incassar taxas per contonscher in uffeci politic.
- Ella ha simplificau la legislaziun. Las vischnauncas giudizialas han neginas cumpetenzas legislativas pli, la legislaziun ei caussa dil Cussegl grond. Ils sbozs per las leschas dil Cussegl grond survegnan vi-

gur legala, sch'els vegnan approvai «dalla pluralitad absoluta» dallas vischnauncas giudizialas.

Economicamein

La costituziun da mediaziun garanteva la *libertad da domicil, da commerci e da mistregn* en l'entira Svizra. Il dazi ei vegnius simplifichaus. Il dazi cugl exteriur al cunfin dalla tiara saveva vegnir duvraus dil cantun pertuccau; egl intern dalla tiara dueva mo excepziunalmein vegnir incassau dazi per cuvierer ils cuosts dallas vias. Igl ei daventau obligaziun da scaffir organisaziuns da posta cantunalas. Las dieschmas duevan vegnir dismissas, quei che fuva gia schabegiau pli baul per gronda part el cass dil Grischun. Quellas libertads han caschunau plaunsiu in niev svilup economic ch'ei semanifestaus cunzun entuorn 1820, cura ch'il cantun ei semess vidlunder cun ina immensa dinamica da construir las vias da commerci las pli impurtontas, cunzun el traffic dil nord el sid, numnadas «vias commercialas».

Ussa fuva la garanzia costituziunala dalla *libertad da domicil, da mistregn e da commerci* bein renconuschida formalmein, mo en la pratica vegneva ella buca fatga valer rigurusamein, sco ils exempels suandonts muossan:

L'ordinaziun dalla cumissiun dalla regenza dils 30 da mars 1803 pretendeva che «ils privilegis da commerci, dils mistergners e dallas mistronzas (corporaziuns) dils burgheis da Cuera e da mintg'otra dertgira aulta dil cantun, nua ch'ei deva tals» vegnien dismiss; a mintga burgheis cantunal e svizzer seigi ei lubiu d'exercitar siu mistregn egl entir cantun. En verdad han las *mistronzas da Cuera* denton aunc existiu vinavon durant entgins decennis.

En ina proclamaziun dil Cussegl pign digl onn 1805, suttascretta dil president Georg Gengel, ha il magistrat scumandau il *commerci liber als Gediis* el cantun: «Che dacheudenvi dueigi esser lubida a negins Gediis la dimora en quei cantun ed ad els seigi tut commerci en quel scumandaus da tut temps.» Il Cussegl grond haveva debattiu avon davart «las consequenzas nuscheivlas dil commerci dils Gediis sin la situaziun economica e sin la moralitad dils habitonts.» Il scamond dils Gediis ei denton vegnius mitigaus en quei senn – per motivs utilitaristics – che a Gediis che sededicavan al commerci internaziunal el traffic dil nord-sid, vegneva accordau il passadi liber «senza dimora per lur persunas» ed il «pass liber per lur marcanzia che mava en spediziun

atras il Grischun.» – Quella discriminaziun massiva d'ina grupp etnica munta ina tolca en la historia da gliez temps!

Pigl auter eis ei restau tier l'anteriura gronda *varietad dallas muneidas, dallas mesiras e dallas peisas*. Teoreticamein deva ei tiels danners ina valuta directiva en francs svizzers. La valeta dallas muneidas battidas en Svizra dueva vegnir fixada dalla dieta federala. En la pratica predominava el Grischun il flurin (rensch), sco mied da pagament valevan denton cunzun ils bluzchers, rizzers e bazs; tonaton fuvan biaras valutas jastras en circulaziun. Numerusas fuvan era las sorts da peisas che fuvan aunc en diever (sauma, brel, quintals, tscheners, mesira, glivra, curtauna, crena) e mesiras (tschuncheisma, bratsch, pei, zol, polisch, lingia; tschavera, enzenna, curtauna), per gronda part aunc duront igl entir 19avel tschentaner, schegie che la costituziun federala da 1848 haveva declarau novas valetas ufficialas per normativas.

Culturalmein

Cunquei ch'il Cussegl pign disponeva era d'entginas cumpetenzas nunscrettas, eis ei reussiu ad el da sviluppar iniziativas sil sectur dalla formaziun e dalla sanadad. Aschia ei il plan fatgs gia daditg da *fundar ina scola cantunala*, en la quala la giuventegna grischuna vegni «dotada cul spért dalla toleranza confessiunala e d'in sentiment naziunal» vegnius persequitaus vinavon. La finamira da persunas progressivas da scaffir ina scola cantunala per omisduas confessiuns ei denton ida en nuot pervia dalla resistenza dalla curia. Aschia han ins fundau igl εμπrem ina scola cantunala evangelica a Cuera ed ina scola cantunala catolica ella claustra da Mustér. Da quellas duas ei naschida 1851 la scola cantunala comunabla a Cuera.

Da quei temps datescha era la promoziun ufficiala da societads scientificas, sco per exempel dalla societad economica che ha prestau ina considerabla lavur d'informaziun en la periodica «Neuer Sammler». Plinavon ha la nova pratica dil Cussegl grond da publicar las decisziuns, las qualas survegnevan vigur legala, en tut ils treis lungatgs cantunals muntau in signal positiv per mantener la trilinguitad.

5. Co ha il pievel grischun reagiu sin la «mediaziun»?

Tut priu positivamein. Il pievel veva negina alternativa. La gliעד semplu fava occupada cun lur problems persunals e leda ch'ei regeva

ussa pasch; els havevan da batter avunda per l'existenza economica. Il pauperissem sfurzava alla emigraziun professiunala ed al survetsch da mercenaris. Mo era la constituziun nova deva al singul individi novas pusseivladads per siu svilup persunal e professiunal liberond da caderas economicas e da privilegis persunals. La pluralitad dalla classa politica ha prest anflau la via el niev sistem.

Mo la veglia aristocrazia fuva buca cuntenta, perquei ch'ella fuva vegnida privada da ses anteriurs privilegis e da sias pusseivladads da manipular. Sia davosa revolta encunter igl uorden niev cun il culp dil barun Heinrich da Salis-Zezras 1814 ha denton muntau ina schampra emprova da far ir anavos la roda dil temps.

Litteratura

Handbuch der Bündner Geschichte. Bd. 3, 19. und 20. Jahrhundert. Chur 2000.

PIETH, FRIEDRICH: *Die Umbildung des Freistaates der Drei Bünde in den Kanton Graubünden.* In: Jahresbericht der Historischen Gesellschaft Graubünden 1927, S. 85–119.

PIETH, FRIEDRICH: *Relation der Deputierten Florian Planta und Jakob Ulrich Sprecher an den Grossen Rat über die Deputation nach Paris vom Nov. 1802 bis März 1803.* In: Bündner Monatsblatt 1947, S. 333.

BALZER, HANS: *Der Kanton Graubünden in der Mediationszeit.* Chur 1918. «Jubiläumsfeier» zum 150. Gedenkjahr des Beitritts Graubündens zur Schweizerischen Eidgenossenschaft 30. Mai 1953. Festreden. Hg. von der Bündner Regierung. Chur 1953.

METZ, PETER: *Zusammenbruch und Wiederaufbau. Die Jahre der Helvetik und Mediation 1799–1813.* In: Bündner Jahrbuch 1966, S. 5–33.

MESSMER, ELISABETH: *Aus den helvetischen Akten im Staatsarchiv Graubünden. Bündner Alltag um 1800 vor dem Hintergrund grosser Politik.* In: Bündner Monatsblatt 2001, S. 297–316.

Offizielle Sammlung der seit der Vermittlungsurkunde im Kanton Graubünden gegebenen Gesetze und Verordnungen. Erstes Heft. Chur 1805. Erster Band. Chur 1807. Viertes Heft. Chur 1810.

Taschen-Kalender des Cantons Graubünden. Chur 1805.

